

天籟集序



記曰樂由天作又曰凡音之起由人心生也此
二說者足以觀詩矣詩動乎天而應以人動乎
人而應以天天人之相應也今之詩由古之詩
也天人之不相應也意匠經營之日深也興觀
羣怨之日遠也予聞夫金石絲竹之音之盈於
虛空也予聞夫金石絲竹之音之盈於先民也
予又憂夫天人之不通而人心蔽之也今古之

不通而今之說詩者殺之也謹於三百篇外由
陶唐至李唐集天籟數百章以俟夫知音之君
子甲辰盛夏歸羣子黃葆年序於姑蘇之歸羣
草堂

天籟全集目錄

唐

歌一首

謠一首

戒一首

蜡辭一首

虞

歌八首

夏

歌五首

諺一首

繇一首

商

銘二首

歌二首

周

銘十六首

歌二十六首

謠三首

逸詩七首

諺十三首

琴操七首

箴一首

誦一首

祝辭一首

秦

謠一首

歌一首

漢

高帝一首

武帝三首

朱虛侯章一首

四皓一首

東方朔一首

卓文君一首

蘇武四首

李陵三首

李延年一首

王昭君一首

班婕妤一首

趙飛燕一首

梁鴻一首

張衡四首

高彪一首

蔡邕二首

蔡琰一首

孔融一首

辛延年一首

宋子侯一首

蘇伯玉妻一首

竇玄妻一首

陰長生三首

丁令威一首

無名氏二十七首

樂府二十三首

謠諺七首

魏

武帝六首

文帝二首

甄后一首

陳思王植二十六首

王粲三首

陳琳一首

劉楨四首

晉

徐幹二首

應璩二首

嵇康三首

阮籍十四首

張華二首

傅玄二首

陸機九首

陸雲一首

潘岳二首

潘尼一首

左思五首

左貴嬪一首

張翰一首

張協五首

王讚一首

郭璞八首

劉琨一首

謝尚一首

王羲之一首

吳隱之一首

謝道韞一首

陶淵明四十首

樂府八首

歌謠四首

宋

顏延之五首

謝靈運二十六首

謝惠連七首

鮑照三十一首

鮑令暉一首

陸凱一首

齊

青溪小姑一首

漁父一首

樂府二首

謝朓二十三首

王融一首

張融一首

蘇小小一首

梁

武帝四首

沈約一首

江淹五首

范雲一首

邱遲一首

任昉一首

柳惲六首

庾肩吾二首

吳均一首

何遜四首

王籍一首

劉峻一首

陶弘景一首

沈滿願一首

衛敬瑜妻王氏一首

瑯琊王歌四首

無名氏一首

陳

陰鏗一首

徐陵一首

張正見一首

北魏

楊白花一首

北齊

蕭愨一首

斛律金一首

北周

庾信九首

隋

楊素一首

盧思道一首

薛道衡三首

虞世基一首

樂府三首

無名氏一首

唐

玄宗皇帝四首

虞世南一首

王績一首

魏徵一首

王勃二首

楊炯一首

盧照鄰一首

駱賓王一首

喬知之一首

蘇味道一首

陳子昂十九首

杜審言五首

沈佺期五首

宋之問五首

劉希夷三首

張九齡十六首

薛稷一首

郭振一首

王無競一首

張說三首

蘇頌一首

王翰一首

孫逖一首

賀知章二首

王灣一首

劉春虛四首

崔顥五首

張若虛一首

崔國輔一首

王維六十一首

王縉一首

孟浩然二十四首

裴迪八首

王之渙二首

張子容一首

賈至三首

常理一首

王昌齡十五首

張巡一首

李頎九首

儲光羲一首

邱為一首

綦毋潛二首

張旭二首

薛據一首

常建八首

崔曙二首

高適十一首

岑參十五首

殷遙一首

祖詠三首

張潮一首

陶峴一首

李白一百四十八首

杜甫九十七首

丁仙芝一首

張謂六首

元結三首

劉方平三首

張志和一首

金昌緒一首

劉長卿十三首

錢起三首

韋應物十九首

李嘉祐一首

顧況一首

張仲素一首

皇甫冉三首

韓翃一首

竇叔向一首

李端四首

郎士元一首

盧綸五首

王建二首

李泌一首

于鵠一首

李涉一首

權德輿一首

李紳二首

竇牟一首

李益七首

楊敬之一首

耿漳一首

司空曙五首

柳宗元一首

韓愈四首

張籍三首

張繼一首

劉禹錫八首

元稹二首

白居易五首

王涯一首

孟郊二首

崔護一首

李賀三首

賈島二首

戎昱一首

盧弼四首

張祜三首

李商隱十首

杜牧五首

許渾三首

馬戴二首

雍陶二首

朱慶餘一首

溫庭筠四首

趙嘏二首

李羣玉一首

陳陶一首

李咸用一首

李頻一首

崔魯一首

杜荀鶴二首

冷朝陽一首

陸龜蒙一首

李洞一首

鄭谷二首

劉綺莊一首

韋莊三首

沈彬一首

崔塗二首

高蟾一首

王駕一首

張泌一首

秦韜玉一首

聶夷中一首

馮道一首

西鄙人一首

太上隱者一首

皎然一首

處默一首

七歲女子一首

開元宮人一首

宮人韓氏一首

裴羽仙一首

李冶一首

鮑君徽一首

劉采春三首

陳玉蘭一首

葛亞兒一首

杜秋娘一首

薛濤一首

武昌妓一首

寒山二首

金地藏一首

呂祖二首

許宣平一首

裴航一首

許碯一首

戚逍遙一首

南溟夫人一首

樊夫人一首

湘妃廟女子一首

肅宗皇帝聯句一首

天籟集目錄之一

唐

擊壤歌

堯戒

虞

南風歌

帝作歌

帝乃歌

夏

皋陶賡歌
皋陶又歌

五子之歌

商

商銘

麥秀歌

采薇歌

周

盟盤銘

帶銘

杖銘

衣銘

矛銘

書戶

書履

書鋒

書杖

祈招詩

鼎銘

去魯歌

龜山操

蟋蟀歌

猗蘭操

獲麟歌

綏山謠

漁父歌三章

偕隱歌

越人歌

烏鵲歌二首

韓憑妻答夫歌

逸詩

四民月令引農語二則

月令註引里語

漢

武帝

秋風辭

李夫人歌

落葉哀蟬曲

東方朔

誠子詩

卓文君

白頭吟

蘇武

詩四首

李陵

與蘇武詩三首

李延年

歌一首

班婕妤

怨歌行

趙飛燕

歸風送遠操

梁鴻

五噫歌

張衡

四愁詩

蔡邕

飲馬長城窟行

辛延年

羽林郎

宋子侯

董嬌嬈

蘇伯玉妻

盤中詩

竇玄妻

古怨歌

樂府

戰城南

有所思

上邪

箜篌引

江南

陌上桑

東門行

悲歌

古歌

無名氏

古詩十九首

古詩

丁令威

歌一首

天籟集

唐

擊壤歌

日出而作日入而息
鑿井而飲耕田而食
帝力何有於我哉

堯戒

戰戰慄慄日謹一日
人莫躡於山而躡於垤

虞

南風歌

南風之薰兮可以解吾民之愠兮南風之時兮
可以阜吾民之財兮

帝作歌

勅天之命惟時惟幾

帝乃歌

股肱喜哉元首起哉百工熙哉

皋陶賡歌

元首明哉股肱良哉庶事康哉

皋陶又歌

元首叢脞哉股肱惰哉萬事墮哉

夏

五子之歌

皇祖有訓民可近不可下民惟邦本本固邦寧
予視天下愚夫愚婦一能勝予一人三失怨豈
在明不見是圖予臨兆民慄乎若朽索之馭六

馬為人上者奈何不敬

訓有之內作色荒外作禽荒甘酒嗜音峻宇彫
牆有一於此未或不亡

惟彼陶唐有此冀方今失厥道亂其紀綱乃底
滅亡

明明我祖萬邦之君有典有則貽厥子孫關石
和鈞王府則有荒墜厥緒覆宗絕祀

嗚呼曷歸予懷之悲萬姓仇予予將疇依爵陶

乎予心顏厚有忸怩弗慎厥德雖悔可追

商

商銘

嗛嗛之德不足就也不可以矜而祇取憂也嗛
嗛之食不足狃也不能為膏而祇離咎也

麥秀歌

麥秀漸漸兮禾黍油油彼狡童兮不與我好兮

采薇歌

登彼西山兮采其薇矣以暴易暴兮不知其非
矣神農虞夏忽焉沒兮我適安歸矣吁嗟徂兮
命之衰矣

周

盥盤銘

與其溺於人也寧溺於淵溺於淵猶可游也溺
於人不可救也

帶銘

火滅脩容慎戒必恭恭則壽

杖銘

惡乎危於忿懷惡乎失道於嗜欲惡乎相忘於
富貴

衣銘

桑蠶苦女工難得新捐故後必寒

矛銘

造矛造矛少聞弗忍終身之羞余一人所聞以

戒後世子孫

書戶

出畏之入懼之

書履

行必履正無懷僥倖

書鋒

忍之須臾乃全汝軀

書杖

輔人無苟扶人無咎

祈招詩

祈招之悖悖式昭德音思我王度式如玉式如
金形民之力而無醉飽之心

鼎銘

一命而僂再命而偃三命而俯循墻而走亦莫
余敢侮饘於是粥於是以飴予口

去魯歌

彼婦之口可以出走彼婦之謁可以死敗蓋優
哉游哉聊以卒歲

龜山操

予欲望魯兮龜山蔽之手無斧柯奈龜山何

蟋蟀歌

達山十里蟋蟀之聲猶尚在耳

猗蘭操

習習谷風以陰以雨之子于歸遠送于野何彼

蒼天不得其所逍遙九州無所定處時人闇蔽
不知賢者年紀逝邁一身將老

獲麟歌

唐虞世兮麟鳳遊今非其時來何求麟兮麟兮
我心憂

綏山謠

得綏山一桃雖不得仙亦足以豪

漁父歌三章

日月昭昭乎寢已馳與子期乎蘆之漪
日已夕兮予心憂悲月已馳兮何不渡為事寢
急兮將奈何

蘆中人蘆中人豈非窮士乎

偕隱歌

天下有道我黻子佩天下無道我負子戴

越人歌

今夕何夕兮塞洲中流今日何日兮得與王子

同舟蒙羞被好兮不訾詬恥心幾煩而不絕兮
得知王子山有木兮木有枝心說君兮君不知

烏鵲歌二首

南山有烏北山張羅烏自高飛羅當奈何
烏鵲雙飛不樂鳳凰妾是庶人不樂宋王

韓憑妻答夫歌

其雨淫淫河大水深日出當心

逸詩

翹翹車乘招我以弓豈不欲往畏我友朋

四民月令引農語二則

三月昏參星夕杏花盛桑葉白

河射角堪夜作犁星沒水生骨

月令註引里語

蜻蛉鳴衣裘成蟋蟀鳴懶婦驚

漢

武帝

秋風辭

秋風起兮白雲飛草木黃落兮雁南歸蘭有秀
兮菊有芳懷佳人兮不能忘汎樓船兮濟汾河
橫中流兮揚素波簫鼓鳴兮發櫂歌歡樂極兮
哀情多少壯幾時兮奈老何

李夫人歌

是耶非耶立而望之翩何姍姍其來遲

落葉哀蟬曲

羅袂兮無聲玉墀兮塵生虛房冷而寂寞落葉
依于重扃望彼姜之女兮安得感余心之未寧

東方朔

誡子詩

明者處世莫尚于中優哉游哉於道相從首陽
為拙柳下為工飽食安步以仕代農依隱玩世
詭時不逢才盡身危好名得華有羣累生孤貴
失和遺餘不匱自盡無多聖人之道一龍一蛇

形見神藏與物變化隨時之宜無有常家

卓文君

白頭吟

皚如山上雪皎若雲間月聞君有兩意故來相
決絕今日斗酒會明旦溝水頭躑躅御溝上溝
水東西流淒淒復淒淒嫁娶不須啼願得一心
人白頭不相離竹竿何嫋嫋魚兒何篋篋男兒
重意氣何用錢刀為

蘇武

詩四首

骨肉緣枝葉結交亦相因四海皆兄弟誰為行
路人况我連枝樹與子同一身昔為鴛與鴦今
為參與辰昔者常相近邈若胡與秦惟念當乖
離恩情日以新鹿鳴思野草可以喻嘉賓我有
一尊酒欲以贈遠人願子留斟酌叙此平生親
結髮為夫妻思愛兩不疑歡娛在今夕燕婉及

良時征夫懷往路起視夜何其參辰皆已沒去
去從此辭行役在戰場相見未有期握手一長
歎淚為生別滋努力愛春華莫忘歡樂時生當
復來歸死當長相思

黃鵠一遠別千里顧徘徊胡馬失其羣思心常
依依何況雙飛龍羽翼臨當乖幸有絃歌曲可
以喻中懷請為遊子吟泠泠一何悲絲竹厲清
聲慷慨有餘哀長歌正激烈中心愴以摧欲展

清商曲念子不能歸俛仰內傷心淚下不可揮
願為雙黃鵠送子俱遠飛

燭燭晨明月馥馥秋蘭芳芬馨良夜發隨風聞
我堂征夫懷遠路游子戀故鄉寒冬十二月晨
起踐嚴霜俯觀江漢流仰視浮雲翔良友遠別
離各在天一方山海隔中州相去悠且長嘉會
難再遇歡樂殊未央願君崇令德隨時愛景光

李陵

與蘇武詩三首

良時不再至離別在須臾屏營衢路側執手野
踟躕仰視浮雲馳奄忽互相踰風波一失所各
在天一隅長當從此別且復立斯須欲因晨風
發送子以賤軀
嘉會難再遇三載為千秋臨河濯長纓念子悵
悠悠遠望悲風至對酒不能酬行人懷往路何
以慰我愁獨有盈觴酒與子結綢繆

攜手上河梁游子暮何之徘徊蹊路側悵悵不能辭行人難久留各言長相思安知非日月弦望自有時努力崇明德皓首以為期

李延年

歌一首

北方有佳人絕世而獨立一顧傾人城再顧傾人國寧不知傾城與傾國佳人難再得

班婕妤

怨歌行

新裂齊紈素皎潔如霜雪裁成合歡扇團團似明月出入君懷袖動搖微風發常恐秋節至涼飈歟炎熱棄捐篋笥中恩情中道絕

趙飛燕

歸風送遠操

涼風起兮天隕霜懷君子兮渺難忘感予心兮多慨慷

梁鴻

五噫歌

陟彼北芒兮噫顧瞻帝京兮噫宮闕崔巍兮噫
民之劬勞兮噫遼遼未央兮噫

張衡

四愁詩

我所思兮在太山欲往從之梁父艱側身東望
涕霑翰美人贈我金錯刀何以報之英瓊瑤路

遠莫致倚逍遙何為懷憂心煩勞

我所思兮在桂林欲往從之湘水深側身南望
涕霑襟美人贈我金琅玕何以報之雙玉盤路
遠莫致倚惆悵何為懷憂心煩傷

我所思兮在漢陽欲往從之隴坂長側身西望
涕霑裳美人贈我貂襜褕何以報之明月珠路
遠莫致倚踟躕何為懷憂心煩紆

我所思兮在雁門欲往從之雪雰雰側身北望

涕霑中美人贈我錦繡段何以報之青玉案路
遠莫致倚增歎何為懷憂心煩惋

蔡邕

飲馬長城窟行

青青河邊草綿綿思遠道遠道不可思宿昔夢
見之夢見在我旁忽覺在他鄉他鄉各異縣展
轉不可見枯桑知天風海水知天寒入門各自
媚誰肯相為言客從遠方來遺我雙鯉魚呼童

烹鯉魚中有尺素書長跪讀素書書中竟何如
上有加餐食下有長相憶

辛延年

羽林郎

昔有霍家奴姓馮名子都依倚將軍勢調笑酒
家胡胡姬年十五春日獨當壚長裾連理帶廣
袖合歡襦頭上藍田玉耳後大秦珠兩鬟何窈
窕一世良所無一鬢五百萬兩鬟千萬餘不意

金吾子娉婷過我廬銀鞍何煜爚翠蓋空踟躕
就我求清酒絲繩提玉壺就我求珍肴金盤膾
鯉魚貽我青銅鏡結我紅羅裾不惜紅羅裂何
論輕賤軀男兒愛後婦女子重前夫人生有新
故貴賤不相踰多謝金吾子私愛徒區區

宋子侯

董嬌嬈

洛陽城東路桃李生路傍花花自相對葉葉自

相當春風東北起花葉正低昂不知誰家子提
籠行採桑纖手折其枝花落何飄颺請謝彼妹
子何為見損傷高秋八九月白露變為霜終年
會飄墮安得久馨香秋時自零落春月復芬芳
何時盛年去歡愛永相忘吾欲竟此曲此曲愁
人腸歸來酌美酒扶瑟上高堂

蘇伯玉妻

盤中詩

山樹高鳥鳴悲泉水深鯉魚肥空倉鵲常苦饑
史人婦會夫希出門望見白衣謂當是而更非
還入門中心悲北上堂西入階急機絞杼聲催
長歎息當語誰君有行妾念之出有日還無期
結巾帶長相思君忘妾未知之妾忘君罪當治
妾有行宜知之黃者金白者玉高者山下者谷
姓者蘇字伯玉人才多智謀足家居長安身在
蜀何惜馬蹄歸不數羊肉千斤酒百斛令君馬

肥麥與粟今時人知四足與其書不能讀當從

中央周四角

竇玄妻

古怨歌

煢煢白兔東走西顧衣不如新人不如故

樂府

戰城南

戰城南死郭北野死不葬烏可食為我謂烏且

為客豪野死諒不葬腐肉安能去子逃水深激
激蒲葦冥冥梟騎戰鬥死駑馬徘徊鳴梁築室
何以南何以北禾黍不獲君何食願為忠臣安
可得思子良臣良臣誠可思朝行出攻暮不夜
歸

有所思

有所思乃在大海南何用問遺君雙珠玳瑁簪
用玉紹繚之聞君有他心拉雜摧燒之摧燒之

當風揚其灰從今已往勿復相思相思與君絕
雞鳴狗吠兄嫂當知之妃呼豨秋風肅肅晨風
颼東方須臾高知之

上邪

上邪我欲與君相知長命無絕衰山無陵江水
為竭冬雷震震夏雨雪天地合乃敢與君絕

箜篌引

公無渡河公竟渡河墮河而死當奈公何

江南

江南可採蓮蓮葉何田田魚戲蓮葉間魚戲蓮
葉東魚戲蓮葉西魚戲蓮葉南魚戲蓮葉北

陌上桑

日出東南隅照我秦氏樓秦氏有好女自名為
羅敷羅敷善蠶桑採桑城南隅青絲為籠係桂
枝為籠鉤頭上倭墮髻耳中明月珠紺綺為下
裙紫綺為上襦行者見羅敷下擔捋髭鬚少年

見羅敷脫帽著幘頭耕者忘其犁鋤者忘其鋤
耒歸相怒怨但坐觀羅敷解使君從南來五馬
立踟躕使君遣吏往問是誰家妹秦氏有好女
自名為羅敷羅敷年幾何二十尚不足十五頗
有餘使君謝羅敷寧可共載不羅敷前致辭使
君一何愚使君自有婦羅敷自有夫解東方千
餘騎夫婿居上頭何用識夫婿白馬從驪駒青
絲繫馬尾黃金絡馬頭腰中鹿盧劍可值千萬

餘十五府小史二十朝大夫三十侍中郎四十
專城居為人潔白皙鬢鬢頗有鬚盈盈公府步
冉冉府中趨坐中數千人皆言夫婿殊解三

東門行

出東門不顧歸來入門悵欲悲盎中無斗儲還
視桁上無懸衣解一拔劍出門去兒女牽衣啼他
家但願富貴賤妾與君共鋪糜解二共鋪糜上用
倉浪天故下為黃口小兒今時清廉難犯教言

君復自愛莫為非解三今時清廉難犯教言君復
自愛莫為非行吾去為遲平慎行望君歸解四

悲歌

悲歌可以當泣遠望可以當歸思念故鄉鬱鬱
纍纍欲歸家無人欲渡河無船心思不能言腸
中車輪轉

古歌

秋風蕭蕭愁殺人出亦愁入亦愁座中何人誰

不懷憂令我白頭胡地多颼風樹木何脩脩離
家日趨遠衣帶日趨緩心思不能言腸中車輪
轉

無名氏

古詩十九首

行行重行行與君生別離相去萬餘里各在天
一涯道路阻且長會面安可知胡馬依北風越
鳥巢南枝相去日已遠衣帶日已緩浮雲蔽白

日游子不顧返思君令人老歲月忽已晚棄捐
勿復道努力加餐飯

青青河畔草鬱鬱園中柳盈盈樓上女皎皎當
窓牖娥娥紅粉妝纖纖出素手昔為倡家女今
為蕩子婦蕩子行不歸空牀難獨守

青青陵上柏磊磊澗中石人生天地間忽如遠
行客斗酒相娛樂聊厚不為薄驅車策駕馬游
戲宛與洛洛中何鬱鬱冠帶自相索長衢羅夾

巷王侯多第宅兩宮遙相望雙闕百餘尺極宴
娛心意戚戚何所迫

今日良宴會歡樂難具陳彈箏奮逸響新聲妙
入神令德唱高言識曲聽其真齊心同所願含
意俱未伸人生寄一世奄忽若颺塵何不策高
足先據要路津無為守窮賤輒軻常若辛

西北有高樓上與浮雲齊交疏結綺窗阿閣三
重階上有絃歌聲音響一何悲誰能為此曲無

乃杞梁妻清商隨風發中曲正徘徊一彈再三
歎慷慨有餘哀不惜歌者苦但傷知音稀願為
雙鳴鶴奮翅起高飛

涉江採芙蓉蘭澤多芳草采之欲遺誰所思在
遠道還顧望舊鄉長路漫漫浩浩同心而離居憂
傷以終老

明月皎夜光促織鳴東壁玉衡指孟冬衆星何
歷歷白露霑野草時節忽復易秋蟬鳴樹間玄

鳥逝安適昔我同門友高舉振六翮不念攜手
好棄我如遺跡南箕北有斗牽牛不負軛良無
磐石固虛名復何益
冉冉孤生竹結根泰山阿與君為新婚兔絲附
女蘿兔絲生有時夫婦會有宜千里遠結婚悠
悠隔山坡思君令人老軒車來何遲傷悲蕙蘭
花含英揚光輝過時而不采將隨秋草萎君亮
執高節賤妾亦何為

庭中有奇樹綠葉發華滋攀條折其榮將以遺
所思馨香盈懷袖路遠莫致之此物何足貴但
感別經時

迢迢牽牛星皎皎河漢女纖纖擢素手札札弄
機杼終日不成章泣涕零如雨河漢清且淺相
去復幾許盈盈一水間脈脈不得語

迴車駕言邁悠悠涉長道四顧何茫茫東風搖
百草所遇無故物焉得不速老盛衰各有時立

身苦不早人生非金石豈能長壽考奄忽隨物
化榮名以為寶

東城高且長逶迤自相屬迴風動地起秋草萋
以綠四時更變化歲暮一何速晨風懷苦心蟋
蟀傷局促蕩滌放情志何為自結束燕趙多佳
人美者顏如玉被服羅裳衣當戶理清曲音響
一何悲絃急知柱促馳情整巾帶沉吟脚躑躅
思為雙飛燕銜泥巢君屋

驅車上東門遙望郭北墓白楊何蕭蕭松柏夾
廣路下有陳死人杳杳即長暮潛寐黃泉下千
載永不寤浩浩陰陽移年命如朝露人生忽如
寄壽無金石固萬歲更相送賢聖莫能度服食
求神仙多為藥所誤不如飲美酒被服紉與素
去者日以疏來者日以親出郭門直視但見邱
與墳古墓犁為田松柏摧為薪白楊多悲風蕭
蕭愁殺人思還故里閭欲歸道無因

生年不滿百十懷千歲憂晝短苦夜長何不秉
燭游為樂當及時何能待來茲愚者愛惜費但
為後世嗤仙人王子喬難可與等期

凜凜歲云暮螻蛄夕鳴悲涼風率已厲游子寒
無衣錦衾遺洛浦同袍與我違獨宿累長夜夢
想見容輝良人惟古歡枉駕惠前綏願得長巧
笑攜手同車歸既來不須臾又不處重闈亮無
晨風翼焉能凌風飛眇睐以適意引領遙相睇

徙倚懷感傷垂涕沾雙扉

孟冬寒氣至北風何慘慄愁多知夜長仰觀衆
星列三五明月滿四五蟾兔缺客從遠方來遺
我一書札上言長相思下言久離別置書懷袖
中三歲字不滅一心抱區區懼君不識察
客從遠方來遺我一端綺相去萬餘里故人心
尚爾文采雙鴛鴦裁為合歡被著以長相思緣
以結不解以膠投漆中誰能別離此

明月何皎皎照我羅床幃憂愁不能寐攬衣起
徘徊客行雖云樂不如早旋歸出戶獨彷徨愁
思當告誰引領還入房淚下沾裳衣

古詩

上山採蘼蕪下山逢故夫長跪問故夫新人復
何如新人雖言好未若故人姝顏色類相似手
爪不相如新人從門入故人從閣去新人工織
縑故人工織素織縑日一匹織素五丈餘將縑

來比素新人不如故

十五從軍征八十始得歸道逢鄉里人家中有
阿誰遙望是君家松柏冢纍纍兔從狗竇入雉
從梁上飛中庭生旅穀井上生旅葵烹穀持作
飯采葵持作羹羹飯一時熟不知貽阿誰出門
東向望淚落沾我衣

步出城東門遙望江南路前日風雪中故人送
此去我欲渡河水河水深無梁願為雙黃鵠高


飛還故鄉

丁令威

歌一首

有鳥有鳥丁令威去家千歲今來歸城郭如故
人民非何不學仙冢纍纍

魏 天籟集目錄之二



武帝

短歌行

觀滄海

龜雖壽

薤露

蒿里行

文帝

燕歌行

陳思王植

箜篌引

野田黃雀行

當牆欲高行

七哀詩

雜詩

七步詩

王粲

七哀詩

陳琳

飲馬長城窟行

劉楨

贈五官中郎將

徐幹

雜詩

阮籍

詠懷

大人先生歌

晉

傅玄

雜言

車遥遥篇

左思

詠史

張協

詠史

郭璞

贈溫嶠

遊仙詩

樂府

卷之四

子夜歌

子夜春歌

桃葉歌

團扇郎歌

孟珠

獨漉篇

休洗紅二章

三峽謠

陶淵明

與殷晉安別并序

歸田園居

移居

庚戌歲九月中於西田穫早稻

飲酒詩并序

擬古

讀山海經

宋

謝靈運

鄰里相送至方山

登江中孤嶼

石壁精舍還湖中作

夜宿石門詩

南樓中望所遲客

東陽溪中贈答二首

鮑照

代東門行

擬行路難

梅花落

贈傅都曹別

陸凱

贈范曄詩

青溪小姑

歌

樂府

讀曲歌

莫愁樂

齊

謝朓

同謝詔議詠銅爵臺

同王主簿有所思

玉階怨

金谷聚

王孫遊

郡內高齋閒望答呂法曹

之宣城郡出新林浦向板橋

王融

巫山高

梁

武帝

逸民

西洲曲

河中之水歌

東飛伯勞歌

沈約

別范安成

江淹

古離別

陶徵君潛田居

休上人怨別

柳惲

江南曲

庾肩吾

詠長信宮中草

何遜

別沈助教

臨行與故遊夜別

相送

陶弘景

詔問山中何所有賦詩以答

衛敬瑜妻王氏

孤燕詩

無名氏

木蘭詩

陳

徐陵

關山月

北齊

斛律金

敕勒歌

北周

庾信

寄徐陵

寄王琳

和庾四

和侃法師三絕

重別周尚書

隋

楊素

山齋獨坐贈薛內史

薛道衡

昔昔鹽

敬酬楊僕射山齋獨坐

人日思歸

無名氏

送別詩

樂府

雞鳴歌

陽春曲

夜夜曲

天籟集

魏

武帝

短歌行

對酒當歌人生幾何譬如朝露去日苦多慨當
以慷憂思難忘何以解憂惟有杜康青青子衿
悠悠我心但為君故沈吟至今呦呦鹿鳴食野
之苹我有嘉賓鼓瑟吹笙明明如月何時可掇

憂從中來不可斷絕越陌度阡枉用相存契濶
談讌心念舊恩月明星稀烏鵲南飛繞樹三匝
何枝可依山不厭高海不厭深周公吐哺天下
歸心

觀滄海

東臨碣石以觀滄海水何澹澹山島竦峙樹木
叢生百草豐茂秋風蕭瑟洪波湧起日月之行
若出其中星漢燦爛若出其裏幸甚至哉歌以

詠志

龜雖壽

神龜雖壽猶有竟時騰蛇乘霧終為土灰老驥
伏櫪志在千里烈士暮年壯心不已盈縮之期
不但在天養怡之福可得永年幸甚至哉歌以
詠志

薤露

惟漢二十世所任誠不良沐猴而冠帶知小而

謀彊猶豫不敢斷因狩執君王白虹為貫日已
亦先受殃賊臣執國柄殺主滅宇京蕩覆帝基
業宗廟以燔喪播越西遷移號泣而且行瞻彼
洛城郭微子為哀傷

萬里行

關東有義士興兵討羣凶初期會盟津乃心在
咸陽軍合力不齊躊躇而雁行勢利使人爭嗣
還自相戕淮南弟稱號刻璽於北方鎧甲生蟻

蟲萬姓以死亾白骨露於野千里無雞鳴生民
百遺一念之斷人腸

文帝

燕歌行

秋風蕭瑟天氣涼草木搖落露為霜羣燕辭歸
雁南翔念君客遊思斷腸慊慊思歸戀故鄉君
何淹留寄他方賤妾莞莞守空房憂來思君不
敢忘不覺淚下沾衣裳援琴鳴絃發清商短歌

微吟不能長明月皎皎照我床星漢西流夜未央
牽牛織女遙相望爾獨何辜限河梁

陳思王植

筵篴引

置酒高殿上親友從我游中厨辦豐膳烹羊宰
肥牛秦箏何慷慨齊瑟和且柔陽阿奏竒舞京
洛出名謳樂飲過三爵緩帶傾庶羞主稱千金
壽賓奉萬年酬久要不可忘薄終義所尤謙謙

君子德馨折欲何求驚風飄白日光景馳西流
盛時不可再百年忽我適生存華屋處零落歸
山邱先民誰不死知命復何憂

野田黃雀行

高樹多悲風海水揚其波利劍不在掌結友何
須多不見籬間雀見鷄自投羅羅家得雀喜少
年見雀悲拔劍捎羅網黃雀得飛飛飛摩蒼
天來下謝少年

當墻欲高行

龍欲升天須浮雲人之仕進待中人衆口可以
鑠金讒言三至慈母不親憤憤俗間不辯偽真
願欲披心自說陳君門以九重道遠河無津

七哀詩

明月照高樓流光正徘徊上有愁思婦悲歎有
餘哀借問歎者誰言是宕子妻君行踰十年孤
妾常獨棲君若清路塵妾若濁水泥浮沈各異

勢會合何時諧願為西南風長逝入君懷君懷
良不開賤妾當何依

雜詩

高臺多悲風朝日照北林之子在萬里江湖迴
且深方舟安可極離思故難任孤雁飛南游過
庭長哀吟翹思慕遠人願欲託遺音形影忽不
見翩翩傷我心

七步詩

煮豆然豆其豆在釜中泣本是同根生相煎何太急

王粲

七哀詩

西京亂無象豺虎方遘患復棄中國去委身適荆蠻親戚對我悲朋友相追攀出門無所見白骨蔽平原路有饑婦人抱子棄草間顧聞號泣聲揮涕獨不還未知身死處何能兩相完驅馬

棄之去不忍聽此言南登霸陵岸回首望長安
悟彼下泉人喟然傷心肝

陳琳

飲馬長城窟行

飲馬長城窟水寒傷馬骨往謂長城吏慎莫稽
留太原卒官作自有程舉築諧汝聲男兒寧當
格鬪死何能怫鬱築長城長城何連連連連三
千里邊城多健少內舍多寡婦作書與內舍使

嫁莫畱住善侍新姑嫜時時念我故夫子報書
往邊地君今出語一何鄙身在禍難中何為稽
畱他家子生男慎莫舉生女哺用脯君獨不見
長城下死人骸骨相撐柱結髮行事君慊慊心
意間明知邊地苦賤妾何能久自全

劉楨

贈五官中郎將

余嬰沈痼疾竄身清漳濱自夏涉玄冬彌曠十

餘旬常恐遊岱宗不復見故人所親一何薦步
趾慰我身清談同日夕情盼叙憂勤便復為別
辭遊車歸西鄰素葉隨風起廣路揚埃塵逝者
如流水哀此遂離分追問何時會要我以陽春
望慕結不解貽爾新詩文勉哉修令德北面自
寵珍

徐幹

雜詩

浮雲何洋洋願因通我詞飄飄不可寄徒倚徒
相思人離皆復會君獨無返期自君之出矣明
鏡暗不治思君如流水何有窮已時

阮籍

詠懷

灼灼西墮日餘光照我衣迴風吹四壁寒鳥相
因依周周尚銜羽蛩蛩亦念饑如何當路子磬
折忘所歸豈為夸譽名憔悴使心悲寧與燕雀

翔不隨黃鵠飛黃鵠遊四海中路將安歸

湛湛長江水上有楓樹林皋蘭被徑路青驪逝
駸駸遠望令人悲春氣感我心三楚多秀士朝
雲進荒淫朱華振芬芳高蔡相追尋一為黃雀
哀涕下誰能禁

徘徊蓬池上還顧望大梁綠水揚洪波曠野莽
茫茫走獸交橫馳飛鳥相隨翔是時鷄火中日
月正相望朔風厲嚴寒陰氣下微霜羈旅無儔

匹俯仰懷哀傷小人計其功君子道其常豈惜
終憔悴詠言著斯章

獨坐空堂上誰可與歡者出門臨永路不見行
車馬登高望九州悠悠兮曠野孤鳥西北飛離
獸東南下日暮思親友晤言用自寫

大人先生歌

天地解兮六合開星辰隕兮日月頽我騰而上
將何懷

晉

傅玄

雜言

雷隱隱感妾心傾耳清聽非車音

車遥遥篇

車遥遥兮馬洋洋追思君兮不可忘君安遊兮
西入秦願為影兮隨君身君在陰兮影不見君
依光兮妾所願

左思

詠史

皓天舒白日靈景耀神州
列宅紫宮裏飛宇若
雲浮峨峨高門內藹藹皆王侯
自非攀龍客何
為歟來遊被褐出閭闔高步追許由
振衣千仞
岡濯足萬里流

張協

詠史

昔在西京時朝野多歡娛
藹藹東都門羣公祖
二疎朱軒曜金城供帳臨長衢
達人知止足遺
榮忽如無抽簪解朝衣
散髮歸海隅行人為隕
涕賢哉此大夫揮金樂當年
歲暮不留儲顧謂
四座賓多財為累愚清風激萬代
名與天壤俱
吐此蟬冤客君紳宜見書

郭璞

贈溫嶠

人亦有言松竹有林及爾臭味異苔同岑言以
忘得交以淡成匪同伊和惟我與生爾神余契
我懷子情攜手一豁安知塵冥

遊仙詩

青溪千餘仞中有一道士雲生梁棟間風出窓
戶裏借問此何誰云是鬼谷子翹迹企潁陽臨
河思洗耳閭闔西南來潛波渙鱗起靈妃顧我
笑策然啓玉齒蹇修時不存要之將誰使

雜縣寓魯門風暖將為災吞舟涌海底高浪駕
蓬萊神仙排雲出但見金銀臺陵陽挹丹溜容
成揮玉杯姮娥揚妙音洪崖領其頤升降隨長
烟飄飄戲九垓竒齡邁五龍千歲方嬰孩燕昭
無靈氣漢武非仙才

樂府

子夜歌

擘裙未結帶約眉出前窓羅裳易飄颻小開罵

春風

子夜春歌

春林花多媚春鳥意多哀
春風復多情吹我羅裳開

桃葉歌

桃葉復桃葉渡江不用楫
但渡無所苦我自來迎接

團扇郎歌

團扇復團扇持許自障面
憔悴無復理羞與郎相見

孟珠

陽春二三月草與水同色
攀條摘香花言是歡氣息

獨漉篇

獨漉獨漉水深泥濁泥濁
尚可水深殺我雍雍雙雁
游戲田畔我欲射雁念子
孤散翩翩浮萍

得風搖輕我心何合與之同并空林低帷誰知
無人夜衣錦繡誰別偽真刀鳴削中倚林無施
父冤不報欲活何為猛虎斑斑游戲山間虎欲
齧人不避豪賢

休洗紅二章

休洗紅洗多紅色淡不惜故縫衣記得初按齒
人壽百年能幾何後來新婦今為婆
休洗紅洗多紅在水新紅裁作衣舊紅番作裏

迴黃轉綠無定期世事返復君所知

三峽謠

朝見黃牛暮見黃牛三朝三暮黃牛如故

陶淵明

與殷晉安別并序

殷先作晉安南府長史掾因居潯陽後
作太尉參軍移家東下作此以贈

游好非久長一遇盡殷勤信宿酬清話益復知

為親去歲家南里薄作少時鄰負杖肆游從淹
留忘宵晨語默自殊勢亦知當乖分未謂事已
及興言在茲春飄飄西來風悠悠東去雲山川
千里外言笑難為因良才不隱世江湖多賤貧
脫有經過便念來存故人

歸田園居

少無適俗韻性本愛邱山誤落塵網中一去三
十年羈鳥戀舊林池魚思故淵開荒南野際守

拙歸園田方宅十餘畝草屋八九間榆柳蔭後
檐桃李羅堂前曖曖遠人村依依墟里烟狗吠
深巷中雞鳴桑樹巔戶庭無塵雜虛室有餘閒
久在樊籠裏復得返自然

移居二首

昔欲居南村非為卜其宅聞多素心人樂與數
晨夕懷此頗有年今日從茲役樊廬何必廣取
足蔽牀席鄰曲時時來抗言談在昔奇文共欣

賞疑義相與析

春秋多佳日登高賦新詩過門更相呼有酒斟酌之農務各自歸間暇輒相思相思則披衣言笑無厭時此理當不勝無為忽去茲衣食當須紀力耕不吾欺

庚戌歲九月中於西田獲早稻

人生歸有道衣食固其端孰是都不營而以求自安開春理常業歲功聊可觀晨出肆微勤日

入負耒還山中饒霜露風氣亦先寒田家豈不苦弗獲辭此難四體誠乃疲庶無異患干盥濯息檐下斗酒散襟顏遙遙沮溺心千載乃相關但願長如此躬耕非所歎

飲酒詩并序

余閒居宜歡兼比夜已長偶有名酒無夕不飲顧影獨盡忽焉復醉既醉之後輒題數句自娛紙墨遂多辭無詮次聊

命故人書之以為歡笑爾

衰榮無定在彼此更共之邵生瓜田中寧似東
陵時寒暑有代謝人道每如茲達人解其會逝
將不復疑忽與一觴酒日夕歡自持
結廬在人境而無車馬喧問君何能爾心遠地
自偏采菊東籬下悠然見南山山氣日夕佳飛
鳥相與還此中有真意欲辨已忘言
子雲性嗜酒家貧無由得時賴好事人載醪祛

所惑觴來為之盡是謔無不塞有時不肯言豈
不在伐國仁者用其心何嘗失顯默

羲農去我久舉世少復真汲汲魯中叟彌縫使
其鴻鳳鳥雖不至禮樂暫得新洙泗輟微響漂
流逮狂秦詩書復何罪一朝成灰塵區區諸老
翁為事誠殷勤如何絕世下六籍無一親終日
馳車走不見所問津若復不快飲空負頭上巾
但恨多謬誤君當恕醉人

擬古

仲春邁時雨始雷發東隅衆蟄各潛駭草木縱
橫舒翩翩新來燕雙雙入我廬先巢故尚在相
將還舊居自從分別來門庭日荒蕪我心固非
石君情定何如

迢迢百尺樓分明望四荒暮作歸雲宅朝為飛
鳥堂山河滿目中平原獨茫茫古時功名士慷
慨爭此場一旦百歲後相與還北邙松柏為人

伐高墳互低昂頽基無遺主遊魂在何方榮華
誠足貴亦復可憐傷

日暮天無雲春風扇微和佳人美清夜達曙酣
且歌歌竟長歎息持此感人多皎皎雲間月灼
灼葉中花豈無一時好不久當如何
種桑長江邊三年望當採枝條始欲茂忽值山
河改柯葉自摧折根株浮滄海春蠶既無食寒
衣欲誰待本不植高原今日復何悔

讀山海經

孟夏草木長繞屋樹扶疎衆鳥欣有託吾亦愛
吾廬既耕亦已種時還讀我書窮巷隔深轍頗
迴故人車歡言酌春酒摘我園中蔬微雨從東
來好風與之俱汎覽周王傳流觀山海圖俯仰
終宇宙不樂復何如

宋

謝靈運

鄰里相送至方山

祇役出皇邑相期憩甌越解纜及流潮懷舊不
能發析析就哀林皎皎明秋月含情易為盈遇
物難可歇積疴謝生慮寘愆罕所闕資此永幽
棲豈伊年歲別各勉日新志音塵慰寂蔑

登江中孤嶼

江南倦歷覽江北曠周旋懷新道轉迴尋異景
不延亂流趨正絕孤嶼媚中川雲日相輝映空

水共澄鮮表靈物莫賞蘊真誰為傳想像崑山
姿緬邈區中緣始信安期術得盡養生年

石壁精舍還湖中作

昏旦變氣候山水含清暉清暉能娛人遊子憺
忘歸出谷日尚早入舟陽已微林壑歛暝色雲
霞收夕霏芰荷迭映蔚蒲稗相因依披拂趨南
逕愉悅偃東扉憲澹物自輕意愜理無違寄言
攝生客試用此道推

夜宿石門詩

朝搴苑中蘭畏彼霜下歇暝還雲際宿弄此石
上月鳥鳴識夜棲木落知風發異音同至聽殊
響俱清越妙物莫為賞芳醕誰與伐美人竟不
來陽阿徒晞髮

南樓中望所遲客

杳杳日西頽漫漫長路迫登樓為誰思臨江遲
來客與我別所期期在三五夕圓景早已滿佳

人殊未適即事怨睽攜感物方悽戚孟夏非長
夜晦明如歲隔瑤華未堪折蘭若已屢摘路阻
莫贈問云何慰離析搔首訪行人引領冀良覲

東陽溪中贈荅二首

可憐誰家婦緣流洒素足明月在雲間迢迢不
可得

可憐誰家郎緣流乘素舸但問情若為月就雲
中墮

鮑照

代東門行

傷禽惡弦驚倦客惡離聲離聲斷客情宿御皆
涕零涕零心斷絕將去復還訣一息不相知何
况異鄉別遙遙征駕遠杳杳白日晚居人掩閨
卧行子夜中飯野風吹草木行子心腸斷食梅
常苦酸衣葛常苦寒絲竹徒滿座憂人不解顏
長歌欲自慰彌起長恨端

擬行路難

瀉水置平地各自東西南北流人生亦有命安
能行歎復坐愁酌酒以自寬舉杯斷絕歌路難
心非木石豈無感吞聲躑躅不敢言
中庭五株桃一株先作花陽春妖冶二三月從
風簸蕩落西家西家思婦見悲惋零淚霑衣撫
心歎初送我君出戶時何言淹留節迴換牀席
生塵明鏡垢纖腰瘦削髮蓬亂人生不得恒稱

意惆悵從倚至夜半

剗髮染黃絲黃絲歷亂不可治我昔與君始相
值爾時自謂可君意結帶與君言死生好惡不
相置今日見我顏色衰意中索寞與先異還君
金釵玳瑁簪不思見之益愁思

梅花落

中庭雜樹多偏為梅咨嗟問君何獨然念其霜
中能作花露中能作實搖蕩春風媚春日念爾

零落逐寒風徒有霜華無霜質

贈傅都曹別

輕鴻戲江潭孤雁集洲汜邂逅兩相親緣念共
無已風雨好東西一隔頓萬里追憶栖宿時聲
容滿心耳落日川渚寒愁雲繞天起短翮不能
翔徘徊烟霧裏

陸凱

贈范曄詩

折花逢驛使寄與隴頭人江南無所有聊贈一
枝春

青溪小姑

歌

日暮風吹葉落依枝丹心寸意愁君未知

樂府

讀曲歌

暫出白門前楊柳可藏烏歡作沉水香儂作博

山鑪

莫愁樂

莫愁在何處莫愁石城西
艇子打兩槳催送莫愁來

齊

謝朓

同謝諮議詠銅爵臺

總惟飄井榦樽酒若平生
鬱鬱西陵樹詎聞歌

吹聲芳襟染淚迹
嬋娟空復情
玉座猶寂寞
况乃妾身輕

同王主簿有所思

佳期期未歸
望望下鳴機
徘徊東陌上
月出人稀

玉階怨

夕殿下珠簾
流螢飛復息
長夜縫羅衣
思君此何極

金谷聚

渠碗送佳人玉杯邀上客車馬一東西別後思
今夕

王孫遊

綠草蔓如絲雜樹紅英發無論君不歸君歸芳
已歇

郡內高齋閒望答呂法曹

結構何迢遞曠望極高深窓中列遠岫庭際俯

喬林日出衆鳥散山暝孤猿吟已有池上酌復
此風中琴非君美無度孰為勞寸心惠而能好
我問以瑤華音若遺金門步見就玉山岑

之宣城郡出新林浦向板橋

江路西南永歸流東北驚天際識歸舟雲中辨
江樹旅思倦搖搖孤遊昔已屢既歡懷祿情復
協滄洲翹囂塵自茲隔賞心於此過雖無玄豹
姿終隱南山霧

王融

巫山高

想像巫山高薄暮陽臺曲烟雲乍舒卷猿鳥時
斷續彼美如可期寤言紛在矚憮然坐相思秋
風下庭綠

梁

武帝

逸民

如壑生木木有異心如林鳴鳥鳥有殊音如江
游魚魚有浮沉巖巖山高湛湛水深事迹易見
理相難尋

西洲曲

憶梅下西洲折梅寄江北單衫杏子黃雙鬢鴟
雛色西洲在何處兩漿橋頭渡日暮伯勞飛風
吹烏臼樹樹下即門前門中露翠鈿開門郎不
至出門采紅蓮采蓮南塘秋蓮花過人頭低頭

弄蓮子蓮子清如水置蓮懷袖中蓮心徹底紅
憶郎郎不至仰首望飛鴻飛鴻滿西洲望郎上
青樓樓高望不見盡日闌干頭闌干十二曲垂
手明如玉卷簾天自高海水搖空綠海水夢悠
悠君愁我亦愁南風知我意吹夢到西洲

河中之水歌

河中之水向東流洛陽女兒名莫愁莫愁十三
能織綺十四采桑南陌頭十五嫁為盧家婦十

六生兒字阿侯盧家蘭室桂為梁中有鬱金蘇
合香頭上金釵十二行足下絲履五文章珊瑚
挂鏡爛生光平頭奴子擊履箱人生富貴何所
望恨不早嫁東家王

東飛伯勞歌

東飛伯勞西飛燕黃姑織女時相見誰家兒女
對門居開顏發艷照里閭南窓北牖挂明光羅
幃綺帳脂粉香女兒年紀十五六窈窕無雙顏

如玉三春已暮花從風空留可憐誰與同

沈約

別范安成

生平少年日分手易前期及爾同衰暮非復別
離時勿言一樽酒明日難重持夢中不識路何
以慰相思

江淹

古離別

遠與君別者乃至雁門關黃雲蔽千里遊子何
時還送君如昨日檐前露已團不惜蕙草晚所
悲道里寒君在天一涯妾身長別離願一見顏
色不異瓊樹枝兔絲及水萍所寄終不移

陶徵君潛田居

種苗在東皋苗生滿阡陌雖有荷鋤倦濁酒聊
自適日暮中柴車路闇光已夕歸人望烟火稚
子候簷隙問君亦何為百年會有役但願桑麻

成蠶月得紡績素心正如此開遙望三益

休上人怨別

西北秋風至楚客心悠哉日暮碧雲合佳人殊
未來露彩方泛艷月華始徘徊寶書為君掩瑤
瑟詎能開相思巫山渚悵望陽雲臺膏鑪絕沈
燎綺席生浮埃桂水日千里因之平生懷

柳惲

江南曲

汀洲采白蘋日暖江南春洞庭有歸客瀟湘逢
故人故人何不返春花復應晚不道新知樂祇
言行路遠

庾肩吾

詠長信宮中草

委翠似知節含芳如有情全由履迹少併欲上
階生

何遜

別沈助教

可憐玉匣劍復此飛鳧鳥未覺愛生憎忽見雙
成隻一朝別笑語萬事成疇昔道適若波瀾人
生異金石願君深自愛共念悲無益

臨行與故遊夜別

歷稔共追隨一旦辭羣匹復如東注水未有西
歸日夜雨滴空階曉燈暗離室相悲各罷酒何
時同促膝

相送

客心已百念孤遊重千里江暗雨欲來浪白風
初起

陶弘景

詔問山中何所有賦詩以答

山中何所有嶺上多白雲只可自怡悅不堪持
寄君

衛敬瑜妻王氏

孤燕詩

昔年無偶去今春猶獨歸故人思義重不忍復
雙飛

無名氏

木蘭詩

唧唧復唧唧木蘭當戶織不聞機杼聲惟聞女
歎息問女何所思問女何所憶女亦無所思女
亦無所憶昨夜見軍帖可汗大點兵軍書十二

卷卷有爺名阿爺無大兒木蘭無長兄願為
市鞍馬從此替爺征東市買駿馬西市買鞍韉
南市買轡頭北市買長鞭朝辭爺孃去暮宿黃
河邊不聞爺孃喚女聲但聞黃河流水鳴濺濺
旦辭黃河去暮至黑山頭不聞爺孃喚女聲但
聞燕山胡騎鳴啾啾萬里赴戎機關山度若飛
朔氣傳金柝寒光照鐵衣將軍百戰死壯士十
年歸歸來見天子天子坐明堂策勳十二轉賞

賜百千疆可汗問所欲木蘭不用尚書郎願借
明駝千里足送兒還故鄉爺孃聞女來出郭相
扶將阿姊聞妹來當戶理紅妝小弟聞姊來磨
刀霍霍向豬羊開我東閣門坐我西間床脫我
戰時袍著我舊時裳當窓理雲髻對鏡帖花黃
出門看火伴火伴始驚惶同行十二年不知木
蘭是女郎雄兔脚撲朔雌兔眼迷離雙兔傍地
走安能辨我是雄雌

陳

徐陵

關山月

關山三五夜客子憶秦川思婦高樓上當窓應
未眠星旗映疏勒雲陣上祁連戰氣今如此從
軍復幾年

北齊

斛律金

敕勒歌

敕勒川陰山下天似穹廬籠蓋四野天蒼蒼野
茫茫風吹草低見牛羊

北周

庾信

寄徐陵

故人儻思我及此平生時莫待山陽路空聞吹
笛悲

寄王琳

玉關道路遠金陵信使疏獨下千行淚開君萬
里書

和庾四

離關一長望別恨幾重愁無妨對春日懷抱只
言秋

和侃法師三絕

秦關望楚路灞岸想江潭幾人應落淚看君馬

向南

客遊經歲月羈旅故情多
近學衡陽雁秋分俱
渡河

回首河堤望春春歎離絕
誰言舊國人到在他
鄉別

重別周尚書

陽關萬里道不見一人歸
唯有河邊雁秋來南
向飛

隋

楊素

山齋獨坐贈薛內史

居山四望阻風雲
竟朝夕深溪橫古樹
空巖卧幽石日出遠
岫明鳥散空林寂
蘭庭動幽氣竹室
生虛白落花入戶
飛細草當階積
桂酒徒盈樽
故人在席日暮
山之幽臨風望
羽客

薛道衡

昔昔鹽

垂柳覆金堤
靡蕪葉復齊
水溢芙蓉沼
花飛桃李蹊
采桑秦氏女
織錦賈家妻
關山別蕩子
風月守空閨
恒歛千金笑
長垂雙玉啼
盤龍隨鏡隱
彩鳳逐帷低
飛魂同夜鵲
倦寢憶晨雞
暗牖懸蛛網
空梁落燕泥
前年過代北
今歲往遼西
一去無消息
那能惜馬蹄

敬酬楊僕射山齋獨坐

相望山河近
相思朝夕勞
龍門竹箭急
華岳蓮花高
岳高嶂重疊
鳥道風烟接
遙原樹若薺
遠水舟如葉
葉舟旦旦浮
驚波夜夜流
露寒洲渚白
月冷函關秋
秋夜清風發
彈琴即鑑月
雖非莊鳥歌
吟咏常思越

人日思歸

入春纔七日
離家已二年
人歸落雁後
思發在花前

無名氏

送別詩

楊柳青青著地垂
楊花漫漫攪天飛
柳條折盡
花飛盡借問行人歸不歸

樂府

雞鳴歌

東方欲明星爛爛
汝南晨雞登壇喚
曲終漏盡
嚴具陳月沒星稀
天下旦千門萬戶
遞魚鑰宮

中城上飛烏鵲

陽春曲

茱萸生前逢含桃
落小園春心自搖蕩
百舌更多言

夜夜曲

愁人夜獨傷滅燭
卧蘭房祇恐多情月
旋來照妾牀

天籟集目錄之三

唐

玄宗皇帝

經魯祭孔子而歎之

王績

野望

魏徵

述懷



王勃

滕王閣

喬知之

綠珠篇

陳子昂

感遇

登幽州臺歌

杜審言

和晉陵陸丞早春遊望
贈蘇書記

劉希夷

代悲白頭翁

沈佺期

雜詩

古意

宋之問

別之望後獨宿藍田山莊

題大庾嶺北驛

張九齡

感遇

望月懷遠

張說

鄴都引

王翰

涼州曲

賀知章

回鄉偶書

王灣

次北固山下

劉昫

暮秋揚子江寄孟浩然

關題

崔顥

黃鶴樓

長干行

張若虛

春江花月夜

崔國輔

怨詞

王維

藍田山石門精舍

青溪

齊州送祖三

贈祖三詠

西施詠

桃源行

同崔傅答賢弟

酬張少府

輞川閒居贈裴秀才迪

山居秋暝

終南山

終南別業

積雨輞川莊作

送楊少府貶郴州

鹿柴

竹里館

山中送別

雜詠

相思子

送元二使安西

九月九日憶山東兄弟

送沈子歸江東

寒食汜上作

孟浩然

宿來公山房期丁火不至

夏日南亭懷辛大

晚泊潯陽望香鑪峰

夜歸鹿門歌

臨洞庭上張丞相

與諸子登峴山

過故人莊

早寒江上有懷

春曉

裴迪

送崔九

王之渙

登鶴雀樓

涼州詞

賈至

巴陵與李十二裴九汎洞庭

張旭

桃花溪

王昌齡

芙蓉樓送辛漸

春宮曲

長信秋詞

西宮春怨

出塞

閨怨

李頎

古意

古從軍行

送魏萬之京

常建

送李十一尉臨溪

破山寺後禪院

三日尋李九莊

高適

人日寄杜二拾遺

送鄭侍御謫閩中

送前衛縣李察少府

送李少府貶峽中王少府貶長沙

夜別韋司士

岑參

白雪歌送武判官歸

送張子尉南海

寄左省杜拾遺

磧中作

逢入京使

殷遙

送友人下第歸省

祖詠

終南望餘雪

張潮

江南行

陶峴

西塞山下迴舟作

李白

古風

關山月

下終南山過斛斯山宿置酒

月下獨酌

長干行

春思

子夜秋歌

贈盧司戶

望終南山寄紫閣隱者

遠別離

烏夜啼

將進酒

長相思

楊叛兒

江上吟

侍從宜春苑奉詔賦龍池柳色初青聽新

鶯百轉歌

夢遊天姥吟留別

金陵酒肆留別

贈孟浩然

渡荆門送別

送友人

送友人入蜀

秋登宣城謝朓北樓

夜泊牛渚懷古

登金陵鳳凰臺

玉階怨

靜夜思

獨坐敬亭山

勞勞亭

怨情

清平調

聞王昌齡左遷龍標遙有此寄

黃鶴樓送孟浩然之廣陵

送賀賓客歸越

與賈舍人汎洞庭

早發白帝城

舟下荆門

蘇臺覽古

越中懷古

橫江詞

山中答俗人

天籟集

唐

玄宗皇帝

經魯祭孔子而歎之

夫子何為者
栖栖一代中
地猶鄆氏邑
宅即魯王宮
歎鳳嗟身否
傷麟怨道窮
今看兩楹奠
當與夢時同

王績

野望

東皋薄暮望徒倚欲何依
樹樹皆秋色山山唯落暉
牧人驅犢返獵馬帶禽歸
相顧無相識長歌懷采薇

魏徵

述懷

中原還逐鹿投筆事戎軒
縱橫計不就慷慨志猶存
杖策謁天子驅馬出關門
請纓繫南粵憑

軾下東藩鬱紆陟高岫
出沒望平原古木鳴寒
鳥空山啼夜猿既傷千里日
還驚九折魂豈不憚艱險
深懷國士恩李布無二諾
侯嬴重一言人生感意氣
功名誰復論

王勃

滕王閣

滕王高閣臨江渚珮玉鳴鑿罷
歌舞畫棟朝飛南浦雲珠簾暮捲
西山雨閒雲潭影日悠悠物

換星移幾度秋閣中帝子今何在檻外長江空
自流

喬知之

綠珠篇

石家金谷重新聲明珠十斛買娉婷此日可憐
君自許此時可喜得人情君家閨閣不曾難常
將歌舞借人看意氣雄豪非分理驕矜勢力橫
相干辭君去君終不忍徒勞掩袂傷鉛粉百年

離別在高樓一代紅顏為君盡

陳子昂

感遇

蘭若生春夏芊蔚何青青幽獨空林色朱蕤冒
紫莖遲遲白日晚嫋嫋秋風生歲華盡搖落芳
意竟何成

臨歧泣世道天命良悠悠昔日殷王子玉馬遂
朝周寶鼎淪伊穀瑤臺成古丘西山傷遺老東

陵有故侯

吾觀龍變化乃知至陽精石林何冥密幽洞無
留行古之得仙道信與元化并玄感非象識誰
能測沉冥世人拘目見酣酒笑丹經崑崙有瑤
樹安得采其英

翡翠巢南海雄雌珠樹林何知美人意驕愛比
黃金殺身炎洲裏委羽玉堂陰旖旎光首飾歲
蕤爛錦衾豈不在遐遠虞羅忽見尋多材信為

累歎息此珍禽

登幽州臺歌

前不見古人後不見來者念天地之悠悠獨愴
然而涕下

杜審言

和晉陵陸丞早春遊望

獨有宦遊人偏驚物候新雲霞出海曙梅柳渡
江春淑氣催黃鳥晴光轉綠蘋忽聞歌古調歸

思欲沾巾

贈蘇書記

知君書記本翩翩為許從戎赴朔邊紅粉樓中
應計日燕支山下莫經年

劉希夷

代悲白頭翁

洛陽城東桃李花飛來飛去落誰家幽閨兒女
惜顏色坐見落花長歎息今年花落顏色改明

年花開復誰在已見松柏摧為薪更聞桑田變
成海古人無復洛城東今人還對落花風年年
歲歲花相似歲歲年年人不同寄言全盛紅顏
子須憐半死白頭翁此翁白頭真可憐伊昔紅
顏美少年公子王孫芳樹下清歌妙舞落花前
光祿池臺文錦繡將軍樓閣畫神仙一朝卧病
無相識三春行樂在誰邊宛轉蛾眉能幾時須
臆鶴髮亂如絲但看古來歌舞地惟有黃昏鳥

崔悲

沈佺期

雜詩

聞道黃龍戍頻年不解兵
可憐閨裏月長在漢家營
少婦今春意良人昨夜情
誰能將旗鼓一為取龍城

古意

盧家少婦鬱金香
海燕雙棲玳瑁梁
九月寒砧

催木葉十年征戍憶遼陽
白狼河北音書斷丹鳳城南秋夜長
誰為含愁獨不見更教明月照流黃

宋之問

別之望後獨宿藍田山莊

脊令有舊曲調苦不成歌
自嘆兄弟少常嗟離別多
爾尋北京路予卧南山阿
泉晚更幽咽雲秋尚嵯峨
藥欄聽蟬噪書幌見禽過
愁至願甘

寢其如鄉夢何

題大庾嶺北驛

陽月南飛雁傳聞至此回
我行殊未已何日復
歸來江靜潮初落林昏瘴不開
明朝望鄉處應見隴頭梅

張九齡

感遇

蘭葉春葳蕤桂華秋皎潔
欣欣此生意自爾為

佳節誰知林棲者聞風坐相悅
草木有本心何求美人折

魚游樂深池鳥棲欲高枝
嗟爾蜉蝣羽薨薨亦何為
有生豈不化所感奚若斯
神理日微滅吾心安得知
浩歎楊朱子徒然泣路岐
孤鴻海上来池潢不敢顧
側見雙翠鳥巢在三珠樹
矯矯珍木巔得無金丸懼
美服患人指高明逼神惡
今我游冥冥弋者何所慕

江南有丹橘經冬猶綠林豈伊地氣暖自有歲
寒心可以薦嘉客奈何阻重深運命惟所遇循
環不可尋徒言樹桃李此木豈無陰
漢上有游女求思安可得袖中一書札欲寄雙
飛翼冥冥愁不見耿耿徒緘憶紫蘭秀空蹊皓
露奪幽色馨香歲欲晚感歎情何極白雲在南
山日暮長息

望月懷遠

海上生明月天涯共此時情人怨遙夜竟夕起
相思滅燭憐光滿披衣覺露滋不堪盈手贈還
寢夢佳期

張說

鄴都引

君不見魏武草創爭天祿羣雄睚眦相馳逐晝
攜壯士破堅陣夜接詞人賦華屋都邑繚繞西
山陽桑榆漫漫漳河曲城郭為墟人代改但見

西園明月在鄴傍高塚多貴臣蛾眉曼睩共灰
塵試上銅臺歌舞處唯有秋風愁殺人

王翰

涼州曲

蒲萄美酒夜光杯欲飲琵琶馬上催醉卧沙場
君莫笑古來征戰幾人回

賀知章

回鄉偶書

少小離家老大回鄉音無改鬢毛衰兒童相見
不相識笑問客從何處來

王灣

次北固山下

客路青山下行舟綠水前潮平兩岸濶風正一
帆懸海日生殘夜江春入舊年鄉書何處達歸
雁落陽邊

劉春虛

暮秋揚子江寄孟浩然

木葉紛紛下東南日烟霜林山相晚暮天海空
青蒼暝色况復久秋聲亦何長孤舟兼微月獨
夜仍越鄉寒笛對京口故人在襄陽詠思勞今
夕江漢遙相望

闕題

道由白雲盡春與青溪長時有落花至遠隨流
水香閑門向山路深柳讀書堂幽映每白日清

輝照衣裳

崔顥

黃鶴樓

昔人已乘黃鶴去此地空餘黃鶴樓黃鶴一去
不復返白雲千載空悠悠晴川歷歷漢陽樹芳
草萋萋鸚鵡洲日暮鄉關何處是烟波江上使
人愁

長干行

君家何處住妾住在橫塘停船暫借問或恐是
同鄉

家臨九江水來去九江側同是長干人生小不
相識

張若虛

春江花月夜

春江潮水連海平海上明月共潮生滌滌隨波
千萬里何處春江無月明江流宛轉繞芳甸月

照花林皆似霰空裏流霜不覺飛汀上白沙看
不見江天一色無纖塵皎皎空中孤月輪江畔
何人初見月江月何年初照人人生代代無窮
已江月年年祇相似不知江月待何人但見長
江送流水白雲一片去悠悠青楓浦上不勝愁
誰家今夜扁舟子何處相思明月樓可憐樓上
月徘徊應照離人妝鏡臺玉戶簾中卷不去擣
衣砧上拂還來此時相望不相聞願逐月華流

照君鴻雁長飛光不度魚龍潛躍水成文昨夜
閑潭夢落花可憐春半不還家江水流春去欲
盡江潭落月復西斜斜月沉沉藏海霧碣石瀟
湘無限路不知乘月幾人歸落月搖情滿江樹

崔國輔

怨詞

妾有羅衣裳秦王在時作為舞春風多秋來不
堪著

王維

藍田山石門精舍

落日山水好漾舟信歸風玩竒不覺遠因以緣
源窮遙愛雲木秀初疑路不同安知清流轉偶
與前山通捨舟理輕策果然愜所適老僧四五
人逍遙蔭松柏朝梵林未曙夜禪山更寂道心
及牧童世事問樵客暝宿長林下焚香卧瑤席
澗芳襲人衣山月映石壁再尋畏迷誤明發更

登歷笑謝桃源人
花紅復來覲

青溪

言入黃花川
每逐青溪水
隨山將萬轉
趨途無百里
聲喧亂石中
色靜深松裏
漾漾泛菱荇
澄澄映葭葦
我心素已閒
清川澹如此
請留盤石上
垂釣將已矣

齊州送祖三

相逢方一笑
相送還成泣
祖帳已傷離
荒城復

愁入天寒遠
山淨日暮長
河急解纜君
已遙望君
猶伫立

贈祖三詠
濟州官舍作

蠨蛸挂虛牖
蟋蟀鳴前除
歲晏涼風至
君子復何如
高館閒無人
離居不可道
閑門寂已閉
落日照秋草
雖無近音信
千里阻河關
中復容汝
願去年歸舊
山結交二十
載不得一日
展貧病子既
深契濶余不
淺仲秋雖未
歸暮秋以為
期

良會詎幾日終日長相思

西施詠

艷色天下重西施寧久微朝為越溪女暮作吳
宮妃賤日豈殊衆貴來方悟稀邀人傅脂粉不
自著羅衣君寵益嬌態君憐無是非當時浣紗
伴莫得同車歸持謝鄰家子效顰安可希

桃源行

漁舟逐水愛山春兩岸桃花夾去津坐看紅樹

不知遠行盡青溪不見人山口潛行始隈隩山
開曠望旋平陸遙看一處攢雲樹近入千家散
花竹樵客初傳漢姓名居人未改秦衣服居人
共住武陵源還從物外起田園月明松下房櫳
靜日出雲中雞犬喧驚聞俗客爭來集競引還
家問都邑平明閭巷掃花開薄暮漁樵乘水入
初因避地去人間更問成仙遂不還峽裏誰知
有人事世中遙望空雲山不疑靈境難聞見塵

心未盡思鄉縣出洞無論隔山水辭家終擬長
游行自謂經過舊不迷安知峯壑今來變當時
只記入山深青溪幾度到雲林春來徧是桃花
水不辨仙源何處尋

同崔傅答賢弟

洛陽才子姑蘇客桂苑殊非故鄉陌九江楓樹
幾回青一片揚州五湖白揚州時有下江兵蘭
陵鎮前吹笛聲夜火人歸富春郭秋風鶴唳石

頭城周郎陸弟為儔侶對舞前溪歌白紵曲几
書留小史家草堂棋賭山陰墅衣冠若話外臺
臣先數夫君席上珍更聞臺閣求三語遙想風
流第一人

酬張少府

晚年惟好靜萬事不關心自顧無長策空知返
舊林松風吹解帶山月照彈琴君問窮通理漁
歌入浦深

輞川閒居贈裴秀才迪

寒山轉蒼翠，秋水日潺湲。
倚杖柴門外，臨風聽暮蟬。
渡頭餘落日，墟里上孤烟。
復值接輿醉，狂歌五柳前。

山居秋暝

空山新雨後，天氣晚來秋。
明月松間照，清泉石上流。
竹喧歸浣女，蓮動下漁舟。
隨意春芳歇，王孫自可留。

終南山

太乙近天都，連山到海隅。
白雲迴望合，青靄入看無。
分野中峰變，陰晴衆壑殊。
欲投人處宿，隔水問樵夫。

終南別業

中歲頗好道，晚家南山陲。
興來每獨往，勝事空自知。
行到水窮處，坐看雲起時。
偶然值林叟，談笑無還期。

積雨輞川莊作

積雨空林烟火遲
蒸藜炊黍餉東菑
漠漠水田飛白鷺
陰陰夏木轉黃鸝
山中習靜觀朝槿
松下清齋折露葵
野老與人爭席罷
海鷗何事更相疑

送楊少府貶郴州

明到衡山與洞庭
若為秋月聽猿聲
愁看北渚三湘遠
惡說南風五兩輕
青草瘴時過夏口
白

頭浪裏出盜城
長沙不久留才子
賈誼何須弔

屈平

鹿柴

空山不見人
但聞人語響
返景入深林
復照青苔上

竹里館

獨坐幽篁裏
彈琴復長嘯
深林人不知
明月來相照

山中送別

山中相送罷，日暮掩柴扉。
春草年年綠，王孫歸不歸。

雜詠

君自故鄉來，應知故鄉事。
來日綺窓前，寒梅著花未。

相思子

紅豆生南國，春來發幾枝。
願君多采擷，此物最

相思

送元二使安西

渭城朝雨裊輕塵，客舍青青柳色新。
勸君更盡一盃酒，西出陽關無故人。

九月九日憶山東兄弟

獨在異鄉為異客，每逢佳節倍思親。
遙知兄弟登高處，遍插茱萸少一人。

送沈子歸江東

楊柳渡頭行客稀
罟師盪漿向臨圻
唯有相思似春色
江南江北送君歸

寒食汜上作

廣武城邊逢暮春
汶陽歸客淚沾巾
落花寂寂啼山鳥
楊柳青青渡水人

孟浩然

宿來公山房期丁大不至

夕陽渡西嶺
羣壑條已暝
松月生夜涼
風泉滿

清聽樵人歸
欲盡烟鳥棲
初定之子期
宿來孤
瑟候蘿逕

夏日南亭懷辛大

山光忽西落
池月漸東上
散髮乘夜涼
開軒卧
閒敞荷風送
香氣竹露滴
清響欲取鳴
琴彈恨
無知音賞
感此懷故人
中宵勞夢想

晚泊潯陽望香鑪峰

挂席幾千里
名山都未逢
泊舟潯陽郭
始見香

鑪峰嘗讀遠公傳永懷塵外蹤東林精舍近日
暮空聞鐘

夜歸鹿門歌

山寺鳴鐘晝已昏漁梁渡頭爭渡喧人隨沙岸
向江村余亦乘舟歸鹿門鹿門月照開烟樹忽
到龐公樓隱處巖扉松迳長寂寥惟有幽人自
來去

臨洞庭上張丞相

八月湖水平涵虛混太清氣蒸雲夢澤波撼岳
陽城欲濟無舟楫端居恥聖明坐觀垂釣者徒
有羨魚情

與諸子登峴山

人事有代謝往來成古今江山留勝迹我輩復
登臨水落魚梁淺天寒夢澤深羊公碑尚在讀
罷淚沾襟

過故人莊

故人具雞黍邀我至田家
綠樹村邊合青山郭
外斜開軒面場圃把酒話桑麻
待到重陽日還來就菊花

早寒江上有懷

木落雁南渡北風江上寒
我家襄水曲遙隔楚雲端
鄉淚客中盡孤帆天際看
迷津欲有問平海夕漫漫

春曉

春眠不覺曉處處聞啼鳥
夜來風雨聲花落知多少

裴迪

送崔九

歸山深淺去須盡
邱壑美莫學武陵人
暫遊桃源裏

王之涣

登鸛雀樓

白日依山盡黃河入海流欲窮千里目更上一層樓

涼州詞

黃河遠上白雲間一片孤城萬仞山羌笛何須怨楊柳春風不度玉門關

賈至

巴陵與李十二裴九汎洞庭

楓岸紛紛落葉多洞庭秋水晚來波乘興輕舟

無近遠白雲明月弔湘娥

張旭

桃花溪

隱隱飛橋隔野烟石磯西畔問漁船桃花盡日隨流水洞在清溪何處邊

王昌齡

芙蓉樓送辛漸

寒雨連江夜入吳平明送客楚山孤洛陽親友

如相問一片冰心在玉壺

春宮曲

昨夜風開露井桃未央前殿月輪高
平陽歌舞新承寵簾外春寒賜錦袍

長信秋詞

奉帚平明金殿開且將團扇共徘徊
玉顏不及寒鴉色猶帶昭陽日影來

西宮春怨

西宮夜靜百花香欲卷珠簾春恨長
斜抱雲和深見月朦朧樹色隱昭陽

出塞

秦時明月漢時關萬里長征人未還
但使龍城飛將在不教胡馬度陰山

閨怨

閨中少婦不知愁春日凝妝上翠樓
忽見陌頭楊柳色悔教夫婿覓封侯

李頎

古意

男兒事長征，少小幽燕客。
賭勝馬蹄下，由来輕七尺。
殺人莫敢前，鬚如蝟毛磔。
黃雲隴底白，雲飛未得報。
思不得歸，遼東小婦年十五。
慣彈琵琶，解歌舞。今為羗笛出塞聲，使我三軍淚如雨。

古從軍行

白日登山望烽火，黃昏飲馬傍交河。
行人刁斗

風沙暗，公主琵琶幽怨多。
野雲萬里無城郭，雨雪紛紛連大漠。
胡雁哀鳴夜夜飛，胡兒眼淚雙雙落。
聞道玉門猶被遮，應將性命逐輕車。
年年戰骨埋荒外，空見蒲萄入漢家。

送魏萬之京

朝聞遊子唱離歌，昨夜微霜初渡河。
鴻雁不堪愁裏聽，雲山况是客中過。
關城曙色催寒近，御苑砧聲向晚多。
莫是長安行樂處，空令歲月易

蹉跎

常建

送李十一尉臨溪

泠泠花下琴君唱
渡江吟天際
一帆影預懸
離別心以言
神仙尉因致
瑤華音回軫
撫商調越溪
澄碧林

破山寺後禪院

清晨入古寺
初日照高林
曲徑通幽處
禪房花

木深山光悅
鳥性潭影空
人心萬籟此
俱寂惟聞鐘磬音

三日尋李九莊

雨歇楊林東
渡頭永和三日
盪輕舟故人家在
桃花岸直到門前
溪流

高適

人日寄杜二拾遺

人日題詩寄草堂
遙憐故人思故鄉
柳條弄色

不忍見梅花滿枝空斷腸
身在南蕃無所預心
懷百憂復千慮今年人日空相憶
明年人日知
何處一卧東山三十春
豈知書劍老風塵
龍鍾還忝二千石
愧爾東西南北人

送鄭侍御謫閩中

謫去君無恨閩中我舊過
大都秋雁少只是夜
猿多東路雲山合南天瘴癘和
自當逢雨露行
矣慎風波

送前衛縣李窠少府

黃鳥翩翩楊柳垂
春風送客使人悲
怨別自驚千里外
論交卻憶十年時
雲開汶水孤帆遠
路繞梁山匹馬遲
此地從來可乘興
留君不住益淒其

送李少府貶峽中王少府貶長沙

嗟君此別意何如
駐馬銜杯問謫居
巫峽啼猿數行淚
衡陽歸雁幾封書
青楓江上秋帆遠
白

帝城邊古木疎聖代即今多雨露暫時分手莫
躊躇

夜別韋司士

高館張燈酒復清夜鐘殘月雁歸聲只言啼鳥
堪求侶無那春風欲送行黃河曲裏沙為岸白
馬津邊柳向城莫怨他鄉暫離別知君到處有
逢迎

岑參

白雪歌送武判官歸

北風捲地白草折胡天八月即飛雪忽如一夜
春風來千樹萬樹梨花开散入珠簾濕羅幕狐
裘不暖錦衾薄將軍角弓不得控都護鐵衣冷
猶著瀚海闌干百丈冰愁雲慘淡萬里凝中軍
置酒飲歸客胡琴琵琶與羌笛紛紛暮雪下轅
門風掣紅旗凍不翻輪臺東門送君去去時雪
滿天山路山迴路轉不見君雪上空留馬行處

送張子尉南海

不擇南州尉高堂有老親樓臺重蜃氣邑里雜
鮫人海暗三山雨花明五嶺春此鄉多寶玉慎
勿厭清貧

寄左省杜拾遺

聯步趨丹陛分曹限紫微曉隨天仗入暮惹御
香歸白髮悲花落青雲羨鳥飛聖朝無闕事自
覺諫書稀

磧中作

走馬西來欲到天辭家見月兩回圓今夜不知
何處宿平沙萬里絕人烟

逢入京使

故園東望路漫漫雙袖龍鍾淚不乾馬上相逢
無紙筆憑君傳語報平安

殷遙

送友人下第歸省

君此卜行日高堂應夢歸莫將和氏淚滴著老
萊衣嶽雨連河細田禽出麥飛到家調膳後吟
好送斜暉

祖詠

終南望餘雪

終南陰嶺秀積雪浮雲端林表明霽色城中增
暮寒

張潮

江南行

茨菰葉爛別西灣蓮子花開不見還妾夢不離
江上水人傳郎在鳳凰山

陶峴

西塞山下迴舟作

匡廬舊業是誰主吳越新居安此生白髮數莖
歸未得青山一望計還成鴉翻楓葉夕陽動鷺
立蘆花秋水明從此舍舟何所詣酒旗歌扇正

相迎

李白

古風

莊周夢蝴蝶蝴蝶為莊周一體更變易萬事良
悠悠乃知蓬萊水復作清淺流青門種瓜人舊
日東陵侯富貴固如此營營何所求
齊有個儻生魯連特高妙明月出海底一朝開
光曜卻秦振英聲後世仰未照意輕千金贈顧

向平原笑吾亦澹蕩人拂衣可同調

松柏本孤直難為桃李顏昭昭嚴子陵垂釣滄
波間身將客星隱心與浮雲閑長揖萬乘君還
歸富春山清風灑六合邈然不可攀使我長歎
息冥棲巖石間

君平既棄世世亦棄君平觀變窮太易探元化
羣生寂寞綴道論空簾閉幽情騶虞不虛來鸞
鷲有時鳴安知天漢上白日懸高名海客去已

久誰人測沈冥

胡關饒風沙蕭索竟終古歲落秋草黃登高望
戎虜荒城空大漠邊邑無遺堵白骨橫千霜嗟
峨嶽榛莽借問誰陵虐天驕毒威武赫怒我聖
皇勞師事輦鼓陽和變殺氣發卒騷中土三十
六萬人哀哀淚如雨且悲就行役安得營農圃
不見征戍兒豈知關山苦李牧今不在邊人飼
豺虎

天津三月時千門桃與李朝為斷腸花暮逐東
流水前水復後水古今相續流新人非舊人年
年橋上遊鷄鳴海色動謁帝羅公侯月落西上
陽餘輝半城樓衣冠照雲日朝下散皇州鞍馬
如飛龍黃金絡馬頭行人皆辟易志氣橫嵩邱
入門上高堂列鼎錯珍羞香風引趙舞清管隨
齊謳七十紫鴛鴦雙雙戲庭幽行樂爭晝夜自
言度千秋功成身不退自古多愆尤黃犬空歎

息綠珠成鬢，讎何如鴟夷子散髮，棹扁舟。
在世復幾時，倏如飄風度。空聞紫金經，白首愁
相誤。撫已忽自笑，沈吟為誰故。名利徒煎熬，安
得閑余步。終留赤玉鳥，東上蓬山路。秦帝如我
求蒼蒼，但烟霧。

秋露白如玉，團團下庭綠。我行忽見之，寒早悲
歲促。人生鳥過目，胡乃自結束。景公一何愚，牛
山淚相續。物苦不知足，得隴又望蜀。人心若波

瀾，世路有屈曲。三萬六千日，夜夜當秉燭。

世道日交喪，澆風散淳源。不采芳桂枝，反棲惡
木根。所以桃李樹，吐花竟不言。大運有興沒，羣
動爭飛奔。歸來廣成子，去入無窮門。

鄭客西入關，行行未能已。白馬華山君相逢，平
原里。辟遺鑄池君，明年祖龍死。秦人相謂曰，吾
屬可去矣。一往桃花源，千春隔流水。

羽檄如流星，虎符合專城。喧呼救邊急，羣鳥皆

夜鳴白日曜紫微三公運權衡天地皆得一澹
然四海清借問此何為答言楚徵兵渡瀘及五
月將赴雲南征怯卒非戰士矣方難遠行長號
別巖親日月慘光晶泣盡繼以血心摧兩無聲
困獸當猛虎窮魚餌奔鯨于去不一回投軀豈
全生如何舞干戚一使有苗平

關山月

明月出天山蒼茫雲海間長風幾萬里吹度玉

門關漢下白登道胡窺青海灣由來征戰地不
見有人還戍客望邊色思歸多苦顏高樓當此
夜歎息未應聞

下終南山過斛斯山人宿置酒

暮從碧山下山月隨人歸卻顧所來徑蒼蒼橫
翠微相携及田家童稚開荆扉綠竹入幽徑青
蘿拂行衣歡言得所憩美酒聊共揮長歌吟松
風曲盡河星稀我醉君復樂陶然共忘機

月下獨酌

花間一壺酒，獨酌無相親。
舉杯邀明月，對影成三人。
月既不解飲，影徒隨我身。
暫伴月將影，行樂須及春。
我歌月徘徊，我舞影零亂。
醒時同交歡，醉後各分散。
永結無情遊，相期邈雲漢。

長干行

妾髮初覆額，折花門前劇。
郎騎竹馬來，繞牀弄青梅。
同居長干里，兩小無嫌猜。
十四為君婦，羞

顏未嘗開，低頭向暗壁。
千喚不一回，十五始展眉。
願同塵與灰，常存抱柱信。
豈上望夫臺，十六君遠行。
瞿塘滌灘堆，五月不可觸。
猿聲天上哀，門前送行跡。
一一生綠苔，苔深不能掃。
落葉秋風早，八月蝴蝶黃。
雙飛西園草，感此傷妾心。
坐愁紅顏老，早晚下三巴。
預將書報家，相迎不道遠。
直至長風沙。

春思

燕草如碧絲秦桑低綠枝當君懷歸日是妾斷腸時春風不相識何事入羅幃

子夜秋歌

長安一片月萬戶擣衣聲秋風吹不盡總是玉關情何日平胡虜良人罷遠征

贈盧司戶

秋色無遠近出門盡寒山白雲遙相識待我蒼梧間借問盧耽鶴西飛幾時還

望終南山寄紫閣隱者

出門見南山引領意無限秀色難為名蒼翠日在眼有時白雲起天際自舒卷心中與之然託興每不淺何當造幽人滅跡棲絕巘

遠別離

遠別離古有英皇之二女乃在洞庭之南瀟湘之浦海水直下萬里深誰人不言此離苦日慘慘兮雲冥冥猩猩啼烟兮鬼嘯雨我縱言之將

何補皇穹竊恐不照余之忠誠雷憑憑兮欲吼
怒堯舜當之亦禪禹君失臣兮龍為魚權歸臣
兮鼠變虎或云堯幽囚舜野死九疑連綿皆相
似重瞳孤墳竟何是帝子泣兮綠雲間隨風波
兮去無還慟哭兮遠望見蒼梧之深山蒼梧山
崩湘水絕竹上之淚乃可滅

烏夜啼

黃雲城邊烏欲棲歸飛啞啞枝上啼機中織錦

秦川女碧紗如烟隔窓語停梭悵然憶遠人獨
宿空房淚如雨

將進酒

君不見黃河之水天上來奔流到海不復回君
不見高堂明鏡悲白髮朝如青絲暮成雪人生
得意須盡歡莫使金樽空對月天生我材必有
用千金散盡還復來烹羊宰牛且為樂會須一
飲三百杯岑夫子丹邱生將進酒杯莫停與君

歌一曲請君為我傾耳聽鐘鼓饌玉不足貴但
願常醉不願醒古來聖賢皆寂寞唯有飲者留
其名陳王昔時宴平樂斗酒十千恣歡謔主人
何為言少錢徑須沽取對君酌五花馬千金裘
呼兒將出換美酒與爾同銷萬古愁

長相思

長相思在長安絡緯秋啼金井闌微霜淒淒簟
色寒孤燈不明思欲絕卷帷望月空長歎美人

如花隔雲端上有青冥之長天下有綠水之波
瀾天長地遠魂飛苦夢魂不到關山難長相思
摧心肝

日色欲盡花含烟月明欲素愁不眠趙瑟初停
鳳凰柱蜀琴欲奏鴛鴦絃此曲有意無人傳願
隨春風寄燕然憶君迢迢隔青天昔時橫波目
今作流淚泉不信妾腸斷歸來看取明鏡前

楊叛兒

君歌楊叛兒妾勸新豐酒何許寂關人烏啼白
門柳烏啼隱楊花君醉留妾家博山鑪中沈香
火雙烟一氣凌紫霞

江上吟

木蘭之枻沙棠舟玉簫金管坐兩頭美酒樽中
置千斛載妓隨波任去留仙人有待乘黃鶴海
客無心隨白鷗屈平詞賦懸日月楚王臺榭空
山邱興酣落筆搖五嶽詩成笑傲凌滄洲功名

富貴若長在漢水亦應西北流

侍從宜春苑奉詔賦龍池柳色初青聽新

鶯百轉歌

東風已綠瀛洲草紫殿紅樓覺春好池南柳色
半青青縈烟裊娜拂綺城垂絲百尺挂雕楹上
有好鳥相和鳴閒關早得春風情春風卷入碧
雲去千門萬戶皆春聲是時君王在鎬京五雲
垂暉耀紫清仗出金宮隨日轉天迴玉輦繞花

行始向蓬萊看舞鶴還過萑若聽新鶯新鶯飛
繞上林苑願入簫韶雜鳳笙

夢遊天姥吟留別

海客談瀛洲烟濤微茫信難求越人語天姥雲
霓明滅或可覩天姥連天向天橫勢拔五岳掩
赤城天台四萬八千丈對此欲倒東南傾我欲
因之夢吳越一夜飛度鏡湖月湖月照我影送
我至剡溪謝公宿處今尚在綠水蕩漾青猿啼

脚著謝公屐身登青雲梯半壁見海日空中聞
天雞千巖萬壑路不定迷花倚石忽已暝熊咆
龍吟殷巖泉慄深林兮驚層巔雲青青兮欲雨
水澹澹兮生烟列缺霹靂邱壘崩摧洞天石扉
訇然中開青冥浩蕩不見底日月照耀金銀臺
霓為衣兮風為馬雲之君兮紛紛而來下虎鼓
瑟兮鸞迴車仙之人兮列如麻忽魂悸以魄動
恍驚起而長嗟惟覺時之枕席失向來之烟霞

世間行樂亦如此古來萬事東流水別君去兮
何時還且放白鹿青崖間須行即騎訪名山安
能摧眉折腰事權貴使我不得開心顏

金陵酒肆留別

風吹柳花滿店香吳姬壓酒勸客嘗金陵子弟
來相送欲行不行各盡觴請君試問東流水別
意與之誰短長

贈孟浩然

吾愛孟夫子風流天下聞紅顏棄軒冕白首卧
松雲醉月頻中聖迷花不事君高山安可仰徒
此揖清芬

渡荆門送別

渡遠荆門外來從楚國遊山隨平野盡江入大
荒流月下飛天鏡雲生結海樓仍憐故鄉水萬
里送行舟

送友人

青山橫北郭白水遠東城此地一為別孤蓬萬
里征浮雲遊子意落日故人情揮手自茲去蕭
蕭班馬鳴

送友人入四

見說蠶叢路崎嶇不易行山從人面起雲傍馬
頭生芳樹籠秦棧春流遠蜀城升沉應已定不
必問君平

秋登宣城謝朓北樓

江城如畫裏山晚望晴空兩水夾明鏡雙橋落
彩虹人烟寒橘柚秋色老梧桐誰念北樓上臨
風懷謝公

夜泊牛泊懷古

牛渚西江夜青天無片雲登舟望秋月空憶謝
將軍余亦能高詠斯人不可聞明朝挂帆去楓
葉落紛紛

登金陵鳳凰臺

鳳凰臺上鳳凰遊
鳳去臺空江自流
吳宮花草埋幽徑
晉代衣冠成古邱
三山半落青天外
二水中分白鷺洲
總為浮雲能蔽日
長安不見使人愁

玉階怨

玉階生白露
夜久侵羅襪
卻下水精簾
玲瓏望秋月

靜夜思

牀前明月光
疑是地上霜
舉頭望明月
低頭思故鄉

獨坐敬亭山

衆鳥高飛盡
孤雲獨去閒
相看兩不厭
只有敬亭山

勞勞亭

天下傷心處
勞勞送客亭
春風知別苦
不遣柳條青

怨情

美人捲珠簾深坐顰蛾眉但見淚痕溼不知心
恨誰

清平調

雲想衣裳花想容春風拂檻露華濃若非羣玉
山頭見會向瑤臺月下逢
一枝紅艷露凝香雲雨巫山枉斷腸借問漢宮
誰得似可憐飛燕倚新粧

名花傾國兩相歡常得君王帶笑看解釋春風
無限恨沈香亭北倚闌干

聞王昌齡左遷龍標遙有此寄

楊花落盡子規啼聞道龍標過五溪我寄愁心
與明月隨風直到夜郎西

黃鶴樓送孟浩然之廣陵

故人西辭黃鶴樓烟花三月下揚州孤帆遠影
碧空盡惟見長江天際流

送賀賓客歸越

鏡湖流水漾清波
狂客歸舟逸興多
山陰道士如相見
應寫黃庭換白鵝

與賈舍人汎洞庭

洞庭西望楚江分
水盡南天不見雲
日落長沙秋色遠
不知何處弔湘君

早發白帝城

朝辭白帝彩雲間
千里江陵一日還
兩岸猿聲

啼不住
輕舟已過萬重山

舟下荆門

霜落荆門烟樹空
布帆無恙挂秋風
此行不為鱸魚膾
自愛名山入剡中

蘇臺覽古

舊苑荒臺楊柳新
菱歌清唱不勝春
只今惟有西江月
曾照吳王宮裏人

越中懷古

越王句踐破吳歸戰士還家盡錦衣宮女如花
滿春殿只今惟有鷓鴣飛

橫江詞

橫江館前津吏迎向余東指海雲生郎令欲渡
緣何事如此風波不可行

山中答俗人

問余何意棲碧山笑而不答心自閒桃花流水
窅然去別有天地非人間

天籟集目錄之四

唐

杜甫


望嶽

贈衛八處士

羗村

石壕吏

新婚別



佳人

夢李白

後出塞

兵車行

麗人行

哀王孫

春日憶李白

月夜

春宿左省

送翰林張司馬南海勒碑

九日藍田崔氏莊

南鄰

送韓十四江東觀省

聞官軍收河南河北

詠懷古跡

張謂

湖中對酒作

送裴侍御歸上都

別韋郎中

杜侍御送貢物戲贈

元結

春陵行并序

賊退示官吏并序

劉方平

月夜

春怨

金昌緒

春怨

劉長卿

尋南溪常道士

送靈澈

錢起

湘靈鼓瑟

韋應物

寄全椒山中道士

淮上喜會梁川故人

秋夜寄邱員外

顧況

宮詞

皇甫冉

巫山高

韓翃

寒食

李端

拜新月

盧綸

晚次鄂州

塞下曲

王建

新娘娘

李涉

宿武關

權德輿

玉臺體

李紳

憫農

李益

喜見外弟又言別

江南曲

夜上受降城聞笛

楊敬之

贈項斯

司空曙

送盧秦卿

江村即事

張籍

秋思

張繼

楓橋夜泊

劉禹錫

西塞山懷古

春詞

石頭城

烏衣巷

聽舊宮人穆氏唱歌

與歌者何戡

元稹

行宮

白居易

長恨歌

錢塘湖春行

孟郊

遊子吟

古別離

崔護

題都城南莊

賈島

尋隱者不遇

渡桑乾

張祜

宮詞

雨霖鈴

贈內人

李商隱

錦瑟

無題

無題

無題

登樂遊原

夜雨寄北

寄令狐郎中

杜牧

泊秦淮

寄揚州韓綽判官

許渾

塞下曲

馬戴

楚江懷古

雍陶

和孫明府懷舊山

朱慶餘

近試上張水部

温庭筠

贈彈箏人

瑤瑟怨

趙嘏

經汾陽舊宅

陳陶

隴西行

李頻

渡漢江

杜荀鶴

春宮怨

李洞

繡嶺宮詞

鄭谷

淮上與友人別

韋莊

金陵圖

崔塗

除夜有感

王駕

社日

秦韜玉

貧女

聶夷中

田家

西鄙人

哥舒歌

七歲女子

送兄

開元宮人

袍中詩

宮人韓氏

題紅葉

李冶

寄校書七兄

劉采春

囉噴曲

杜秋娘

金縷詞

寒山

書石壁詩

金地藏

送童子下山

呂祖

題扇

岳陽樓

許宣平

題石壁上李白詩後

裴航

贈樊夫人

許碛

醉吟

戚逍遙

歌

南溟夫人

題玉壺贈元柳二子

樊夫人

答裴航

湘妃廟女子

無題

肅宗皇帝

賜梨李泌與諸王聯句

天籟集

唐

杜甫

望嶽

岱宗夫如何齊魯青未了造化鍾神秀陰陽割
昏曉盪胸生層雲決眚入歸鳥會當凌絕頂一
覽衆山小

贈衛八處士

人生不相見動如參與商
今夕復何夕共此燈
燭光少壯能幾時鬢髮各已蒼
訪舊半為鬼驚呼熱中腸
焉知二十載重上君子堂
昔別君未婚兒女忽成行
怡然敬父執問我來何方
問答乃未已兒女羅酒漿
夜雨剪春韭新炊間黃粱
主稱會面難一舉累十觴
十觴亦不醉感子故意長
明日隔山岳世事兩茫茫

羗村

崢嶸赤雲西日脚下平地
柴門烏雀噪歸客千里至
妻孥怪我在驚定還拭淚
世亂遭飄蕩生還偶然遂
鄰人滿牆頭感歎亦歔歔
夜闌更秉燭相對如夢寐

石壕吏

暮投石壕村有吏夜捉人
老翁踰牆走老婦出門迎
吏呼一何怒婦啼一何苦
聽婦前致詞三男鄴城戍
一男附書至二男新戰死
存者且偷

生死者長已矣室中更無人惟有乳下孫孫有
母未去出入無完裙老嫗力雖衰請從吏夜歸
急應河陽役猶得備晨炊夜久語聲絕如聞泣
幽咽天明登前途獨與老翁別

新婚別

兔絲附蓬麻引蔓故不長嫁女與征夫不如棄
路傍結髮為君妻席不煖君牀暮婚晨告別無
乃太匆忙君行雖不遠守邊赴河陽妾身未分

明何以拜姑嫜父母養我時日夜令我藏生女
有所歸雞狗亦得將君令往死地沈痛迫中腸
誓欲隨君去形勢反蒼黃勿為新婚念努力事
戎行婦人在軍中兵氣恐不揚自嗟貧家女久
致羅襦裳羅襦不復施對君洗紅粧仰視百鳥
飛大小必雙翔人事多錯迕與君永相望

佳人

絕代有佳人幽居在空谷自云良家子零落依

草木關中昔喪敗兄弟遭殺戮官高何足論不
得收骨肉世情惡衰歇萬事隨轉燭夫壻輕薄
兒新人美如玉合昏尚知時鴛鴦不獨宿但見
新人笑那聞舊人哭在山泉水清出山泉水濁
侍婢賣珠迴牽蘿補茅屋摘花不挿髮采柏動
盈掬天寒翠袖薄日暮倚修竹

夢李白

死別已吞聲生別常惻惻江南瘴癘地逐客無

消息故人入我夢明我長相憶恐非平生魂路
遠不可測魂來楓林青魂返關塞黑君今在羅
網何以有羽翼落月滿屋梁猶疑照顏色水深
波浪濶無使蛟龍得

後出塞

朝進東門營暮上河陽橋落日照大旗馬鳴風
蕭蕭平沙列萬幕部伍各見招中天懸明月令
嚴夜寂寥悲笳數聲動壯士慘不驕借問大將

誰恐是霍嫖姚

兵車行

車麟麟馬蕭蕭行人弓箭各在腰
耶娘妻子走相送塵埃不見咸陽橋
牽衣頓足攔道哭哭聲直上千雲霄
道傍過者問行人行人但云點行頻
或從十五北防河便至四十西營田
去時正與裹頭歸來頭白還戍邊
邊庭流血成海水武皇開邊意未已
君不聞漢家山東二百州千

村萬落生荆杞縱有健婦把鋤犁
禾生隴畝無東西况復秦兵耐苦戰
被驅不異犬與雞長者雖有問役夫
敢申恨且如今年冬未休關西卒縣
官急索租租稅從何出信知生男惡
反是生女好生女猶得嫁比鄰生男
埋沒隨百草君不見青海頭古來白
骨無人收新鬼煩冤舊鬼哭天陰雨
濕聲啾啾

麗人行

三月三日天氣新長安水邊多麗人態濃意遠
淑且真肌理細膩骨肉勻繡羅衣裳照暮春盛
金孔雀銀麒麟頭上何所有翠微盞葉垂鬢脣
背後何所見珠壓腰祔穩稱身就中雲幕椒房
親賜名大國號與秦紫駝之峯出翠釜水精之
盤行素鱗犀筋厭飲久未下鸞刀縷切空紛綸
黃門飛鞚不動塵御厨絡繹送八珍簫鼓哀吟
感鬼神賓從雜還實要津後來鞍馬何逡巡當

軒下馬入錦茵楊花雪落覆白蘋青鳥飛去銜
紅巾災手可熱勢絕倫慎莫近前丞相嗔

哀王孫

長安城頭頭白烏夜飛延秋門上呼又向人家
啄大屋屋底達官走避胡金鞭斷折九馬死骨
肉不待同馳驅腰下寶玦青珊瑚可憐王孫泣
路隅問之不肯道姓名但道困苦乞為奴已經
百日竄荆棘身上無有完肌膚高帝子孫盡隆

準龍種自與常人殊豺狼在邑龍在野王孫善
保千金軀不敢長語臨郊衢且為王孫立斯須
昨夜東風吹血腥東來索駝滿舊都朔方健兒
好身手昔何勇銳今何愚竊聞天子已傳位聖
德北服南單于花門務面請雪恥慎勿出口他
人狙哀哉王孫慎勿踈五陵佳氣無時無

春日憶李白

白也詩無敵飄然思不羣清新庾開府俊逸鮑

參軍渭北春天樹江東日暮雲何時一尊酒重
與細論文

月夜

今夜鄜州月閨中只獨看遙憐小兒女未解憶
長安香霧雲鬟濕清輝玉臂寒何時倚虛幌雙
照淚痕乾

春宿左省

花隱掖垣暮啾啾棲鳥過星臨萬戶動月傍九

宵多不寢聽金鑰因風想玉珂明朝有封事數
問夜如何

送翰林張司馬南海勒碑

原注相國製文

冠冕通南極文章落上台詔從三殿去碑到百
蠻開野館濃花發春帆細雨來不知滄海上天
遣幾時回

九日藍田崔氏莊

老去悲秋強自寬興來今日盡君歡羞將短髮

還吹帽笑倩傍人為正冠藍水遠從千澗落玉
山高竝兩峯寒明年此會知誰健醉把茱萸子
細看

南鄰

錦里先生烏角巾園收芋粟未全貧慣看賓客
兒童喜得食階除烏雀馴秋水纔添四五尺野
航恰受兩三人白沙翠竹江村暮相送柴門月
色新

送韓十四江東覲省

兵戈不見老萊衣
歎息人間萬事非
我已無家尋弟妹
君今何處訪庭闈
黃牛峽靜灘聲轉
白馬江寒樹影稀
此別應須各努力
故鄉猶恐未同歸

聞官軍收河南河北

劍外忽傳收薊北
初聞涕淚滿衣裳
卻看妻子愁何在
漫卷詩書喜欲狂
白日放歌須縱酒
青

春作伴好還鄉
即從巴峽穿巫峽
便下襄陽向洛陽

詠懷古跡

羣山萬壑赴荆門
生長明妃尚有村
一去紫臺連朔漠
獨留青塚向黃昏
畫圖省識春風面
環珮空歸月夜魂
千載琵琶作胡語
分明怨恨曲中論

張謂

湖中對酒作

夜坐不厭湖上月
晝行不厭湖上山
眼前一尊又常滿
心中萬事如等閒
主人有黍萬餘石
濁醪數斗應不惜
即令相對不盡歡
別後相思復何益
茱萸灣頭歸路賒
願君且宿黃公家
風光若此人不醉
參差辜負東園花

送裴侍御歸上都

楚地勞行役
秦城罷鼓鼙
舟移洞庭岸
路入武

陵溪江月隨人影
山花趁馬蹄
離魂將別夢
先已到關西

別韋郎中

星軺計日赴岷峩
雲樹連天阻笑歌
南入洞庭隨雁去
西過巫峽聽猿多
崢嶸洲上飛黃葉
灑灑瀕堆邊起白波
不醉郎中桑落酒
教人無奈別離何

杜侍御送貢物戲贈

銅柱珠崖道路難伏波橫海舊登壇越人自貢
珊瑚樹漢使何勞獬豸冠疲馬山中愁日晚孤
舟江上畏春寒由來此貨稱難得多恐君王不
忍看

元結

春陵行并序

癸卯歲漫叟授道州刺史道州舊四萬
餘戶經賊以來不滿四千大半不勝賦

稅到官未五十日承諸使徵求符牒二
百餘封皆曰失其限者罪至貶削於戲
若悉應其命則州縣破亂刺史欲焉逃
罪若不應命又即獲罪戾必不免也吾
將守官靜以安人待罪而已此州是春
陵故地故作春陵行以達下情

軍國多所需切責在有司有司臨郡縣刑法競
欲施供給豈不憂徵斂又可悲州小經亂亡遺

人實困疲大鄉無十家大族命單羸朝餐是草根
暮食仍木皮出言氣欲絕意速行步遲追呼
尚不忍况乃鞭撲之郵亭傳急符來往跡相追
更無寬大恩但有迫促期欲令鬻兒女言發恐
亂隨悉使索其家而又無生資聽彼道路言怨
傷誰復知去冬山賊來殺奪幾無遺所願見王
官撫養以惠慈奈何重驅逐不使存活為安人
天子命符節我所持州縣忽亂亡得罪復是誰

逋緩違詔令蒙責固其宜前賢重守分惡以禍
福移亦云貴守官不愛能適時顧惟孱弱者正
直當不虧何人采國風吾欲獻此辭

賊退示官吏并序

癸卯歲西原賊入道州焚燒殺掠幾盡
而去明年賊又攻永破邵不犯此州邊
鄙而退豈力能制敵與蓋蒙其傷憐而
已諸使何為忍苦徵歛故作詩一篇以

示官吏

昔歲逢太平山林二十年泉源在庭戶洞壑當
門前井稅有常期日晏猶得眠忽然遭世變數
歲親戎旃今來典斯郡山夷又紛然城小賊不
屠人貧傷可憐是以陷鄰境此州獨見全使臣
將王命豈不如賊焉今被徵歛者迫之如火煎
誰能絕人命以作時世賢思欲委符節引竿自
刺船將家就魚麥歸老江湖邊

劉方平

月夜

更深月色半人家北斗闌干南斗斜今夜偏知
春氣暖蟲聲新透綠窓紗

春怨

紗窓日落漸黃昏金屋無人見淚痕寂寞空庭
春欲晚梨花滿地不開門

金昌緒

春怨

打起黃鶯兒莫教枝上啼
啼時驚妾夢不得到
遼西

劉長卿

尋南溪常道士

一路經行處莓苔見屐痕
白雲依靜渚芳草閉
閒門過雨看松色隨山到水源
溪花與禪意相對亦忘言

送靈澈

蒼蒼竹林寺杳杳鐘聲晚
荷笠帶斜陽青山獨
歸遠

錢起

湘靈鼓瑟

善鼓雲和瑟常聞帝子靈
馮夷空自舞楚客不堪聽
苦調淒金石清音入杳冥
蒼梧來怨慕白芷動芳馨
流水傳湘浦悲風過洞庭
曲終人不

見江上數峯青

韋應物

寄全椒山中道士

今朝郡齋冷
忽念山中客
澗底束荆薪
歸來煮白石
欲持一瓢酒
遠慰風雨夕
落葉滿空山
何處尋行跡

淮上喜會梁川故人

江漢曾為客
相逢每醉還
浮雲一別後
流水十

年間歡笑情如舊
蕭疎鬢已斑
何因不歸去
淮上有秋山

秋夜寄邱員外

懷君屬秋夜
散步詠涼天
空山松子落
幽人應未眠

顧况

宮詞

玉樓天半起笙歌
風送宮嬪笑語和
月殿影開

聞夜漏水精簾捲近秋河

皇甫冉

巫山高

巫峽見巴東迢迢出半空雲藏神女館雨到楚
王宮朝暮泉聲落寒暄樹色同清猿不可聽偏
在九秋中

韓翃

寒食

春城無處不飛花寒食東風御柳斜日暮漢宮
傳蠟燭輕烟散入五侯家

李端

拜新月

開簾見新月即便下階拜細語人不聞北風吹
裊帶

盧綸

晚次鄂州

雲開遠見漢陽城猶是孤帆一日程
估客晝眠知浪靜舟人夜語覺潮生
三湘愁鬢逢秋色萬里歸心對月明
舊業已隨征戰盡更堪江上鼓
鼙聲

塞下曲

林暗草驚風將軍夜引弓
平明尋白羽沒在石稜中

月黑雁飛高單于夜遁逃
欲將輕騎逐大雪滿

弓刀

王建

新嫁娘

三日入厨下洗手作羹湯
未諳姑食性先遣小姑嘗

李涉

宿武關

遠別秦城萬里遊亂山高下入商州
關門不鎖

寒溪水一夜潺湲送客愁

權德輿

玉臺體

昨夜裊帶解今朝
蟠子飛鉛華不可棄
莫是藁碓歸

李紳

憫農

春種一粒粟秋收萬顆子
四海無閒田農夫猶

餓死

鋤禾日當午汗滴禾下土
誰知盤中餐粒粒皆辛苦

李益

喜見外弟又言別

十年離亂後長大一相逢
問姓驚初見稱名憶舊容
別來滄海事語罷暮天鐘
明日巴陵道秋山又幾重

江南曲

嫁得瞿塘賈朝朝誤妾期
早知潮有信嫁與弄潮兒

夜上受降城聞笛

回樂峰前沙似雪受降城外月如霜
不知何處吹蘆管一夜征人盡望鄉

楊敬之

贈項斯

幾度見詩詩總好及觀標格過於詩
平生不解藏人善到處逢人說項斯

司空曙

送盧秦卿

知有前期在難分此夜中無將故人酒
不及石尤風

江村即事

罷釣歸來不繫船江村月落正堪眠
縱然一夜

風吹去只在蘆花淺水邊

張籍

秋思

洛陽城裏見秋風
欲作家書意萬重
復恐匆匆說不盡
行人臨發又開封

張繼

楓橋夜泊

月落烏啼霜滿天
江楓漁火對愁眠
姑蘇城外

寒山寺夜半鐘聲到客船

劉禹錫

西塞山懷古

王濬樓船下益州
金陵王氣黯然收
千尋鐵鎖沈江底
一片降幡出石頭
人世幾回傷往事
山形依舊枕寒流
從今四海為家日
故壘蕭蕭蘆荻秋

春詞

新妝宜面下珠樓深鎖春光一院愁行到中庭
數花朵蜻蜓飛上玉搔頭

石頭城

山圍故國周遭在潮打空城寂寞回淮水東邊
舊時月夜深還過女牆來

烏衣巷

朱雀橋邊野草花烏衣巷口夕陽斜舊時王謝
堂前燕飛入尋常百姓家

聽舊宮人穆氏唱歌

曾隨織女渡天河記得雲間第一歌休唱貞元
供奉曲當時朝士已無多

與歌者何戡

二十餘年別帝京重聞天樂不勝情舊人惟有
何戡在更與殷勤唱渭城

元稹

行宮

寥落古行宮宮花寂寞紅
白頭宮女在閒坐說
玄宗

白居易

長恨歌

漢皇重色思傾國御宇多年求不得
楊家有女初長成養在深閨人未識
天生麗質難自棄一朝選在君王側
回頭一笑百媚生六宮粉黛無顏色
春寒賜浴華清池溫泉水滑洗凝脂
侍兒

扶起嬌無力始是新承恩澤時
雲鬢花顏金步搖芙蓉帳暖度春宵
春宵苦短日高起從此君王不早朝
承歡侍宴無閒暇春從春遊夜專夜
後宮佳麗三千人三千寵愛在一身
金屋妝成嬌侍夜玉樓宴罷醉和春
姊妹弟兄皆列土可憐光彩生門戶
遂令天下父母心不重生男重生女
驪宮高處入青雲仙樂風飄處處聞
緩歌慢舞凝絲竹盡日君王看不足
漁陽鼙鼓動地

來驚破霓裳羽衣曲九重城闕煙塵生千乘萬
騎西南行翠華搖搖行復止西出都門百餘里
六軍不發無奈何宛轉蛾眉馬前死花鈿委地
無人收翠翹金雀玉搔頭君王掩面救不得回
看血淚相和流黃埃散漫風蕭索雲棧縈紆登
劍閣峨眉山下少人行旌旗無光日色薄蜀江
水碧蜀山青聖主朝朝暮暮情行宮見月傷心
色夜雨聞鈴腸斷聲天旋地轉迴龍馭到此躊

躇不能去馬嵬坡下泥土中不見玉顏空死處
君臣相顧盡沾衣東望都門信馬歸歸來池苑
皆依舊太液芙蓉未央柳芙蓉如面柳如眉對
此如何不淚垂春風桃李花開日秋雨梧桐葉
落時西宮南內多秋草落葉滿階紅不掃梨園
子弟白髮新椒房阿監青娥老夕殿螢飛思悄
然孤燈挑盡未成眠遲遲鍾鼓初長夜耿耿星
河欲曙天鴛鴦瓦冷霜華重翡翠衾寒誰與共

悠悠生死別經年，魂魄不曾來入夢。
臨邛道士鴻都客，能以精誠致魂魄。
為感君王輾轉思，遂教方士殷勤覓。
排空馭氣奔如電，升天入地求之徧。
上窮碧落下黃泉，兩處茫茫皆不見。
忽聞海上有仙山，山在虛無縹緲間。
樓閣玲瓏五雲起，其中綽約多仙子。
中有一人字太真，雪膚花貌參差是。
金闕西廂叩玉扃，轉教小玉報雙成。
聞道漢家天子使，九華帳裏夢魂驚。
攬衣推枕

起徘徊，珠箔銀屏迤邐開。
雲髻半偏新睡覺，花冠不整下堂來。
風吹仙袂飄飄舉，猶似霓裳羽衣舞。
玉容寂寞淚闌干，梨花一枝春帶雨。
含情凝睇謝君王，一別音容兩渺茫。
昭陽殿裏恩愛絕，蓬萊宮中日月長。
回頭下望人寰處，不見長安見塵霧。
惟將舊物表深情，鈿合金釵寄將去。
釵留一股合一扇，釵擘黃金合分鈿。
但教心似金鈿堅，天上人間會相見。
臨別殷勤重寄詞，詞

中有誓兩心知七月七日長生殿夜半無人私
語時在天願作比翼鳥在地願為連理枝天長
地久有時盡此恨綿綿無絕期

錢塘湖春行

孤山寺北賈亭西水面初平雲脚低幾處早鶯
爭暖樹誰家新燕啄春泥亂花漸欲迷人眼淺
草纔能沒馬蹄最愛湖東行不足綠楊陰裏白
沙隄

孟郊

遊子吟

慈母手中線遊子身上衣臨行密密縫意恐遲
遲歸誰言寸草心報得三春暉

古別離

欲別牽郎衣郎今向何處不恨歸來遲莫向臨
邛去

崔護

題都城南莊

去年今日此門中人面桃花相映紅
人面不知何處去桃花依舊笑春風

賈島

尋隱者不遇

松下問童子言師採藥去
只在此山中雲深不知處

渡桑乾

客舍并州已十霜歸心日夜憶咸陽
無端更渡桑乾水卻望并州是故鄉

張祜

宮詞

故國三千里深宮二十年
一聲何滿子雙淚落君前

雨霖鈴

雨霖鈴夜卻歸秦猶是張徽一曲新長說上皇

和淚教月明南內更無人

贈內人

禁門宮樹月痕過媚眼
惟看宿鷺窠斜拔玉釵
燈影畔別開紅焰救飛蛾

李商隱

錦瑟

錦瑟無端五十絃一絃一柱思華年
莊生曉夢迷蝴蝶望帝春心託杜鵑
滄海月明珠有淚藍

田日暖玉生煙此情可待成追憶
只是當時已

惘然

無題

昨夜星辰昨夜風畫樓西畔桂堂東
身無綵鳳雙飛翼心有靈犀一點通
隔座送鉤春酒暖分曹射覆蠟燈紅
嗟余聽鼓應官去走馬蘭臺類
轉蓬

無題

來是空言去絕踪
月斜樓上五更鐘
夢為遠別啼難喚
書被催成墨未濃
蠟照半籠金翡翠
麝薰微度繡芙蓉
劉郎已恨蓬山遠
更隔蓬山一萬重

無題

相見時難別亦難
東風無力百花殘
春蠶到死絲方盡
蠟炬成灰淚始乾
曉鏡但愁雲鬢改
夜吟應覺月光寒
蓬山此去無多路
青鳥殷勤為

探看

登樂遊原

白晚意不適
驅車登古原
夕陽無限好
只是近黃昏

夜雨寄北

君問歸期未有期
巴山夜雨漲秋池
何當共剪西窗燭
卻話巴山夜雨時

寄令狐郎中

嵩雲秦樹久離居
雙鯉迢迢一紙書
休問梁園舊賓客
茂陵秋雨病相如

杜牧

泊秦淮

烟籠寒水月籠沙
夜泊秦淮近酒家
商女不知亡國恨
隔江猶唱後庭花

寄揚州韓綽判官

青山隱隱水迢迢
秋盡江南草未凋
二十四橋

明月夜玉人何處教吹簫

許渾

塞下曲

夜戰桑乾雪
秦兵半不歸
朝來有鄉信
猶自寄寒衣

馬戴

楚江懷古

露氣寒光集
微陽下楚邱
猿啼洞庭樹
人在木

蘭舟廣澤生明月蒼山夾亂流雲中君不見竟
夕自悲秋

雍陶

和孫明府懷舊山

五柳先生本在山偶然為客落人間秋來見月
多歸思自起開籠放白鷗

朱慶餘

近試上張水部

洞房昨夜停紅燭待曉堂前拜舅姑妝罷低聲
問夫婿畫眉深淺入時無

溫庭筠

贈彈箏人

天寶年中事玉皇曾將新曲教寧王鈿蟬金雁
皆零落一曲伊州淚萬行

瑤瑟怨

冰簟銀床夢不成碧天如水夜雲輕雁聲遠過

瀟湘去十二樓中月自明

趙嘏

經汾陽舊宅

門前不改舊山河破膚曾輕馬伏波今日獨經
歌舞地古槐疎冷夕陽多

陳陶

隴西行

誓婦匈奴不顧身五千貂錦喪胡塵可憐無定

河邊骨猶是春閨夢裏人

李頻

渡漢江

嶺外音書絕經冬復歷春近鄉情更怯不敢問
來人

杜荀鶴

春宮怨

早被嬋娟誤欲妝臨鏡慵承恩不在貌教妾若

為容風暖鳥聲碎日高花影重年年越溪女相
憶采芙蓉

李洞

繡嶺宮詞

春日遲遲春草綠野棠開盡飄香玉繡嶺宮前
鶴髮翁猶唱開元太平曲

鄭谷

淮上與友人別

揚子江頭楊柳春楊花愁殺渡江人數聲風笛
離亭晚君向瀟湘我向秦

韋莊

金陵圖

江雨霏霏江草齊六朝如夢鳥空啼無情最是
臺城柳依舊烟籠十里隄

崔塗

除夜有感

迢遞三巴路
羈危萬里身
亂山殘雪夜
孤燭異鄉人
漸與骨肉遠
轉於童僕親
那堪正飄泊
明日歲華新

王駕

社日

鷺湖山下稻梁肥
豚柵雞棲半掩扉
桑柘影斜春社散
家家扶得醉人歸

秦韜玉

貧女

蓬門未識綺羅香
擬託良媒亦自傷
誰愛風流高格調
共憐時世儉梳妝
敢將十指誇鍼巧
不把雙眉鬪畫長
苦恨年年壓金線
為他人作嫁衣裳

聶夷中

田家

父耕原上田
子劬山下荒
六月禾未秀
官家已

修倉二月賣新絲五月糶新穀醫得眼前瘡
剗卻心頭肉我願君王心化作光明燭不照綺羅
筵只照逃亡屋

西鄙人

哥舒歌

北斗七星高哥舒夜帶刀至今窺牧馬不敢過
臨洮

七歲女子

送兄

別路雲初起離亭葉正飛所嗟人異雁不作一
行歸

開元宮人

袍中詩

沙場征戍客寒苦若為眠戰袍經手作知落阿
誰邊蓄意多添線含情更著綿今生已過也結
取後生緣

宮人韓氏

題紅葉

流水何太急深宮盡日間
殷勤謝紅葉好去到人間

李冶

寄校書七兄

無事烏程縣蹉跎歲月餘
不知芸閣吏寂寞竟何如
遠水浮仙棹寒星伴使車
因過大雷澤莫

忘幾行書

劉采春

囉唸曲

不喜秦淮水生憎江上船
載兒夫婿去經歲又經年

那年離別日只道往桐廬
桐廬人不見今得廣州書

莫作商人婦金釵當卜錢
朝朝江上望錯認幾

人船

杜秋娘

金縷詞

勸君莫惜金縷衣
勸君惜取少年時
花開堪折直須折
莫待無花空折枝

寒山

書石壁詩

益者益其精可名為有益
易者易其形是名之

有易能益復能易
當得上仙籍
無益復無易
終不免死厄

下愚讀我詩不解卻嗤誚
中庸讀我詩思量云
甚要上賢讀我詩
把著滿面笑
楊修見幼婦一覽便知妙

金地藏

送童子下山

空門寂寞汝思家
禮別雲房下九華
愛向竹欄

騎竹馬懶於金地聚金沙
添瓶澗底休招月烹茗甌
中罷弄花好去不須頻下
淚老僧相伴有烟霞

呂祖

題扇

何用聰明萬卷書只須卑陋一廛居
草於間處生徧密花到春深看漸疎
綠水滿渠繞屋後青山無數捲簾初
相過莫厭柴門窄細柳高槐可

駐車

岳陽樓

朝遊北海暮蒼梧袖有青蛇膽氣粗
三醉岳陽人不識朗吟飛過洞庭湖

許宣平

題石壁上李白詩後

一池荷葉衣無盡兩畝黃精食有餘
又被人來尋討著移庵不免更深居

裴航

贈樊夫人

向為胡越猶懷想况遇天仙隔錦屏
儻若玉京朝會去願隨鸞鶴入青冥

許碣

醉吟

閨苑花前是醉鄉踏翻王母九霄觴
羣仙拍手嫌輕薄謫向人間作酒狂

戚道遥

歌

笑看滄海欲成塵王母花前別衆真
千歲卻歸天上去一心珍重世間人

南溟夫人

題玉壺贈元柳二子

來從一葉舟中來去向百花橋上去
若到人間扣玉壺鴛鴦自解分明語

樊夫人

荅裴航

一飲瓊漿百感生
玄霜擣盡見雲英
藍橋便是神仙窟
何必崎嶇上玉京

湘妃廟女子

無題

少將風月怨平湖
見盡扶桑水到枯
相約杏花壇上去
畫闌紅子鬪櫻蒲

肅宗皇帝

賜梨李泌與諸王聯句

先生年幾許
顏色似童兒
王瀨夜抱九仙骨
朝披一品衣
王信不食千鍾粟
唯餐兩顆梨
王益天生此
間氣助我化無為
肅宗

天籟續集目錄之一

唐

康衢謠

伊耆氏蜡辭

虞

卿雲歌

八伯歌

帝載歌



夏

夏后鑄鼎繇

夏諺

商

盤銘

周

書井

白雲謠

虞箴

飯牛歌

優孟歌

臨河歌

楚聘歌

盤操

徐人歌

琴歌

吳夫差時童謠

逸詩

古諺

彈歌

韓非子

鄒子引古語

慎子

湘中漁歌

秦

楚人謠

漢

四皓

紫芝歌

王昭君

怨詩

高彪

清誠

孔融

失題

無名氏擬蘇李詩

古詩

古絕句一首

薤露歌

蒿里曲

長歌行

相逢行

善哉行

艷歌何嘗行二首

枯魚過河泣

古八變歌

成帝時童謠

桓帝初小麥童謠

城上烏童謠

史記

漢書

桓子新論引諺

牟子引古諺

魏

武帝

苦寒行

文帝

雜詩

甄后

塘上行

陳思王植

怨歌行

名都篇

美女篇

白馬篇

王粲

公讌詩

七哀詩

徐幹

室思

劉楨

贈從弟三章

應璩

雜詩

嵇康

贈秀才八軍

雜詩

阮籍

詠懷

晉

張華

情詩

陸機

飲馬長城窟行

門有車馬客行

猛虎行

陸雲

谷風

潘尼

迎大駕

左思

雜詩

張協

雜詩

王讚

雜詩

郭璞

遊仙詩

劉琨

扶風歌

謝尚

大道曲

陶淵明

時運四章并序

示周續之祖企謝景夷三郎

答龐參軍并序

癸卯十二月中作與從弟敬遠

始作鎮軍參軍經曲阿作

辛丑歲七月赴假還江陵夜行塗口

歸田園居

癸卯歲始春懷古田舍二首

雜詩

詠貧士

天籟續集

唐

康衢謠

立我蒸民莫匪爾極不識不知順帝之則

伊耆氏蜡辭

土反其宅水歸其壑昆蟲毋作草木歸其澤

虞

卿雲歌

卿雲爛兮紉縵縵兮日月光華旦復旦兮

八伯歌

明明上天爛然星陳日月光華弘于一人

帝載歌

日月有常星辰有行四時順經萬姓允誠於予
論樂配天之靈遷于賢善莫不咸聽襲乎鼓之
軒乎舞之菁華已竭褰裳去之

夏

夏后鑄鼎繇

逢逢白雲一南一北一西一東九鼎既成遷於

三國

夏諺

吾王不遊吾何以休吾王不豫吾何以助一遊
一豫為諸侯度

商

盤銘

苟日新日日新又日新

周

書井

原泉滑滑連旱則絕取事有常賦斂有節

白雲謠

白雲在天丘陵自出道里悠遠山川間之將子
無死尚復能來

虞箴

芒芒禹跡畫為九州經啟九道民有寢廟獸有
茂草各有攸處德用不擾在帝夷羿冒于原獸
忘其國恤而思其麇壯武不可重用不恢于夏
家獸臣司原敢告僕夫

飯牛歌

南山斫白石爛生不逢堯與舜禪短布單衣適
至斲從昏飯牛薄夜半長夜漫漫何時旦
滄浪之水白石粲中有鯉魚長尺半弊布單衣

裁至斝清朝飯牛至夜半黃犢上坂且休息吾
將捨汝相齊國

出東門兮厲石班上有松柏青且闌麤布衣兮
緼纓時不遇兮堯舜主牛兮努力食細草大臣
在爾側吾當與汝適楚國

優孟歌

貪吏而不可為而可為廉吏而可為而不可為
貪吏而不可為者當時有污名而可為者子孫

以家成廉吏而可為者當時有清名而不可為
者子孫困窮被褐而負薪貪吏常苦富廉吏常
苦貧獨不見楚相孫叔敖廉潔不受錢

臨河歎

狄水衍兮風揚波舟楫顛倒更相加歸來歸來
胡為斯

楚聘歌

大道隱兮禮為基賢人竄兮將待時天下如一

兮欲何之

盤操

乾澤而漁蛟龍不游覆巢毀卵鳳不翔留慘予
心悲還原息陬

徐人歌

延陵季子兮不忘故脫千金之劍兮帶丘墓

琴歌

樂莫樂兮新相知悲莫悲兮生別離

吳夫差時童謠

梧宮秋吳王愁

逸詩

侯河之清人壽幾何北云詢多職競作羅
雖有絲麻無棄管蒯雖有姬姜無棄蕉萃凡百
君子莫不代匱

古諺

獸惡其網民怨其上

衆心成城衆口鑠金
從善如登從惡如崩

彈歌

斷竹續竹飛土逐宍

韓非子

奔車之上無仲尼覆舟之下無伯夷

鄒子引古語

截趾適履孰云其愚何與斯人追欲喪軀

慎子

不聰不明不能為王不瞽不聾不能為公

湘中漁歌

帆隨湘轉望衡九面

秦

楚人謠

楚雖三戶亡秦必楚

漢

四皓

紫芝歌

莫莫高山深谷逶迤曄曄紫芝可以療饑唐虞
世遠吾將何歸駟馬高蓋其憂甚大富貴之畏
人兮不若貧賤之肆志

王昭君

怨詩

秋木萋萋其葉萎黃有鳥處山集于苞桑養育

毛羽形容生光既得升雲上遊曲房離宮絕曠
身體摧藏志念抑沈不得頡頏雖得委食心有
徊徨我獨伊何來往變常翩翩之燕遠集西羌
高山峩峩河水泱泱父兮母兮道里悠長嗚呼
哀哉憂心惻傷

高彪

清誠

天長而地久人生則不然又不養以福使全其

壽年飲酒病我性思慮害我神美色伐我命利
欲亂我真神明無聊賴愁毒於衆煩中年棄我
逝忽若風過山形氣各分離一往不復還上士
愍其痛抗志凌雲烟滌蕩去穢累飄邈任自然
退修清以淨存我玄中玄澄心剪思慮泰清不
受塵恍惚中有物希微無形端智慮赫赫盡谷
神綿綿存

孔融

失題

歸家酒債多門客筴成行高談滿四座一日傾
千觴

無名氏擬蘇李詩

鳳凰鳴高岡有翼不好飛安知鳳凰德貴其來
見稀

古詩

採葵莫傷根傷根葵不生結交莫羞貧羞貧友

不成

甘瓜抱苦蒂美棗生荆棘利傍有倚刀貪人還
自賊

古絕句一首

藁砧今何在山上復有山何當大刀頭破鏡飛
上天

薤露歌

薤上露何易晞露晞明朝更復落人死一去何

時歸

蒿里曲

蒿里誰家地聚斂魂魄無賢愚鬼伯一何相催
促人命不得少踟蹰

長歌行

青青園中葵朝露待日晞陽春布德澤萬物生
光輝常恐秋節至焜黃華葉衰百川東到海何
時復西歸少壯不努力老大徒傷悲

相逢行

相逢狹路間道隘不容車不知何年少夾轂問
君家君家誠易知易知復難忘黃金為君門白
玉為君堂堂上置樽酒作使邯鄲倡中庭生桂
樹華燈何煌煌兄弟兩三人中子為侍郎五日
一來歸道上自生光黃金絡馬頭觀者盈道旁
入門時左顧但見雙鴛鴦鴛鴦七十二羅列自
成行音聲何嗷嗷鶴鳴東西廂大婦織綺羅中

婦織流黃小婦無所為挾瑟上高堂丈人且安
坐調絲方未央

善哉行

來日大難口燥脣乾今日相樂皆當喜歡解一經
歷名山芝草翻翻仙人王喬奉藥一九解二自惜
袖短內手知寒慚無靈輒以報趙宣解三月沒參
橫北斗闌干親交在門饑不及餐解四歡日尚少
戚日苦多以何忘憂彈箏酒歌解五淮南八公要

道不煩參駕六龍游戲雲端解六

豔歌何嘗行二首

飛來雙白鵝乃從西北來十五五羅列成行
妻卒被病行不能相隨五里一返顧六里一徘徊
吾欲銜汝去口噤不能開吾欲負汝去毛羽
何摧頽樂哉新相知愛來生別離躊躇顧羣侶
淚下不自知

念與君離別氣結不能言各各重自愛遠道歸

還難妾當守空房閉門下重關若生當相見亡
者會黃泉今日樂相樂延年萬歲期

枯魚過河泣

枯魚過河泣何時悔復及作書與魴鱓相教慎
出入

古八變歌

北風初秋至吹我章華臺浮雲多暮色似從崦
嵫來枯桑鳴中林絡緯響空階翩翩飛蓬征愴

愴遊子懷故鄉不可見長望始此回

成帝時童謠

燕燕尾涎涎張公子時相見木門倉琅根燕飛
來啄皇孫皇孫死燕啄矢

桓帝初小麥童謠

小麥青青大麥枯誰當穫者婦與姑丈夫何在
西擊胡吏買馬君具車請為諸君鼓隴胡

城上烏童謠

城上烏尾畢逋公為吏子為徒一徒死百乘車
車班班入河間河間姹女工數錢以錢為室金
為堂石上慊慊春黃梁梁下有懸鼓我欲擊之
丞相怒

史記

蓬生麻中不扶自直白沙在泥與之皆黑

漢書

水至清則無魚人至察則無徒

桓子新論引諺

人聞長安樂則出門而西向笑知肉味美則對屠門而大嚼

牟子引古諺

少所見多所怪見橐駝言馬腫背

魏

武帝

苦寒行

北上太行山艱哉何巍巍羊腸坂詰屈車輪為
之摧樹木何蕭瑟北風聲正悲熊羆對我蹲虎
豹夾路啼谿谷少人民雪落何霏霏延頸長歎
息遠行多所懷我心何怫鬱思欲一東歸水深
橋梁絕中路正徘徊迷惑失故路薄暮無宿棲
行行日已遠人馬同時飢擔囊行取薪斧冰持
作糜悲彼東山詩悠悠使我哀

文帝

雜詩

西北有浮雲亭亭如車蓋惜哉時不遇適與飄
風會吹我東南行行行至吳會吳會非我鄉安
得久留滯棄置勿復陳容子常畏人

甄后

塘上行

蒲生我池中其葉何離離傍能行仁義莫若妾
自知衆口鑠黃金使君生別離念君去我時獨

愁常苦悲想見君顏色感結傷心脾念君常苦
悲夜夜不能寐莫以豪賢故棄捐素所愛莫以
魚肉賤棄捐葱蔥與薤莫以麻枲賤棄捐管與蒯
出亦復苦愁入亦復苦愁邊地多悲風樹木何
脩脩從軍致獨樂延年壽千秋

陳思王植

怨歌行

為君既不易為臣良獨難忠信事不顯乃有見

疑患周公佐成王金滕功不利推心輔王室二
叔反流言待罪居東國泣涕常流連皇靈大動
變震雷風且寒拔樹偃秋稼天威不可干素服
開金滕感悟求其端公旦事既顯成王乃哀歎
吾欲竟此曲此曲悲且長今日樂相樂別後莫
相忘

名都篇

名都多妖女京洛出少年寶劍直千金被服麗

且鮮鬪雞東郊道走馬長楸閒馳騁未能半雙
免過我前攬弓捷鳴鏑長驅上南山左挽因右
發一縱兩禽連餘巧未及展仰手接飛鳶觀者
咸稱善衆工歸我妍歸來宴平樂美酒斗十千
膾鯉膾胎鰕炮鼈炙熊蹯鳴儔嘯匹侶列坐竟
長筵連翩擊鞠壤巧捷惟萬端白日西南馳光
景不可攀雲散還城邑清晨復來還

美女篇

美女妖且閒採桑岐路間柔條紛冉冉落葉何
翩翩攘袖見素手皓腕約金環頭上金爵釵腰
佩翠琅玕明珠交玉體珊瑚間木難羅衣何飄
飄輕裾隨風還顧盼遺光彩長嘯氣若蘭行徒
用息駕休者以忘餐借問女安居乃在城南端
青樓臨大路高門結重關容華耀朝日誰不希
令顏媒氏何所營玉帛不時安佳人慕高義求
賢良獨難衆人徒嗷嗷安知彼所觀盛年處房

室中夜起長歎

白馬篇

白馬飾金羈連翩西北馳借問誰家子幽并遊
俠兒少小去鄉邑揚聲沙漠垂宿昔秉良弓楛
矢何參差控絃破左的右發摧月支仰手接飛
猱俯身散馬蹄狡捷過猿猴勇剽若豹螭邊城
多警急胡鹵數遷移羽檄從北來厲馬登高堤
長驅蹈匈奴左顧凌鮮卑棄身鋒刃端性命安

可懷父母且不顧何言子與妻名編壯士籍不
得中顧私捐軀赴國難視死忽如歸

王粲

公讌詩

昊天降豐澤百卉挺葳蕤涼風撤蒸暑清雲却
炎暉高會君子堂竝坐蔭華棖嘉肴充圓方旨
酒盈金壘管絃發徽音曲度清且悲合坐同所
樂但翹杯行遲常聞詩人語不醉且無歸今日

不極歡含情欲待誰見春良不翅守分豈能違
古人有遺言君子福所綏願我賢主人與天享
巍巍克符周公業奕世不可追

七哀詩

荆蠻非吾鄉何為久滯滯方舟泝大江日暮愁
我心山岡有餘映巖阿增重陰狐狸馳赴穴飛
鳥翔故林流波激清響猴猿臨岸吟迅風拂裳
袂白露沾衣襟獨夜不能寐攝衣起撫琴絲桐

感人情為我發悲音羈旅無終極憂思壯難任

徐幹

室思

人靡不有初想君能終之別來歷年歲舊恩何
可期重新而忘故君子所猶譏寄身雖在遠豈
忘君須臾既厚不為薄想君時見思

劉楨

贈從弟三章

汎汎東流水磷磷水中石蘋藻生其涯華紛何
擾溺采之薦宗廟可以羞嘉客豈無園中葵慙
此出深澤

亭亭山上松習習谷中風風聲一何盛松枝一
何勁冰霜正慘悽終歲常端正豈不罹凝寒松
柏有本性

鳳凰集南嶽徘徊孤竹根於心有不厭奮翅凌
紫氛豈不常勤苦羞與黃雀羣何時當來儀將

須聖明君

應璩

雜詩

細微可不慎隄潰自蟻穴
腠理蚤從事安復勞
鍼石哲人覩未形愚夫闇
明白曲突不見賓焦
爛為上客思願獻良規
江海倘不逆狂言雖寘
善猶有如雞跖雞跖食
不已齊王為肥澤

嵇康

贈秀才入軍

息徒蘭圃秣馬華山流磻
平皋垂綸長川日送
歸鴻手揮五絃俯仰自得
游心太玄嘉彼釣叟
得魚忘筌郢人逝矣誰
與盡言

雜詩

微風清扇雲氣四除皎皎
亮月麗于高隅興命
公子攜手同車龍驥翼翼
揚鑣踟躕肅肅宵征
造我友盧光燈吐輝華幔
長舒鸞觴酌醴神鼎

烹魚絃超子野歎過綿駒流詠太素俯讚玄虛
孰克英賢與爾剖符

阮籍

詠懷

嘉樹下成蹊東園桃與李秋風吹飛藿零落從
此始繁華有憔悴堂上生荆杞驅馬舍之去去
上西山陟一身不自保何況戀妻子凝霜被野
草歲暮亦云已

步出上東門北望首陽岑下有采薇士上有嘉
樹林良辰在何許凝霜霑衣襟寒風振山岡玄
雲起重陰鳴雁飛南征題鴉發哀音素質游商
聲悽愴傷我心

晉

張華

情詩

清風動帷簾晨月照幽房佳人霞遊遠蘭室無

容光襟懷擁虛景輕衾覆空牀居歡惜夜促在
戚怨宵長拊枕獨嘯歎感慨心內傷
游目四野外逍遙獨延伫蘭蕙緣清渠繁華蔭
綠渚佳人不在茲取此欲誰與巢居知風寒穴
處識陰雨不曾遠別離安知慕儔侶

陸機

飲馬長城窟行

驅馬陟陰山山高馬不前往問陰山候勁鹵在

燕然戎車無停軌旌旆屢徂遷仰憑積雪巖俯
涉堅冰川冬來秋未返去家邈以綿獵犹亮未
夷征人豈徒旋末德爭先鳴凶器無兩全師克
薄賞行軍沒微軀捐將遵甘陳迹收功單于旃
振旅勞歸士受爵藁街傳

門有車馬客行

門有車馬客駕言發故鄉念君久不歸濡跡涉
江湘投袂赴門塗攬衣不及裳拊膺携客泣掩

淚敘溫涼借問邦族間惻愴論存亡親友多零
落舊齒皆彫喪市朝互遷易城闕或邱荒墳壟
日月多松柏鬱芒芒天道信崇替人生安得長
慷慨惟平生俛仰獨悲傷

猛虎行

渴不飲盜泉水熱不息惡木陰惡木豈無枝志
士多苦心整駕肅時命杖策將遠尋饑食猛虎
窟寒棲野雀林日歸功未建時往歲載陰崇雲

臨岸駭鳴條隨風吟靜言幽谷底長嘯高山岑
急絃無懦響亮節難為音人生誠未易曷云開
此襟眷我耿介懷俯仰愧古今

陸雲

谷風

閒居外物靜言樂幽繩樞增結甕牖綢繆和神
當春清節為秋天地則爾戶庭已悠

潘尼

迎大駕

南山鬱岑峯洛川迅且急青松蔭脩嶺綠繁被
廣隰朝日順長途夕暮無所集歸雲乘憶浮淒
風尋惟入道逢深識士舉手對吾揖世故尚未
夷峭函方嶮澁狐狸夾兩轅豺狼當路立翔鳳
嬰籠檻騏驥見維繫俎豆昔嘗聞軍旅素未習
且少停君駕徐待干戈戢

左思

雜詩

秋風何冽冽白露為朝霜柔條旦夕勁綠葉日
夜黃明月出雲崖皦皦流素光披軒臨前庭噉
噉晨雁翔高志局四海塊然守空堂壯齒不恒
居歲暮常慨慷

張協

雜詩

秋夜涼風起清氣蕩暄濁蜻蛚吟階下飛蛾拂

明燭君子從遠役佳人守燿獨離居幾何時鑽
燧忽改木房櫳無行迹庭草萋以綠青苔依空
牆蜘蛛網四屋感物多所懷沈憂結心曲
大火流坤維白日馳西陸浮陽映翠林迴颺扇
綠竹飛雨灑朝蘭輕露棲叢菊龍蟄暄氣凝天
高萬物肅弱條不重結芳蕤豈再馥人生瀛海
內忽如鳥過目川上之歎逝前修以自勗
朝霞迎白日丹氣臨湯谷翳翳結繁雲森森散

雨足輕風摧勁草凝霜竦高木密葉日夜疎叢
林森如束疇昔歎時遲晚節悲年促歲暮懷百
憂將從季主卜
述職投邊城羈束戎旅間下車如昨日望舒四
五圓借問此何時胡蝶飛南園流波戀舊浦行
雲思故山閩越衣文地胡馬願度燕土風安所
習由來有固然

王讚

雜詩

朔風動秋草邊馬有歸心胡寧久分析靡靡忽
至今王事離我志殊隔過商參昔往倉庚鳴今
來蟋蟀吟人情懷舊鄉客鳥思故林師涓久不
奏誰能宣我心

郭璞

遊仙詩

京華游俠窟山林隱遯棲朱門何足榮未若託

蓬萊臨源挹清波陵岡掇丹雘靈谿可潛盤安
事登雲梯漆園有傲吏萊氏有逸妻進則保龍
見退為觸藩羝高蹈風塵外長揖謝夷齊
翡翠戲蘭苕容色更相鮮綠蘿結高林蒙籠蓋
一山中有冥寂士靜嘯撫清絃放情凌霄外嚼
蕊挹飛泉赤松臨上游駕鴻乘紫烟左挹浮邱
袖右拍洪崖肩借問蜉蝣輩寧知龜鶴年
六龍安可頓運流有代謝時變感人思已秋復

願夏淮海變微禽吾生獨不化雖欲騰丹谿雲
螭非我駕愧無魯陽德迴日向三舍臨川哀年
邁撫心獨悲叱

逸翮思拂霄迅足羨遠游清源無增瀾安得運
吞舟珪璋雖特達明月難闇投潛穎怨清陽陵
蒼哀素秋悲來惻丹心零淚緣纓流

晦朔如循環月盈已復魄蓐收清西陸朱羲將
由白寒露拂陵茗女蘿辭松柏薜蘿不終朝蜉

蝥豈見夕圓丘有竒草鍾山出靈液王孫列八
珍安期鍊五石長揖當途人去來山林客

劉琨

扶風歌

朝發廣莫門暮宿丹水山左手彎繁弱右手揮
龍淵顧瞻望宮闕俯仰御飛軒據鞍長歎息淚
下如流泉繫馬長松下發鞍高岳頭烈烈悲風
起泠泠澗水流揮手長相謝哽咽不能言浮雲

為我結歸鳥為我旋去家日已遠安知存與亡
慷慨窮林中抱膝獨推藏麋鹿游我前猿猴戲
我側資糧既乏盡薇蕨安可食攬轡命徒侶吟
嘯絕巖中君子道微矣夫子故有窮惟昔李騫
期寄在匈奴庭忠信反獲罪漢武不見明我欲
竟此曲此曲悲且長棄置勿重陳重陳令心傷

謝尚

大道曲

青陽二三月柳青桃復紅車馬不相識音落黃
埃中

陶淵明

時運四章并序

時運游暮春也春服既成景物斯和偶
影獨遊欣慨交心

邁邁時運穆穆良朝襲我春服薄言東郊山滌
餘霽宇曖微霄有風自南翼彼新苗

洋洋平津乃漱乃濯邈邈遐景載欣載矚稱心
而言人亦易足揮茲一觴陶然自樂
延目中流悠悠清沂童冠齊業閒詠以歸我愛
其靜寤寐交輝但恨殊世邈不可追
斯晨斯夕言息其廬花藥分列林竹翳如清琴
橫牀濁酒半壺黃唐莫逮慨獨在予

示周續之祖企謝景夷三郎

時三人皆講禮校書

負疴頽檐下終日無一欣藥石有時聞念我意

中人相去不尋常道路邈何因周生述孔業祖
謝響然臻道喪向千載今朝復斯聞馬隊非講
肆校書亦已勤老夫有所愛思與爾為鄰願言
誨諸子從我潁水濱

所任公解近馬隊故
諷之終要以潁濱

續之已入廬山會刺史檀
韶苦請出州在城外講禮

答龐參軍并序

三復來貺欲罷不能自爾鄰曲冬春再
交款然良對忽成舊游俗諺云數面成

親舊况情過此者乎人事好乖便當語
離楊公所歎豈惟常悲吾抱疾多年不
復為文本既不豐復老病繼之輒依周
孔往復之義且為別後相思之資

相知何必舊傾蓋定前言有客賞我趣每每顧
林園談諧無俗調所說聖人篇或有數斗酒閒
飲自歡然我實幽居士無復東西緣物新人惟
舊弱毫多所宣情通萬里外形迹滯江山若其

愛體素來會在何年

癸卯十二月中作與從弟敬遠

寢迹衡門下邈與世相絕顧盼莫誰知荆扉晝
常閉淒淒歲暮風翳翳經夕雪傾耳無希聲在
目皓已潔勁氣侵襟袖簞瓢謝屢設蕭索空宇
中了無一可悅歷覽千載書時時見遺烈高操
非所攀深得固窮節平津苟不由棲遲詎為拙
寄意一言外茲契誰能別

始作鎮軍參軍經曲阿作

弱齡寄事外委懷在琴書被褐欣自得屢空常
晏如時來苟宜會宛轡憩通衢投策命晨裝暫
與園田疎眇眇孤舟逝綿綿歸思紆我行豈不
遙登陟千里餘目倦川途異心念山澤居望雲
慙高鳥臨水愧游魚真想初在襟誰謂形跡拘
聊且憑化遷終返班生廬

辛丑歲七月赴假還江陵夜行塗口

閒居三十載遂與塵事冥詩書敦夙好林園無
世情如何捨此去遙遙至南荆叩枻新秋月臨
流別友生涼風起將夕夜景湛虛明昭昭天宇
濶晶晶川上平懷役不遑寐中宵尚孤征商歌
非吾事依依在耦耕投冠旋舊墟不為好爵縈
養真衡茅下庶以善自名

歸田園居

野外罕人事窮巷窻輪鞅白日掩荆扉虛室絕

塵想時復墟曲中披衣共來往相見無雜言但
道桑麻長桑麻日已長我土日已廣常恐霜霰
至零落同草莽
種豆南山下草盛豆苗稀晨興理荒穢帶月荷
鋤歸道狹草木長夕露沾我衣衣沾不足惜但
使願無違

癸卯歲始春懷古田舍二首

在昔聞南畝當年竟未踐屢空既有人春興豈

自免夙晨裝吾駕啟塗情已緬烏弄歡新節冷
風送餘善寒竹被荒蹊地為罕人遠是以植杖
翁悠然不復返即理愧通識所保詎乃淺

先師有遺訓憂道不憂貧瞻望邈難逮轉欲志
常勤秉耒歡時務解顏勸農人平時交遠風良
苗亦懷新雖未量歲功即事多所欣耕種有時
息行者無問津日入相與歸壺觴勞近鄰長吟
掩柴門聊為隴畝民

雜詩二首

人生無根蒂飄如陌上塵
分散逐風轉此已非常
身落地為兄弟何必骨肉親
得歡當作樂斗酒聚比鄰
盛年不重來一日難再晨
及時當勉勵歲月不待人

白日淪西阿素月出東嶺
遙遙萬里輝蕩蕩空
中景風來入房戶夜中枕席冷
氣變悟時易不眠知夕永
欲言無予和揮杯勸孤影
日月擲人

去有志不獲騁念此懷悲悽
終曉不能靜

詠貧士

萬族各有託孤雲獨無依
暖暖空中滅何時見
餘暉朝霞開宿霧衆鳥相與飛
遲遲出林翮未夕復來歸
量力守故轍豈不寒與饑
知音苟不存已矣何所悲

天籟續集目錄之二

宋

顏延之

五君詠五首

阮步兵

嵇中散

劉參軍

阮始平



向常侍

謝靈運

過始寧墅

七里瀨

登池上樓

遊南亭

遊赤石進帆海

田南樹園激流植援

石門新營所住四面高山迴溪石瀨茂林

修竹

從斤竹澗越嶺溪行

廬陵王墓下作

酬從弟惠連五章

初發石首城

入彭蠡湖口

初往新安桐廬口

謝惠連

西陵遇風獻康樂五章

秋懷

擣衣

鮑照

代放歌行

代東武吟

代出自薊北門行

代鳴雁行

擬行路難

代淮南王

代夜坐吟

代春日行

詠史

擬古

齊

謝朓

江上曲

遊東田

暫使下都夜發新林至京邑贈西府同僚

酬王晉安

新亭渚別范零陵雲

晚登三山還望京邑

直中書省

宣城郡內登望

高齋視事

落日悵望

和徐都曹出新亭渚

和王中丞聞琴

臨溪送別

梁

江淹

魏文帝曹丕遊宴

劉太尉琨傷亂

柳惲

擣衣詩五首

吳均

酬別江主簿屯騎

何遜

與蘇九德別

王籍

入若耶溪

陳

陰鏗

渡青草湖

北魏

楊白花

北齊

蕭愨

秋思

北周

庾信

詠畫屏風

梅花

隋

虞世基

出塞

補遺

魏

陳思王植

贈白馬王彪

送應氏詩二首

嵇康

幽憤詩

阮籍

詠懷

晉

潘岳

內顧詩二首

左思

招隱二首

宋

謝靈運

晚出西射堂

鮑照

擬古

漢列仙

陰長生

古詩二首

天籟續集

宋

顏延之

五君詠五首

阮步兵

阮公雖淪跡
識密鑒亦洞
沈醉似埋照
寓辭類
託諷長嘯若
懷人越禮自
驚衆物故不
可論途
窮能無慟

嵇中散

中散不偶世本自餐霞人形解驗默仙吐論知
凝神立俗迥流議尋山洽隱淪鸞翮有時鍛龍
性誰能馴

劉參軍

劉伶善閉關懷情滅聞見鼓鐘不足歡榮色豈
能眩韜精日沈飲誰知非荒宴頌酒雖短章深
衷自此見

阮始平

仲容青雲器實稟生民秀達音何用深識微在
金奏郭弈已心醉山公非虛覲屢薦不入官一
麾乃出守

向常侍

向秀甘淡薄深心託毫素探道好淵玄觀書鄙
章句交呂既鴻軒攀嵇亦鳳舉流連河裏游惻
愴山陽賦

謝靈運

過始寧墅

東髮懷耿介
逐物遂推遷
違志似如昨
二紀及茲年
溜磷謝清曠
疲繭慙貞堅
拙疾相倚薄
還得靜者便
剖竹守滄海
枉帆過舊山
山行窮登頓
水涉盡洄沿
巖峭嶺稠疊
洲縈渚連綿
白雲抱幽石
綠篠媚清漣
葺宇臨迴江
築觀基曾巔
揮手告鄉曲
三載期歸旋
且為樹枌櫨
無令孤

願言

七里瀨

羈心積秋晨
晨積展游眺
孤客傷逝湍
徒旅苦奔峭
石淺水潺湲
日落山照曜
荒林紛沃若
哀禽相叫嘯
遭物悼遷斥
存期得要妙
既秉上皇心
豈屑末代誚
目睹巖子瀨
想屬任公釣
誰謂古今殊
異代可同調

登池上樓

潛虬媚幽姿飛鴻響遠音薄霄愧雲浮棲川作
淵沈進德智所拙退耕力不任狗祿返窮海卧
疴對空林衾枕昧節候褰開暫窺臨傾耳聆波
瀾舉目眺嶮嶽初景草緒風新陽改故陰池塘
生春草園柳變鳴禽祈祈傷幽歌萋萋感楚吟
索居易永久離羣難處心持操豈獨古無悶徵
在今

遊南亭

時竟夕澄霽雲歸日西馳密林含餘清遠峯隱
半規久痲昏墊苦旅館眺郊岐澤蘭漸被徑芙
蓉始發池未厭青春好已觀朱明移戚戚感物
歎星星白髮垂藥餌情所止衰疾忽在斯逝將
候秋水息景偃蕩崖我志誰與亮賞心惟良知

游赤石進帆海

首夏猶清和芳草亦未歇水宿淹晨暮陰霞屢
興沒周覽倦瀛壖况乃凌窮髮川后時安流天

吳靜不發揚帆採石華挂席拾海月溟漲無端
倪虛舟有超越仲連輕齋組子牟眷魏闕矜名
道不足適已物可忽請附任公言終然謝天伐

田南樹園激流植援

樵隱俱在山由來事不同不同非一事養疴亦
園中中園屏氛雜清曠招遠風卜室倚北阜啟
扉面南江激澗代汲井挿槿當列壟羣木既羅
戶衆山亦當窻靡迤邐下田迢遞瞰高峯窻欲

不期勞即事罕人功唯開蔣生徑永懷求羊蹤
賞心不可忘妙善異能同

石門新營所住四面高山迴溪石瀨茂林

脩竹

躋險築幽居披雲卧石門苔滑誰能步葛弱豈
可捫嫋嫋秋風過萋萋春草繁美人游不還佳
期何由敦芳塵凝瑤席清醕滿金尊洞庭空波
瀾桂枝徒攀翻結念屬宵漢孤景莫與護俯濯

石下潭仰看條上猿早聞夕颺急晚見朝日暎
崖傾光難留林深響易奔感往憲有復理來情
無存庶持乘日車得以慰營魂匪為衆人說異
與智者論

從斤竹澗越嶺溪行

猿鳴誠知曙谷幽光未顯巖下雲方合花上露
猶泫逶迤傍隈隩迢遞陟陁峴過澗既厲急登
棧亦陵緬川渚屢逕復乘流翫迴轉蘋萍泛沈

深菰蒲冒清淺企石挹飛泉攀林摘葉卷想見
山阿人薜蘿若在眼握蘭勤徒結折麻心莫展
情用賞為美事昧竟誰辨觀此遺物慮一悟得
所遣

廬陵王墓下作

曉月發雲陽落日次朱方含悽泛廣川灑淚眺
連岡春言懷君子沈痛切中腸道消結憤懣運
開申悲涼神期恒若存德音初不忘徂謝易永

久松柏森已行延州協心許楚老惜蘭芳解劍
竟何及撫墳徒自傷平生疑若人通蔽互相妨
理感深情慟定非識所將脆促良可哀天枉特
兼常一隨往化滅安用空名揚舉聲泣已漉長
歎不成章

酬從弟惠連五章

寢瘵謝人徒滅迹入雲峯巖壑寓耳目歡愛隔
音容永絕賞心望長懷莫與同末路值令弟開

顏披心胷

心胷既云披意得咸在斯凌澗尋我室散帙問
所知夕憲曉月流朝忘曛日馳悟對無厭歇聚
散成分離

分離別西川迴景歸東山別時悲已甚別後情
更延頌想遲嘉音果枉濟江篇辛勤風波事歎

曲洲渚言

洲渚既淹時風波子行遲務協華京想詎存空

谷期猶復惠來章祇足攬余思儻若果歸言共
陶暮春時

暮春雖未交仲春善遊遨山桃發紅萼野蕨漸
紫苞嚶鳴已悅豫幽居猶鬱陶夢寐仁歸舟釋
我吝與勞

初發石首城

白珪尚可磨斯言易為緇雖抱中孚爻猶勞貝
錦詩寸心若不亮微命察如照日月垂光景成

貸遂無茲出宿薄京畿晨裝搏曾颺重經平生
別再與朋知辭故山日已遠風波豈還時迢迢
萬里帆茫茫終何之游當羅浮行息必廬霍期
越海陵三山游湘歷九嶷欽聖若旦暮懷賢亦
悽其皎皎明發心不為歲寒欺

入彭蠡湖口

客遊倦水宿風潮難具論洲島驟迴合圻岸屢
崩奔乘月聽哀欵浥露馥芳蓀春晚綠野秀巖

高白雲屯千念集日夜萬感盈朝昏攀崖照石
鏡牽葉入松門三江事多往九派理空存靈物
去珍怪異人秘精魂金膏滅明光水碧綴流溫
徒作千里曲絃絕念彌敦

初往新安桐廬口

締綌雖淒其授衣尚未至感節良已深懷古亦
云思不有千里棹孰申百代意遠協尚子心遙
得許生計既及冷風善又即秋水駛江山共開

曠雲日相照媚景夕羣物清對玩咸可憇

謝惠連

西陵遇風獻康樂五章

我行指孟春春仲尚未發趣途遠有期念離情
無歇成裝候良辰漾舟陶嘉月瞻塗意少悰還
顧情多闕

哲兄感仳別相送越垌林飲餞野亭館分袂澄
湖陰悽悽留子言眷眷浮客心迴塘隱艫棧遠

望絕形音

靡靡卽長路戚戚抱遙悲
遙但自弭路長當語誰
行行道轉遠去去情彌
遲昨發浦陽汭今宿浙江湄

屯雲蔽曾嶺驚風湧飛流
零雨潤墳澤落雪灑林邱
浮氛晦崖巘積素惑原疇
曲汜薄停旅通川絕行舟

臨津不得濟伫楫阻風波
蕭條洲渚際氣色少

諧和西瞻興游歎東睇起悽歌
積憤成疾痼無萱將如何

秋懷

平生無志意少小嬰憂患
如何乘苦心矧復值秋晏
皎皎天月明奕奕河宿爛
蕭瑟含風蟬寥唳度雲雁
寒商動清閨孤燈暖幽幔
耿介繁慮積展轉長宵半
夷險難預謀倚伏昧前算
雖好相如達不同長卿慢
頗悅鄭生偃無取白衣宦

未知古人心且從性所翫賓至可命觴朋來當
染翰高臺驟登踐清波時陵亂顏魄不再圓傾
義無兩旦金石終銷毀丹青暫彫煥各勉玄髮
歡無貽白首歎因歌遂成賦聊用布親串

擣衣

衡紀無淹度晷運倏如催白露滋園菊秋風落
庭槐肅肅莎雞羽烈烈寒螿啼夕陰結空幕宵
月皓中閨美人戒裳服端飾相招携簪玉出北

房鳴金步南階欄高砧響發楹長杵聲哀微芳
起兩袖輕汗染雙頰紈素既已成君子行未歸
裁用筭中刀縫為萬里衣盈篋自予手幽絨俟
君開腰帶准疇昔不知今是非

鮑照

代放歌行

蓼蟲避葵莖習苦不言非小人自齷齪安知曠
士懷雞鳴洛城裏禁門平旦開冠蓋縱橫至車

騎四方來素帶曳長飈華纓結遠埃日中安能
止鐘鳴猶未歸夷世不可逢賢君信愛才明慮
自天斷不受外嫌猜一言分珪爵片善辭草萊
豈伊白璧賜將起黃金臺今君有何疾臨路獨
遲迴

代東武吟

主人且勿誼賤子歌一言僕本寒鄉士出身蒙
薰恩始隨張校尉占募到河源後逐李輕車追

虜窮塞垣密塗亘萬里寧歲猶七奔肌力盡鞍
甲心思歷涼溫將軍既下世部曲亦罕存時事
一朝異孤績誰復論少壯辭家去窮老還入門
腰鑣刈葵藿倚杖牧雞豚昔如韞上鷹今似檻
中猿徒結千載恨空負百年怨棄席思君幄疲
馬戀君軒願垂晉主惠不愧田子魂

代出自蓟北門行

羽檄起邊亭烽火入咸陽徵騎屯廣武分兵救

朔方嚴秋筋竿勁虜陣精且強天子按劍怒使
者遙相望雁行緣石徑魚貫度飛梁簫鼓流漢
思旌甲被胡霜疾風衝塞起沙礫自飄揚馬毛
縮如蝟角弓不可張時危見臣節世亂識忠良
投軀報明主身死為國殤

代鳴雁行

邕邕鳴雁鳴始旦齊行命旅入雲漢中夜相失
羣離亂留連徘徊不忍散憔悴容儀君不知辛

苦風霜亦何為

擬行路難

奉君金危之美酒璫瑁玉匣之雕琴七綵芙蓉
之羽帳九華蒲萄之錦衾紅顏零落歲將暮寒
光宛轉時欲沈願君裁悲且減思聽我抵節行
路吟不見柏梁銅雀上寧聞古時清吹音
璇闈玉墀上椒閣文窓繡戶垂羅幕中有一人
字金蘭被服織羅采芳藿春燕參差風散梅開

幃對景弄春爵含歌攬涕恒抱愁人生幾時得
為樂寧作野中之雙鳧不願雲間之別鶴
愁思忽而至跨馬出北門舉頭四顧望但見松
柏園荆棘鬱蹲蹲中有一鳥名杜鵑言是古時
蜀帝魂聲音哀苦鳴不息羽毛憔悴似人髡飛
走樹間啄蟲蟻豈憶往日天子尊念此死生變
化非常理中心惻愴不能言

代淮南王

淮南王好長生服食鍊氣讀仙經琉璃作盃牙
作盤金鼎玉匕合神丹合神丹戲紫房紫房綵
女弄明璫鸞歌鳳舞斷君腸朱城九門門九閨
願逐明月入君懷入君懷結君佩怨君恨君恃
君愛築城思堅劍思利同盛同衰莫相棄

代夜坐吟

冬夜沈沈夜坐吟含聲未發已知心霜入幕風
度林朱燈滅朱顏尋體君歌逐君音不貴聲貴

意深

代春日行

獻歲發吾將行春山茂春日明園中鳥多嘉聲
梅始發桃始青泛舟艦齊擢驚奏采菱歌鹿鳴
風微起波微生絃亦發酒亦傾入蓮池折桂枝
芳袖動芬葉披兩相思兩不知

詠史

五都矜財雄三川養聲利百金不市死明經有

高位京城十二衢飛甍各鱗次仕子影華纓游
客竦輕轡明星晨未稀軒蓋已雲至賓御紛颯
沓鞍馬光照地寒暑在一時繁華及春媚君平
獨寂寞身世兩相棄

擬古

十五諷詩書篇翰靡不通弱冠參多士飛步游
秦宮側覩君子論預見古人風兩說窮古端五
車摧筆鋒羞當白璧貶恥受聊城功晚節從世

務乘障遠和戎解佩襲犀渠卷袞奉盧弓始願
力不及安知今所終
河畔草未黃胡雁已矯翼秋蛩扶戶吟寒婦成
夜織去歲征人還流傳舊相識聞君上隴時東
望久歎息宿昔改衣帶朝旦異容色念此憂如
何夜長愁更多明鏡塵匣中瑤琴生網羅
齊

謝朓

江上曲

易陽春草出踟躕日已暮蓮葉尚田田淇水不
可渡願子淹桂舟時同千里路千里既相許桂
舟復容與江上可采菱清歌共南楚

游東田

戚戚苦無悰攜手共行樂尋雲陟累榭隨山望
菌閣遠樹曠阡阡生烟紛漠漠魚戲新荷動鳥
散餘花落不對芳春酒還望青山郭

暫使下都夜發新林至京邑贈西府同僚
大江流日夜客心悲未央徒念關山近終知返
路長秋河曙耿耿寒渚夜蒼蒼引領見京室宮
雉正相望金波麗鵝鵲玉繩低建章驅車鼎門
外思見昭丘陽馳暉不可接何況隔兩鄉風雲
有鳥路江漢限無梁常恐鷹隼擊時菊委嚴霜
寄言尉羅者寥廓已高翔

酬王晉安

稍稍枝早勁塗塗露晚晞南中榮橘柚寧知鴻
雁飛拂霧朝青閣日旰坐彤闈悵望一途阻參
差百慮依春草秋更綠公子未西歸誰能久京
洛緇塵染素衣

新亭渚別范零陵雲

洞庭張樂地瀟湘帝子游雲去蒼梧野水還江
漢流停驂我悵望輟棹子夷猶廣平聽方籍茂
陵將見求心事俱已矣江上徒離憂

晚登三山還望京邑

灞涘望長安河陽視京縣白日麗飛甍參差皆
可見餘霞散成綺澄江靜如練喧馬覆春洲雜
英滿芳甸去矣方滯淫懷哉罷歡宴佳期悵何
許淚下如流霰有情知望鄉誰能鬢不變

直中書省

紫殿肅陰陰彤庭赫弘敞風動萬年枝日華承
露掌玲瓏結綺錢深沈映朱網紅藥當階翻蒼

苔依砌上茲言翔鳳池鳴珮多清響信美非吾
室中園思偃仰朋情以鬱陶春物方駘蕩安得
凌風翰聊資山泉賞

宣城郡內登望

借問下車日匪直望舒圓寒城一以眺平楚正
蒼然山積陵陽阻溪流春穀泉成紆距遙甸巉
巖帶遠天切切陰風暮桑柘起寒烟悵望心已
極惝恍魂屢遷結髮倦為旅平生早事邊誰規

鼎食盛寧要狐白鮮方棄汝南諾言稅遼東田

高齋視事

餘雪映青山寒霧開白日曖曖江村見離離海
樹出披衣就清盥憑軒方秉筆列俎歸單味連
駕止容膝空為大國憂紛詭諒非一安得掃蓬
蓬鎖吾愁與疾

落日悵望

昧旦多紛喧日晏未遑舍落日餘清陰高枕東

窓下寒槐漸如束秋菊行當把借問此何時涼
風懷朔馬已傷慕歸客復思離居者情嗜幸非
多案牘偏為寘既乏瑯琊政方憇洛陽社

和徐都曹出新亭渚

宛落佳遊遊春色滿皇州結軫青郊路迴瞰蒼
江流日華川上動風光草際浮桃李成蹊徑桑
榆蔭道周東都已倣載言歸望綠疇

和王中丞聞琴

涼風吹月露圓景動清陰蕙風入懷抱聞君此
夜琴蕭瑟滿林聽輕鳴響澗音無為澹容與蹉
跎江海心

臨溪送別

悵望南浦時徒倚北梁步葉上涼風初日隱輕
霞暮荒城迴易陰秋溪廣難渡沫泣豈徒然君
子行多露

梁

江淹

魏文帝曹丕遊宴

置酒坐飛閣逍遙臨華池神飈自遠至左右芙
蓉披綠竹夾清水秋蘭被幽崖月出照園中冠
珮相追隨客從南楚來為我吹參差淵魚猶伏
浦聽者未云疲高文一何綺小儒安足為肅肅
廣殿陰雀聲愁北林衆賓還城邑何以慰吾心

劉太尉琨傷亂

皇晉遘陽九天下橫氛霧秦趙值薄蝕幽并逢
虎據伊予荷寵靈感激狗馳驚雖無六奇術冀
與張韓遇甯戚扣角歌桓公遭乃舉荀息冒險
難實以忠貞故空令日月逝愧無古人度飲馬
出城濠北望沙漠路千里何蕭條白日隱寒樹
投袂既憤懣撫枕懷百慮功名惜未立玄髮已
改素時哉苟有會治亂惟冥數

柳惲

擣衣詩五首

孤衾引思緒獨枕愴憂端深庭秋草綠高門白
露寒思君起清夜促柱奏幽蘭不怨飛蓬苦徒
傷蕙草殘

行役滯風波遊人淹不歸亭皋木葉下隴首秋
雲飛寒園夕鳥集思牖草蟲悲嗟矣當春服安
見禦冬衣

鶴鳴勞永歎採菘傷時暮念君方遠遊望妾理

紈素秋風吹綠潭
明月懸高樹
佳人飾淨容
招携從所務
步櫺杳不極
離堂肅已扃
軒高夕杵散
氣爽夜碓鳴
瑤華隨步響
幽蘭逐袂生
踟躕理金翠
容與納宵清
泛艷迴煙綵
淵旋龜鶴文
淒淒合歡袖
冉冉蘭麝芬
不怨杼軸苦
所悲千里分
垂泣送行李
傾首遲歸雲

吳均

酬別江主簿屯騎

有客告將離
贈言重蘭蕙
泛舟當泛濟
結交當結桂
濟水有清源
桂樹多芳根
毛公與朱亥
俱在信陵門
趙瑟鳳凰柱
吳醪金罍樽
我有北山志
留連為報恩
夫君皆逸翮
搏景復陵騫
白雲閒海樹
秋日暗平原
寒蟲鳴趯趯
落葉飛翻翻
何用贈分首
自有北堂萱

何遜

與蘇九德別

宿管夢顏色咫尺思言宴何況杳來期各在天
一面踟躕暫舉酒倏忽不相見春草似青袍秋
月如團扇三五出重雲當知我憶君萋萋若被
逕懷抱不相聞

王籍

入若耶溪

舸艖何泛泛空水共悠悠陰霞生遠岫陽景逐
迴流蟬噪林逾靜鳥鳴山更幽此地動歸念長
年悲倦游

陳

陰鏗

渡青草湖

洞庭春溜滿平湖錦帆張沅水桃花色湘流杜
若香穴去茅山近江連巫峽長帶天澄迴碧映

日動浮光行舟逗遠樹
度鳥息危檣滔滔不可
測一葦詎能航
北魏

楊白花

陽春二三月楊柳齊作花
春風一夜入閨闈楊
花飄蕩落南家含情出戶
脚無力拾得楊花淚
沾臆秋去春還雙燕子願
銜楊花入窠裏
北齊

蕭愨

秋思

清波收潦日華林鳴籟初
芙蓉露下落楊柳月中
疎燕帷緗綺被趙帶流
黃裾相思阻音息結
夢感離居

北周

庾信

詠畫屏風

昨夜鳥聲春驚鳴動四鄰今朝梅樹下定有詠
花人

梅花

常年臘月半已覺梅花開不信今春晚俱來雪
裏看樹動懸冰落枝高出手寒早知覓不見真
悔著衣單

隋

虞世基

出塞

上將三略遠元戎九命尊緬懷古人節思酬明
主恩山西多勇氣塞北有游魂揚桴上隴阪勒
騎下平原誓將絕沙漠悠然去玉門輕齎不遑
舍驚策驚戎軒懍懍邊風急蕭蕭征馬煩雪暗
天山道冰塞交河源霧烽黯無色霜旗凍不翻
耿介倚長劍日落風塵昏

補遺

魏

陳思王植

贈白馬王彪

謁帝承明廬
逝將歸舊疆
清晨發皇邑
日夕過首陽
伊洛廣且深
欲濟川無梁
汎舟越洪濤
怨彼東路長
顧瞻戀城闕
引領情內傷

大谷何寥廓
山樹鬱蒼蒼
霖雨泥我塗
流潦浩縱橫
中逵絕無軌
改轍登高岡
修坂造雲日
我

馬玄以黃

玄黃猶能進
我思鬱以紆
鬱紆將何念
親愛在離居
本圖相與偕
中更不克俱
鴟梟鳴衡軛
豺狼當路衢
蒼蠅間白黑
讒巧令親疎
欲還絕無蹊
攬轡止踟蹰

踟蹰亦何留
相思無終極
秋風發微涼
寒蟬鳴我側
原野何蕭條
白日忽西匿
歸鳥赴喬林
翩翻厲羽翼
孤獸走索羣
銜草不遑食
感物傷我

懷撫心長太息

太息將何為天命與我違奈何念同生一往形
不歸孤魂翔故域靈柩寄京師存者忽復過亡
沒身自衰人生處一世去若朝露晞年在桑榆
閒影響不能追自顧非金石咄嗒令心悲
心悲動我神棄置莫復陳丈夫志四海萬里猶
比鄰恩愛苟不虧在遠分日親何必同衾幃然
後展殷勤憂思成疾疹無乃兒女仁倉卒骨肉

情能不懷苦辛

苦辛何慮思天命信可疑虛無求列仙松子久
吾欺變故在斯須百年誰能持離別永無會執
手將何時王其愛玉體俱享黃髮期收淚即長
路援筆從此辭

送應氏詩二首

步登北邙阪遙望洛陽山洛陽何寂寞宮室盡
燒焚垣牆皆頽擗荆棘上參天不見舊耆老但

覩新少年側足無行徑荒疇不復田遊子久不
歸不識陌與阡中野何蕭條千里無人煙念我
平常居氣結不能言

清時難屢得嘉會不可常天地無終極人命若
朝霜願得展嫵婉我友之朔方親昵並集送置
酒此河陽中饋豈獨薄賓飲不盡觴愛至望苦
深豈不愧中腸山川阻且遠別促會日長願為
比翼鳥施翮起高翔

嵇康

幽憤詩

嗟余薄祜少遭不造哀莞靡識越在襁緥母兄
鞠育有慈無威恃愛肆姐不訓不師爰及冠帶
憑寵自放抗心希古任其所尚託好老莊賤物
貴身志在守樸養素全真曰余不敏好善闇人
子玉之敗屢增惟塵大人含弘藏垢懷恥民之
多僻政不由己惟此褊心顯明滅否感悟思愆

但若創痛欲寬其過謗議沸騰性不傷物類致
怨憎昔慙柳惠今愧孫登內負宿心外慙良朋
仰慕嚴鄭樂道閒居與世無營神氣晏如咨余
不淑嬰累多虞匪降自天實由頑疏理弊患結
卒致囹圄對答鄙訊繫此幽阻實恥訟寃時不
我與雖曰義直神辱志沮澡身滄浪豈云能補
嗷嗷鳴雁奮翼北游順時而動得意忘憂嗟我
憤歎曾莫能儔事與願違遘茲淹留窮達有命

亦又何求古人有言善莫近名奉時恭默咎悔
不生萬石周慎安親保榮世務紛紜祇攬余情
安樂必誠乃終利貞煌煌靈芝一年三秀予獨
何為有志不就懲難思復心焉內疚庶勗將來
無馨無臭采薇山阿散髮巖岫永嘯長吟頤性
養壽

阮籍

詠懷

夜中不能寐起坐彈鳴琴薄帷鑿明月清風吹
我襟孤鴻號外野朔鳥鳴北林徘徊將何見憂
思獨傷心

平生少年時輕薄好絃歌西遊咸陽中趙李相
經過娛樂未終極白日忽蹉跎驅馬復來歸反
顧望三河黃金百鎰盡資用常苦多北臨太行
道失路將如何

昔聞東陵瓜近在青門外連畛距阡陌子母相

鈎帶五色曜朝日嘉賓四面會膏火自煎熬多
財為患害布衣可終身寵祿豈足賴
駕言發魏都南向望吹臺簫管有遺音梁王安
在哉戰士食糟糠賢者處蒿萊歌舞曲未終秦
兵已復來夾林非吾有朱宮生塵埃軍敗華陽
下身竟為土灰

晉

潘岳

內顧詩二首

靜居懷所歡登城望四澤春草鬱青青桑柘何
奕奕芳林振朱榮淥水激素石初征冰未泮忽
焉衿締綌漫漫三千里迢迢遠行客馳情戀朱
顏寸陰過盈尺夜愁極清晨朝悲終日夕山川
信悠永願言良弗獲引領訊歸期沈思不可釋
獨悲安所慕人生若朝露綿邈寄絕域眷戀想
平素爾情既來追我心亦還顧形體隔不達精

爽交中路不見山下松隆冬不易故不見澗邊
柏歲寒守一度無謂希見疎在遠分彌固

左思

招隱二首

杖策招隱士荒塗橫古今巖穴無結構邱中有
鳴琴白雲停陰罔丹葩曜陽林石泉激瓊瑤織
鱗或浮沈非必絲與竹山水有清音何事待嘯
歌灌木自悲吟秋菊兼餼糧幽蘭間重襟躊躇

足力煩脚欲投吾簪

經始東山廬果下自成榛前有寒泉井聊可瑩
心神峭蒨青葱開竹柏得其真弱葉棲霜雪飛
縈流餘津爵服無常玩好惡有屈伸結綬生纏
牽彈冠去埃塵患連非吾屈首陽非吾仁相與
觀所尚逍遙撰良辰

宋

謝靈運

晚出西射堂

步出西掖門遙望城西岑連嶂疊巘崿青翠杳
深沈曉霜楓葉丹夕曛嵐氣陰節往戚不淺感
來念已深羈雌戀舊侶迷鳥懷故林含情尚勞
愛如何離賞心撫鏡華緇鬢攬帶緩促襟安排
徒空言幽獨賴鳴琴

鮑照

擬古

幽并重騎射少年好馳逐
氈帶佩雙鞬象弧插
彫服獸肥春草短飛鞚越平陸
朝遊雁門上暮還樓煩宿
石梁有餘勁驚雀無全目
漢虜方未和邊城屢翻覆
留我一白羽將以分符竹
漢列仙

陰長生

古詩三首

維予之先佐命唐虞爰逮漢世紫艾重紆予獨

好道而為匹夫高尚素志不事王侯貪生得生
亦又何求超跡蒼霄乘飛駕浮青要承翼與我
為仇入火不灼蹈波不濡逍遙太極何慮何憂
遊戲仙都顧憫羣愚年命之逝如彼波流奄忽
未幾泥土為儔馳走索死不肯暫休
予之聖師體道知真昇騰變化松喬為鄰維予
同學一十二人寒苦求道歷二十年中多怠惰
志行不堅痛乎諸子命也自天天不妄授道必

歸賢身投幽壤何時可還嗟爾將來勤加精研
勿為流俗富貴所牽神丹一成升彼九天壽同
三光何但億千

維予垂髮少好道德棄家隨師東西南北委放
五經避世自匿二十餘年名山之側寒不遑衣
饑不暇食思不敢歸勞不敢息奉事聖師承悅
顏色面垢足胝乃敢哀識遂傳要訣思深不測
妻子延年咸享無極黃白既成貨財千億役使

鬼神玉女侍側予得度世神丹之力

天籟續集目錄之三

唐

玄宗皇帝

送賀知章

早渡蒲關

王勃

杜少府之任蜀州

蘇味道



正月十五夜

陳子昂

感遇

送客

晚次樂鄉縣

度荆門望楚

春夜別友人

杜審言

登襄陽城

賦得妾薄命

劉希夷

公子行

晚春

沈佺期

巫山高

宋之問

途中寒食

度大庾嶺

薛稷

秋日還京陝西十里作

張九齡

感遇

登荊州城望江

王無競

巫山高

蘇頲

汾上驚秋

張說

還至端州驛前與高六別處

幽州夜飲

孫逖

宿雲門寺閣

賀知章

題袁氏別業

劉春虛

寄闕防

寄江滔求孟六遺文

崔顥

孟門行

行經華陰

王維

春夜竹亭贈錢少府歸藍田

渭川田家

送別

送綦毋潛落第還鄉

洛陽女兒行

畬張五弟

同崔員外秋宵寓直

歸嵩山作

過香積寺

晚春嚴少尹與諸公見過

送崔九興宗遊蜀

送方城韋明府

送梓州李使君

送張五諲歸宣城

送賀遂貞外甥

送楊長史赴果州

送邱為落第歸江東

觀獵

登裴迪秀才小臺作

奉和聖製從蓬萊向興慶閣道中留春雨

中春望之作應制

敕賜百官櫻桃

酬郭給事

過乘如禪師蕭居士嵩邱蘭若

春日與裴廸過新昌里訪呂逸人不遇

孟城坳

華子岡

斤竹嶺

木蘭柴

南垞

欒家瀨

辛夷塢

漆園

臨高臺送黎拾遺

息夫人

私成口號

裴廸

孟城坳

華子岡

鹿柴

木蘭柴

茱萸泝

宮槐陌

欒家瀨

孟浩然

秋登萬山寄張五

萬山潭

宿楊子津寄潤州長山劉隱士

大禹寺義公禪房

舟中晚望

宿桐廬江寄廣陵舊游

夜渡湘水

永嘉上浦館逢張八子容

送元公之鄂渚尋觀主張驂鸞

廣陵別薛八

宿建德江

送杜十四之江南

張子容

送孟六歸襄陽

賈至

岳陽樓宴王員外貶長沙

早朝大明宮呈兩省僚友

綦毋潛

春泛若耶溪

若耶溪逢孔九

儲光羲

張谷田舍

王昌齡

塞下曲

同從弟銷南齋翫月憶山陰崔少府

西宮秋怨

青樓曲

送別魏二

聽流人水調子

送狄宗亨

薛據

冬夜寓居寄儲太祝

崔曙

早發交崖山還太室作

九日登望仙臺呈劉明府

張巡

軍中聞笛

李頎

送劉昱

聽董大彈胡笳兼寄語弄房給事

望秦川

寄綦毋三

題璿公山池

常建

江上琴興

宿王昌齡隱居

弔王將軍墓

塞下曲

高適

同諸公登慈恩寺浮圖

燕歌行

醉後贈張九旭

哭單父梁少府

除夜

岑參

灃頭送蔣侯

與高適薛據同登慈恩寺浮圖

送杜佐下第歸陸渾別業

送楊子

巴南舟中夜書事

和賈至舍人早朝大明宮之作

山房春事

赴北庭度隴思家

祖詵

蘇氏別業

望薊門

李白

古風

擬古

來日大難

沙邱城下寄杜甫

寄東魯二稚子

送楊山人歸嵩山

金鄉送韋八之西京

經下邳圯橋懷張子房

春日醉起言志

與元丹邱方城寺談玄作

春滯沅湘有懷山中

蜀道難

烏棲曲

飛龍引

獨漉篇

前有樽酒行

金陵城西樓月下吟

宣城謝朓樓餞別校書叔雲

寄王屋山人孟大融

早春寄王漢陽

憶舊游寄譙郡元參軍

示金陵子

塞下曲

宮中行樂詞

寄淮南友人

贈錢徵君少陽

秋思

江夏別宋之悌

尋雍尊師隱居

聽蜀僧濬彈琴

訪戴天山道士不遇

過崔八丈水亭

謝公亭

太原早秋

題東溪公幽居

送儲邕之武昌

襄陽曲

相逢行

越女詞

巴女詞

送陸判官往琵琶峽

重憶

紫藤樹

流夜郎題葵葉

長門怨

峨嵋山月歌

客中作

春夜洛城聞笛

與史郎中飲聽黃鶴樓上吹笛

巴陵贈賈舍人

陌上贈美人

望天門山

魯東門泛舟

贈汪倫

南流夜郎寄內

天籟續集

唐

玄宗皇帝

送賀知章

遺榮期入道辭老竟抽簪豈不惜賢達其如高
尚心寰中得秘要方外散幽襟獨有青門餞羣
僚悵別深

早渡蒲關

鐘鼓嚴更曙山河野望通
鳴鑿下蒲坂飛旆入秦中
地險關逾壯天平鎮尚雄
春來津樹合月落戍樓空
馬色分朝景雞聲逐曉風
所希常道泰非復棄繻同

王勃

杜少府之任蜀州

城闕輔三秦風烟望五津
與君離別意同是宦遊人
海内存知己天涯若比鄰
無為在歧路兒

女共霑巾

蘇味道

正月十五夜

火樹銀花合星橋鐵鎖開
暗塵隨馬去明月逐人來
遊妓皆禳李行歌盡落梅
金吾不禁夜玉漏莫相催

陳子昂

感遇

白日每不歸青陽時暮矣
茫茫吾何思林卧觀
無始衆芳委時晦
鷓鴣鳴悲耳鴻荒古已頽
誰識巢居子

林居病時久水木澹孤清
閒卧觀物化悠然念
無生青春始萌達
朱火已滿盈徂落方自此感
歎何時平

可憐瑤臺樹灼灼佳人姿
碧華映朱實攀折青
春時豈不盛光寵榮君白
玉墀但恨紅芳歇凋

傷感所思

吾愛鬼谷子青溪無垢氛
囊括經世道遺身在
白雲七雄方龍鬪天下亂
無君浮榮不足貴遵
養晦時文舒之彌宇宙
卷之不盈分豈徒山木
壽空與麋鹿羣

朝發宜都渚浩然思故鄉
故鄉不可見路隔巫
山陽巫山彩雲沒高邱
正微茫伫立望已久涕
淚沾衣裳豈茲越鄉感
憶昔楚襄王朝雲無處

所荆國亦淪亡

竭來豪遊子勢利禍之門如何蘭膏歎感激自
生冤衆趨明所避時棄道猶存雲泉既已失羅
網與誰論箕山有高節湘水有清源唯應白鷗
鳥可與洗心言

幽居觀大運悠悠念羣生終古代興沒豪聖莫
能爭三季淪周赧七雄滅秦嬴復聞赤精子提
劍入咸京炎光既無象晉虜復縱橫堯禹道已

昧昏虐勢方行豈無當世雄天道與胡兵咄咄
安可言時醉而未醒仲尼溺東夏伯陽遁西溟
大運自古來旅人胡歎哉

送客

故人洞庭去楊柳春風生相送河洲晚蒼茫別
思盈白蘋已堪把綠芷復含榮江南多桂樹歸
客贈生平

晚次樂鄉縣

故鄉杳無際日暮且孤征
川原迷舊國道路入邊城
野戍荒烟斷深山古木平
如何此時恨噉噉夜猿鳴

度荆門望楚

遙遙去巫峽望望下章臺
巴國山川盡荆門烟霧開
城分蒼野外樹斷白雲隈
今日狂歌客誰知入楚來

春夜別友人

銀燭吐青烟金尊對綺筵
離堂思琴瑟別路繞山川
明月隱高樹長河沒曉天
悠悠洛陽去此會在何年

杜審言

登襄陽城

旅客三秋至層城四望開
楚山橫地出漢水接天回
冠蓋非新里章華即舊臺
習池風景異歸路滿塵埃

賦得妾薄命

草綠長門掩苔青永巷幽寵移新愛奪淚落故
情留啼鳥驚殘夢飛花攪獨愁自憐春色罷團
扇復迎秋

劉希夷

公子行

天津橋下陽春水天津橋上繁華子馬聲迴合
青雲外人影動搖綠波裏綠波蕩漾玉為砂青

雲離披錦作霞可憐楊柳傷心樹可憐桃李斷
腸花此日遨遊邀美女此時歌舞入娼家娼家
美女鬱金香飛去飛來公子傍的的珠簾白日
映娥娥玉顏紅粉妝花際徘徊雙蛺蝶池邊顧
步兩鴛鴦傾國傾城漢武帝為雲為雨楚襄王
古來容光人所羨况復今日遙相見願作輕羅
著細腰願為明鏡分嬌面與君相向轉相親與
君雙棲共一身願作貞松千歲古誰論芳槿一

朝新百年同謝西山日千秋萬古北邙塵

晚春

佳人眠洞房回瞥見垂陽寒盡鴛鴦被春生玳
瑁牀庭陰幕青靄簾影散紅芳寄語同心伴迎
春且薄粧

沈佺期

巫山高

巫山高不極合沓狀竒新暗谷疑風雨陰崖若

鬼神月明三峽曉潮滿九江春為問陽臺客應
知入夢人

宋之問

途中寒食

馬上逢寒食愁中屬暮春可憐江浦望不見洛
橋人北極懷明主南溟作逐臣故園腸斷處日
夜柳條新

度大庾嶺

度嶺方辭國停軺一望家魂隨南翥鳥淚盡北
枝花山雨初含霽江雲欲變霞但令歸有日不
敢怨長沙

薛稷

秋日還京陝西十里作

驅車越陝郊北顧臨大河隔河見鄉邑秋風水
增波西登咸陽塗日暮憂思多傳巖既紆鬱首
山亦嵯峨操築無昔老採薇有遺歌客游既迴

換人生知幾何

張九齡

感遇

幽人歸獨卧滯慮洗孤清持此謝高鳥因之傳
遠情日夕懷空意人誰感至精飛沈理自隔何
所慰吾誠

吳越數千里夢寐今夕見形骸非我親衾枕即
鄉縣化蝶猶不識川魚安可羨海上有仙山歸

期覺神變

西日下山隱北風乘夕流
燕雀感昏旦檐楹呼
匹儔鴻鵠雖自遠哀音非所求
貴人棄疵賤下士常殷憂
衆情累外物恕已忘內修
感歎長如此使我心悠悠
抱影吟中夜誰聞此歎息
美人適異方庭樹含幽色
白雲愁不見滄海飛無翼
鳳凰一朝來竹花斯可食

登荊州城望江

滔滔大江水天地相終始
經閱幾世人復歎誰家子
東望何悠悠西來晝夜流
歲月既如此為心那不愁

王無競

巫山高

神女向高唐巫山下夕陽徘徊作行雨
婉孌逐荆王
電影江前落雷聲峽外長
霽雲無處所臺

館曉蒼蒼

蘇頌

汾上驚秋

北風吹白雲萬里渡河汾
心緒逢搖落秋聲不可聞

張說

還至端州驛前與高六別處

舊館分江口淒然望落暉
相逢傳旅食臨別換

征衣昔記山川是今傷人代
非往來皆此路生死不同歸

幽州夜飲

涼風吹夜雨蕭瑟動寒林
正有高堂宴能忘遲暮
心軍中宜劍舞塞上重笳音
不作邊城將誰知恩遇深

孫逖

宿雲門寺閣

香閣東山下烟花象外幽懸燈千嶂夕卷幔五
湖秋畫屏餘鴻雁紗窗宿斗牛更疑天路近夢
與白雲遊

賀知章

題袁氏別業

主人不相識偶坐為林泉莫謾愁沽酒囊中自
有錢

劉昫虛

寄闕防

青冥南山口君與緇錫鄰深路入古寺亂花隨
暮春紛紛對寂寞往往落衣中松色照空水經
聲時有人晚心復南望山遠情獨親應以修往
業亦惟立此身深林度空夜烟月資清真莫歎
文明日彌年徒隱淪

寄江滔求孟六遺文

南望襄陽路思君情轉親偏知漢水廣應與孟

家鄰在日貧為善昨來聞更貧相如有遺草為
一問家人

崔顥

孟門行

黃雀銜黃花翩翩傍簷隙本擬報君恩如何反
彈射金壘美酒滿座春平原愛才多眾賓滿堂
盡是忠義士何意得有讒諛人諛言反復那可
道能令君心不自保北園新栽桃李枝根株未

固何轉移成陰結實君自取若問傍人那得知

行經華陰

岧嶇太華俯咸京天外三峯削不成武帝祠前
雲欲散仙人掌上雨初晴河山北枕秦關險驛
路西連漢時平借問路傍名利客何如此處學
長生

王維

春夜竹亭贈錢少府歸藍田

夜靜羣動息時聞隔林犬却憶山中時人家澗
西遠羨君明發去采薇輕軒冕

渭川田家

斜光照墟落窮巷牛羊歸野老念牧童倚杖候
荆扉雉雥麥苗秀蠶眠桑葉稀田夫荷鋤至相
見語依依即此羨閒逸悵然吟式微

送別

下馬飲君酒問君何所之君言不得意歸卧南

山陲但去莫復問白雲無盡時

送綦毋潛落第還鄉

聖代無隱者英靈盡來歸遂令東山客不得顧
採薇既至金門遠孰云我道非江淮渡寒食京
洛縫春衣置酒長安道同心與我違行當浮桂
棹未幾拂荆扉遠樹帶行客孤城當落暉吾謀
適不用勿謂知音稀

洛陽女兒行

洛陽女兒對門居，纔可顏容十五餘。良人玉勒乘驄馬，侍女金盤膾鯉魚。畫閣朱樓盡相望，紅桃綠柳垂簷向。羅幃送上七香車，寶扇迎歸九華帳。狂夫富貴在青春，意氣驕奢劇季倫。自憐碧玉親教舞，不惜珊瑚持與人。春窓曙滅九微火，九微片片飛花璫。戲罷曾無理曲時，妝成祇是薰香坐。城中相識盡繁華，日夜經過趙李家。誰憐越女顏如玉，貧賤江頭自浣紗。

答張五弟

終南有節屋前對，終南山終年無客長閉關。終日無心長自閒，不妨飲酒復垂釣。君但能來相往還。

同崔員外秋宵寓直

建禮高秋夜，承明候曉過。九門寒漏徹，萬井曙鐘多。月迥藏珠斗，雲消出絳河。更慚衰朽質，南陌共鳴珂。

歸嵩山作

清川帶長薄車馬去閒閒
流水如有意暮禽相與還
荒城臨古渡落日滿秋山
迢遞嵩高下歸來且閉關

過香積寺

不知香積寺數里入雲峯
古木無人徑深山何處鐘
泉聲咽危石日色冷青松
薄暮空潭曲安禪制毒龍

晚春嚴少尹與諸公見過

松菊荒三徑圖書共五車
烹葵邀上客看竹到貧家
雀乳先春草鶯啼過落花
自憐黃髮暮一倍惜年華

送崔九興宗遊蜀

送君從此去轉覺故人稀
徒御猶回首田園方掩扉
出門當旅食中路授寒衣
江漢風流地游人何處歸

送方城韋明府

遙思葭菼際寥落楚人行高鳥長淮水平蕪故
郢城使車聽雉乳縣鼓應雞鳴若見州從事無
嫌手板迎

送梓州李使君

萬壑樹參天千山響杜鵑山中一夜雨樹杪百
重泉漢女輸幢布巴人訟芋田文翁翻教授不
敢倚先賢

送張五諲歸宣城

五湖千萬里况復五湖西漁浦南陵郭人家春
穀溪欲歸江淼淼未到草萋萋憶想蘭陵鎮可
宜猿更啼

送賀遂負外甥

南國有歸舟荆門沂上流蒼茫葭菼外雲水與
昭丘檣帶城鳥去江連暮雨愁猿聲不可聽莫
待楚山秋

送楊長史赴果州

褒斜不容憶之子去何之鳥道一千里猿聲十
二時官橋祭酒客山木女郎祠別後同明月君
應聽子規

送邱為落第歸江東

憐君不得意况復柳條春為客黃金盡還家白
髮新五湖三畝宅萬里一歸人知爾不能薦羞
稱獻納臣

觀獵

風勁角弓鳴將軍獵渭城草枯鷹眼疾雪盡馬
蹄輕忽過新豐市還歸細柳營回看射鵰處千
里暮雲平

登裴迪秀才小臺作

端居不出戶滿目望雲山落日鳥邊下秋原人
外閒遙知遠林際不見此簷閒好客多乘月應
門莫上關

奉和聖製從蓬萊向興慶閣道中留春雨
中春望之作應制

渭水自縈秦塞曲黃山舊繞漢宮斜鑿輿迴出
千門柳閣道迴看上苑花雲裏帝城雙鳳闕雨
中春樹萬人家為乘陽氣行時令不是宸遊玩
物華

敕賜百官櫻桃

芙蓉闕下會千官紫禁朱櫻出上闌纔是寢園

春薦後非關御苑烏銜殘歸鞍競帶青絲籠中
使頻傾赤玉盤飽食不須愁內熱大官還有蔗
漿寒

酬郭給事

洞門高閣靄餘暉桃李陰陰柳絮飛禁裏疎鐘
官舍晚省中啼鳥吏人稀晨搖玉珮趨金殿夕
奉天書拜瑣闥強欲從君無那老將因卧病解
朝衣

過乘如禪師蕭居士嵩邱蘭若

無著天親弟與兄
嵩邱蘭若一峯晴
食隨鳴磬巢鳥下
行踏空林落葉聲
迸水定侵香案濕
雨花應共石林平
深洞長松何所有
儼然天竺古先生

春日與裴迪過新昌里訪呂逸人不遇

桃源一向絕風塵
柳市南頭訪隱淪
到門不敢題凡鳥
看竹何須問主人
城上青山如屋裏
東

家流水入西鄰
閉戶著書多歲月
種松皆作老龍鱗

孟城坳

新家孟城口古木餘衰柳
來者復為誰空悲昔人有

華子岡

飛鳥去不窮連山復秋色
上下華子岡惆悵情何極

斤竹嶺

檀欒映空曲青翠漾連漪暗入商山路樵人不可知

木蘭柴

秋山斂餘照飛鳥逐前侶彩翠時分明夕嵐無處所

南垞

輕舟南垞去北垞淼難即隔浦望人家遙遙不

相識

藥家瀨

颯颯秋雨中淺淺石溜瀉跳波自相濺白鷺驚復下

辛夷塢

木末芙蓉花山中發紅萼澗戶寂無人紛紛開且落

漆園

古人非傲吏自闕經世務
偶寄一微官婆婆數
株樹

臨高臺送黎拾遺

相送臨高臺川原杳何極
日暮飛鳥還行人去
不息

息夫人

莫以今時寵能忘舊日恩
看花滿眼淚不共楚
王言

私成口號

萬戶傷心生野烟百官何日更朝天
秋槐葉落
空宮裏凝碧池頭奏管絃

裴迪

孟城坳

結廬古城下時登古城上古城非疇昔
令人自
來往

華子崗

落日松風起還家草露晞雲光侵履跡山翠拂
人衣

鹿柴

日夕見寒山便為獨往客不知深林事但有麋
鹿跡

木蘭柴

蒼蒼落日時鳥聲亂溪水緣溪路轉深幽興何
時已

茱萸泝

飄香亂椒桂布葉閒檀藥雲日雖迴照森沉猶
自寒

宮槐陌

門前宮槐陌是向欽湖道秋來山雨多落葉無
人掃

藥家瀨

瀨聲喧極浦公涉向南津汎汎鳧鷖渡時時欲

近人

孟浩然

秋登萬山寄張五

北山白雲裏隱者自怡悅
相望始登高心隨雁
飛滅愁因薄暮起興是清秋發
時見歸村人平
沙渡頭歇天邊樹若薺
江畔洲如月何當載酒
來共醉重陽節

萬山潭

垂釣坐磐石水清心益閒
魚行潭樹下猿挂島
藤間游女昔解佩傳聞於此山
求之不可得沿
月棹歌還

宿揚子津寄潤州長山劉隱士

所思在夢寐欲往大江深
日夕望京口烟波愁
我心心馳苑山洞目極
楓樹林不見少微隱
星霜勞夜吟

大禹寺義公禪房

義公習禪癖結宇依空林戶外一峯秀階前衆
壑深夕陽連雨足空翠落庭陰看取蓮花淨方
知不染心

舟中晚望

挂席東南望青山水國遙舳艫爭利涉來往任
風潮問我今何適天台訪石橋坐看霞色晚疑
是赤城標

宿桐廬江寄廣陵舊游

山暝聽猿愁滄江急夜流風鳴兩岸葉月照一
孤舟建德非吾土維揚憶舊游還將兩行淚遙
寄海西頭

夜渡湘水

客行貪利涉夜裏渡湘川露氣聞芳杜歌聲識
采蓮榜人投岸火漁子宿潭烟行旅時相問潯
陽何處邊

永嘉上浦館逢張八子容

逆旅相逢處江村日暮時衆山遙對酒孤嶼共
題詩解宇鄰蛟室人烟接島夷鄉關萬餘里失
路一相悲

送元公之鄂渚尋觀主張驂鸞

桃花春水漲之子忽乘流峴首辭蛟浦江邊問
鶴樓贈君青竹杖送爾白蘋洲應是神仙輩相
期汗漫游

廣陵別薛八

士有不得志栖栖吳楚間廣陵相遇罷彭蠡泛
舟還櫂出江中樹波連海上山風帆明日遠何
處更追攀

宿建德江

移舟泊烟渚日暮客愁新野曠天低樹江清月
近人

送杜十四之江南

荆吳相接水為鄉君去春江正淼茫日暮孤帆

泊何處天涯一望斷人腸

張子容

送孟六歸襄陽

杜門不復出久與世情疏
以此為長策勸君歸
舊廬醉歌田舍酒笑讀古人書
好是一生事無
勞賦子虛

賈至

岳陽樓宴王員外貶長沙

極浦三春草高樓萬里心
楚山晴靄碧湘水暮
流深忽與朝中舊同為澤畔吟
停杯試北望還
欲淚沾襟

早朝大明宮呈兩省僚友

銀燭朝天紫陌長禁城春色曉蒼蒼
千條弱柳垂青瑣百轉流鶯繞建章
劍佩聲隨玉墀步衣冠身惹御爐香
共沐恩波鳳池上朝朝染翰侍
君王

綦毋潛

春泛若耶溪

幽意無斷絕此去隨所偶
晚風吹行舟花路入溪口
際夜轉西壑隔山望南斗
潭烟飛溶溶林月低向後
生事且瀰漫願為持竿叟

若耶溪逢孔九

相逢此溪曲勝託在烟霞
潭影竹間動巖陰檐外斜
人言上皇代犬吠武陵家
借問淹留日春

風滿若耶

儲光羲

張谷田舍

縣官清且儉深谷有人家
一徑入寒竹小橋穿野花
碓喧春澗滿梯倚綠桑斜
自說年來稔前村酒可賒

王昌齡

塞下曲

蟬鳴空桑林八月蕭關道出塞復入塞處處黃
蘆草從來幽并客皆共塵沙老莫學游俠兒矜
誇紫騮好

飲馬渡秋水水寒風似刀平沙日未沒黯黯見
臨洮昔日長城戰咸言意氣高黃塵足今古白
骨亂蓬蒿

同從弟銷南齋翫月憶山陰崔少府

高卧南齋時開帷月初吐清輝淡水木演漾在

窗戶苒苒幾盈虛澄澄變今古美人清江畔是
夜越吟苦千里其何如微風吹蘭杜

西宮秋怨

芙蓉不及美人妝水殿風來珠翠香卻恨含情
掩秋扇空懸明月待君王

青樓曲

白馬金鞍從武皇旌旗十萬宿長楊樓頭小婦
鳴箏坐遙見飛塵入建章

送別魏二

醉別江樓橘柚香
江風引雨入船涼
憶君遙在湘山月
愁聽清猿夢裏長

聽流人水調子

孤舟微月對楓林
分付鳴箏與客心
嶺色千重萬重雨
斷腸收與淚痕深

送狄宗亨

秋在水清山暮蟬
洛陽樹色鳴皋烟
送君歸去

愁不盡又惜空度涼風天

薛據

冬夜寓居寄儲太祝

自為洛陽客夫子吾知音
愛義能下士時人無此心
奈何離居夜巢鳥飛空林
愁坐至月上復聞南鄰砧

崔曙

早發交崖山還太室作

東林氣微白寒鳥急高翔吾亦自茲去北山歸
草堂杪冬正三五月遙相望蕭蕭過潁上曠
曠辨夕陽川冰生積雪野火出枯桑獨往路難
盡窮陰人易傷傷此無衣客如何蒙雨霜

九日登望仙臺呈劉明府

漢文皇帝有高臺此日登臨曙色開三晉雲山
皆北向二陵風雨自東來關門令尹誰能識河
上仙翁去不回且欲近尋彭澤宰陶然共醉菊

花杯

張巡

軍中聞笛

岩堯試一臨虜騎附城陰不辨風塵色安知天
地心門開邊月近戰苦陣雲深旦夕更樓上遙
聞橫笛音

李頎

送劉昱

八月寒葦花秋江浪頭白北風吹五兩誰是潯
陽客鸕鷀山頭宿雨晴揚州郭裏暮潮生行人
夜宿金陵渚試聽沙邊有雁聲

聽董大彈胡笳兼寄語弄房給事

蔡女昔造胡笳聲一彈一十有八拍胡人落淚
沾邊草漢使斷腸對歸客古戍蒼蒼烽火寒大
荒陰沈飛雪白先拂商絃後角羽四郊秋葉驚
撼撼董夫子通神明深松竊聽來妖精言避更

速皆應手將往復旋如有情空山百鳥散還合
萬里浮雲陰且晴嘶酸離雁失羣夜斷絕胡兒
戀母聲川為淨其波鳥亦罷其鳴烏珠部落家
鄉遠邏娑沙塵哀怨生幽音變調忽飄灑長風
吹林雨墮瓦迸泉颯颯飛木末野鹿呦呦走堂
下長安城連東掖垣鳳凰池對青鎖門高才脫
略名與利日夕望君抱琴至

望秦川

秦川朝望迥日出正東峯遠近山河淨逶迤城
闕重秋聲萬戶竹寒色五陵松客有歸與歎淒
其霜露濃

寄綦母三

新加大邑綬仍黃近與單車向洛陽顧盼一過
丞相府風流三接令公香南川粳稻花侵縣西
嶺雲霞色滿堂共道進賢蒙上賞看君幾歲作
臺郎

題璿公山池

遠公遁跡廬山岑開士幽居祇樹林片石孤雲
窺色相清池皓月照禪心指揮如意天花落坐
卧閒房春草深此外俗塵都不染惟餘玄度得
相尋

常建

江上琴興

江上調玉琴一絃清一心泠泠七絃遍萬木澄

幽陰能令江月白又令江水深始知枯桐枝可
以徽黃金

宿王昌齡隱居

清溪深不測隱處惟孤雲松際露微月清光猶
為君茆亭宿花影藥院滋苔紋余亦謝時去西
山鸞鶴羣

弔王將軍墓

嫖姚北伐時深入強千里戰餘落日黃軍敗鼓

聲死嘗聞漢飛將可奪單于壘今與山鬼鄰殘
兵哭遼水

塞下曲

玉帛朝回望帝鄉烏孫歸去不稱王天涯靜處
無征戰兵氣銷為日月光

高適

同諸公登慈恩寺浮圖

香界泯羣有浮圖豈諸相登臨駭孤高披拂忻

大壯言是羽翼生迥出虛空上頓疑身世別乃
覺形神王宮闕皆戶前山河盡簷向秋風昨夜
至秦塞多清曠千里何蒼蒼五陵鬱相望盛時
慚阮步末宦知周防輸效獨無因斯焉可遊放

燕歌行

漢家烟塵在東北漢將辭家破殘賊男兒本自
重橫行天子非常賜顏色擬金代鼓下榆關旌
旆凌迤碣石閒校尉羽書飛瀚海單于獵火照

狼山山川蕭條極邊土胡騎憑陵雜風雨戰士
軍前半死生美人帳下猶歌舞大漠窮秋塞草
腓孤城落日鬪兵稀身當恩遇常輕敵力盡關
山未解圍鐵衣遠戍辛勤久玉筋應啼別離後
少婦城南欲斷腸征人薊北空回首邊庭飄颻
那可度絕域蒼茫無所有殺氣三時作陣雲寒
聲一夜傳刁斗相看白刃雪紛紛死節從來豈
顧勲君不見沙場征戰苦至今猶憶李將軍

醉後贈張九旭

世上謾相識此翁殊不然興來書自聖醉後語
猶顛白髮老閑事青雲在目前牀頭一壺酒能
更幾回眠

哭單父梁少府

開篋淚沾臆見君前日書夜臺猶寂寞疑是子
雲居

除夜

旅館寒燈獨不眠客心何事轉淒然故鄉今夜
思千里霜鬢明朝又一年

岑參

灋頭送蔣侯

君住灋水北我家灋水西兩村辨喬木五里聞
鳴雞飲酒溪雨過彈琴山月低徒開蔣生徑爾
去誰相携

與高適薛據同登慈恩寺浮圖

塔勢如湧出孤高聳天宮登臨出世界磴道盤
虛空突兀壓神州崢嶸如鬼工四角礙白日七
層摩蒼穹下窺指高鳥俯聽聞驚風連山若波
濤奔走似朝東青松夾馳道宮觀何玲瓏秋色
從西來蒼然滿關中五陵北原上萬古青濛濛
淨理了可悟勝因夙所宗誓將挂冠去覺道資
無窮

送杜佐下第歸陸渾別業

正月今欲半陸渾花未開出關見青草春色正
東來夫子且歸去明時方愛才還須及秋賦莫
即隱蒿萊

送楊子

斗酒渭城邊鑪頭醉不眠梨花千樹雪楊葉萬
條烟惜別傾壺醕臨分贈馬鞭看君潁上去新
月到家圓

巴南舟中夜書事

渡口欲黃昏歸人爭渡喧近鐘清野寺遠火點
江村見雁思鄉信聞猿積淚痕孤舟萬里夜秋
月不堪論

和賈至舍人早朝大明宮之作

雞鳴紫陌曙光寒鶯轉皇州春色闌金闕曉鐘
開萬戶玉階仙仗擁千官花迎劍佩星初落柳
拂旌旗露未乾獨有鳳凰池上客陽春一曲和
皆難

山房春事

梁園日暮亂飛鴉極目蕭條三兩家庭樹不知
人去盡春來還發舊時花

赴北庭度隴思家

西向輪臺萬里餘也知鄉信日應疏隴山鸚鵡
能言語為報家人數寄書

祖詠

蘇氏別業

別業居幽處到來生隱心南山當戶牖澧水映
園林竹覆經冬雪庭昏未夕陰寥寥人境外閒
坐聽春禽

望薊門

燕臺一去客心驚笳鼓喧喧漢將營萬里寒光
生積雪三邊曙色動危旌沙場烽火侵胡月海
畔雲山擁薊城少小雖非投筆吏論功還欲請
長纓

李白

古風

大雅久不作吾衰竟誰陳王風委蔓草戰國多
荆榛龍虎相啖食兵戈遶狂秦正聲何微茫哀
怨起騷人揚馬激頽波開流蕩無垠廢興雖萬
變憲章亦已淪自從建安來綺麗不足珍聖代
復元古垂衣貴清真羣才屬休明乘運共躍鱗
文質相炳煥衆星羅秋旻我志在刪述重輝映

千春希聖如有立絕筆於獲麟
秦皇掃六合虎視何雄哉揮劍決浮雲諸侯盡
西來明斷自天啟大略駕羣才收兵鑄金人函
谷正東開銘功會稽嶺騁望瑯琊臺刑徒七十
萬起土驪山隈尚採不死藥茫然使心哀連弩
射海魚長鯨正崔嵬額鼻象五嶽揚波噴雲雷
鬢鬣蔽青天何由覩蓬萊徐市載秦女樓船幾
時回但見三泉下金棺葬寒灰

鳳飛九千仞五章備綵珍銜書且虛歸空入周
與秦橫絕歷四海所居未得鄰吾營紫河車千
載落風塵藥物祕海嶽採鉛青溪濱時登大樓
山舉首望仙真羽駕滅去影甍車絕回輪尚恐
丹液遲志願不及申徒霜鏡中髮羞彼鶴上人
桃李何處開此花非我春唯應清都境長與韓
衆親

代馬不思越越禽不戀燕情性有所習土風固

其然昔別雁門關今戍龍庭前驚沙亂海日飛
雪迷胡天蟣蝨生虎鷗心魂逐旌旃苦戰功不
賞忠誠難可宣誰憐李飛將白首沒三邊
黃河走東溟白日落西海逝川與流光飄忽不
相待春容捨我去秋髮已衰改人生非寒松年
貌豈長在吾當乘雲螭吸景駐光彩
碧荷生幽泉朝日艷且鮮秋花冒綠水密葉羅
青烟秀色空絕世馨香誰為傳坐看飛霜滿凋

此紅芳年結根未得所願託華池邊

燕趙有秀色綺樓青雲端眉目艷皎月一笑傾
城歡常恐碧草晚坐泣秋風寒纖手怨玉琴清
晨起長歎焉得偶君子共乘雙飛鸞

玄風變太古道喪無時還擾擾季葉人雞鳴趨
四關但識金馬門誰知蓬萊山白首死羅綺笑
歌無休閑綵酒晒丹液青娥凋素顏大儒揮金
槌琢之詩禮間蒼蒼三珠樹冥目焉能攀

搖裔雙白鷗鳴飛滄江流宜與海人狎豈伊雲
鶴儔寄影宿沙月沿芳戲春洲吾亦洗心者忘
機從爾遊

擬古

高樓入青天下有白玉堂明月看欲墮當窗懸
清光遙夜一美人羅衣霑秋霜含情弄柔瑟彈
作陌上桑弦聲何激烈風卷繞飛梁行人皆躑
躑棲鳥去回翔但寫妾意苦莫辭此曲傷願逢

同心者飛作紫鴛鴦

長繩難繫日自古共悲辛黃金高北斗不惜買
陽春石火無留光還如世中人即事已如夢後
來我誰身提壺莫辭貧取酒會四鄰仙人殊悅
愜未若醉中真

今日風日好明日恐不如春風笑於人何乃愁
自居吹簫舞彩鳳酌醴鱸神魚千金買一醉取
樂不求餘達士遺天地東門有二疎愚夫同瓦

石有才知卷舒無事坐悲苦塊然涸轍魚
月色不可掃客愁不可道玉露生秋衣流螢飛
百草日月終銷毀天地同枯槁蟋蟀啼青松安
見此樹老金丹寧誤俗昧者難精討爾非千歲
翁多恨去世早飲酒入玉壺藏身以為寶
涉江弄秋水愛此荷花鮮攀荷弄其珠蕩漾不
成圓佳期綵雲重欲贈隔遠天相思無由見悵
遠涼風前

去去復去去辭君還憶君漢水既殊流楚山亦
此分人生難稱意豈得長為羣越燕喜海日燕
鴻思朔雲別久容華晚琅玕不能飯日落知天
昏夢長覺道遠望夫登高山化石竟不返

來日大難

來日一身携糧負薪道長食盡苦口焦脣今日
醉飽樂過千春仙人相存誘我遠學海陵三山
陸憩五嶽乘龍上三天飛目瞻兩角授以神藥

金丹滿握蟋蟀蒙恩深愧短促思填東海強銜
一木道重天地軒師廣成蟬翼九五以求長生
下士大笑如蒼蠅聲

沙邱城下寄杜甫

我來竟何事高卧沙邱城城邊有古樹日夕連
秋聲魯酒不可醉齊歌空復情思君若汶水浩
蕩寄南征

寄東魯二稚子

吳地桑葉綠吳蠶已三眠我家寄東魯誰種龜
陰田春事已不及江行復茫然南風吹歸心飛
墮酒樓前樓東一株桃枝葉拂青烟此樹我所
種別來向三年桃今與樓齊我行尚未旋嬌女
字平陽折花倚桃邊折花不見我淚下如流泉
小兒名伯禽與姊亦齊肩雙行桃樹下撫背復
誰憐念此失次第肝腸日憂煎裂素寫遠意因
之汶陽川

送楊山人歸嵩山

我有萬古宅嵩陽玉女峯長留一片月挂在東
溪松爾去掇仙草菖蒲花紫茸歲晚或相訪青
天騎白龍

金鄉送韋八之西京

客自長安來還歸長安去狂風吹我心西挂咸
陽樹此情不可道此別何時遇望望不見君連
山起烟霧

經下邳圯橋懷張子房

子房未虎嘯破產不為家滄海得壯士椎秦博
浪沙報韓雖不成天地皆振動潛匿遊下邳豈
曰非智勇我來圯橋上懷古欽英風唯見碧流
水曾無黃石公歎息此人去蕭條徐泗空

春日醉起言志

處世若大夢胡為勞其生所以終日醉頽然卧
前楹覺來眄庭前一鳥花間鳴借問此何時春

風語流鶯感之欲歎息對酒還自傾浩歌待明月曲盡已忘情

與元丹邱方城寺談玄作

茫茫大夢中唯我獨先覺騰轉風火來假合作容貌滅除昏疑盡領畧入精要澄慮觀此身因得通寂照朗悟前後際始知金仙妙幸逢禪居人酌玉坐相召彼我俱若喪雲山豈殊調清風生虛空明月見談笑怡然青蓮宮永願恣游眺

春滯沅湘有懷山中

沅湘春色還風暖烟草綠古之傷心人於此腸斷續予非懷沙客但美採菱曲所願歸東山寸心於此足

蜀道難

噫吁噉危乎高哉蜀道之難難於上青天巖叢及魚鳧開國何茫然爾來四萬八千歲不與秦塞通人烟西當太白有鳥道可以橫絕峨眉巔

地崩山摧壯士死然後天梯石棧方鈎連上有
六龍回日之高標下有衝波逆折之回川黃鶴
之飛尚不得猿猱欲度愁攀緣青泥何盤盤百
步九折縈巖巒捫參厯井仰脅息以手撫膺坐
長歎問君西游何時還畏途巉巖不可攀但見
悲鳥號古木雄飛雌從繞林間又聞子規啼夜
月愁空山蜀道之難難於上青天使人聽此凋
朱顏連峯去天不盈尺枯松倒挂倚絕壁飛湍

暴流爭喧豗砮崖轉石萬壑雷其險也若此嗟
爾遠道之人胡為乎來哉劍閣崢嶸而崔嵬一
夫當關萬夫莫開所守或匪親化為狼與豺朝
避猛虎夕避長蛇磨牙吮血殺人如麻錦城雖
云樂不如早還家蜀道之難難於上青天側身
西望長咨嗟

烏棲曲

姑蘇臺上烏棲時吳王宮裏醉西施吳歌楚舞

歡未畢青山猶銜半邊日金壺丁丁漏水多起
看秋月墜江波東方漸高奈樂何

飛龍引

黃帝鑄鼎於荆山鍊丹砂丹砂成黃金騎龍飛
去太上家雲愁海思令人嗟宮中綵女顏如花
飄然揮手凌紫霞從風縱體登鸞車登鸞車侍
軒轅遨遊青天中其樂不可言

鼎湖流水清且閑軒轅去時有弓劍古人傳道

留其間後宮嬋娟多花顏乘鸞飛烟亦不還騎
龍攀天造天關造天關聞天語屯雲河車載玉
女載玉女過紫皇紫皇乃賜白兔所擣之藥方
後天而老凋三光下視瑤池見王母蛾眉蕭颯
如秋霜

獨漉篇

獨漉水中泥水濁不見月不見月尚可水深行
人沒越鳥從南來胡雁亦北度我欲彎弓向天

射惜其中道失歸路落葉別樹飄零隨風客無
所託悲與此同羅緯舒卷似有人開明月直入
無心可猜雄劍挂壁時時龍鳴不斷犀象羞澁
苔生國恥未雪何由成名神鷹夢澤不顧鷓鴣
為君一擊搏鵬九天

前有樽酒行

春風東來忽相過金樽綠酒生微波落花紛紛
稍覺多美人欲醉朱顏醜青軒桃李能幾何流

光欺人忽蹉跎君起舞日西夕當年意氣不肯
傾白髮如絲歎何益

琴奏龍門之綠桐玉壺美酒清若空催絃拂柱
與君飲看朱成碧顏始紅胡姬貌如花當壚笑
春風笑春風舞羅衣君今不醉欲安歸

金陵城西樓月下吟

金陵夜寂涼風發獨上高樓望吳越白雲映水
搖空城白露垂珠滴秋月月下沉吟久不歸古

來相接眼中稀解道澄江淨如練令人長憶謝
玄暉

宣城謝朓樓餞別校書叔雲

棄我去者昨日之日不可留亂我心者今日之
日多煩憂長風萬里送秋雁對此可以酣高樓
蓬萊文章建安骨中間小謝又清發俱懷逸興
壯思飛欲上青天覽明月抽刀斷水水更流舉
杯消愁愁更愁人生在世不稱意明朝散髮弄

扁舟

寄王屋山人孟大融

我昔東海上勞山食紫霞親見安期公食棗大
如瓜中年謁漢主不愜還歸家朱顏謝春暉白
髮見生涯所期就金液飛步登雲車願隨夫子
天壇上閒與仙人掃落花

早春寄王漢陽

聞道春還未相識走傍寒梅訪消息昨夜東風

入武陽陌頭楊柳黃金色碧水浩浩雲茫茫美人不來空斷腸預拂青山一片石與君連日醉
壺觴

憶舊游寄譙郡元參軍

憶昔洛陽董糟邱為余天津橋南造酒樓黃金
白璧買歌笑一醉累月輕王侯海內賢豪青雲
客就中與君心莫逆迴山轉海不作難傾情倒
意無所惜我向淮南攀桂枝君留洛北愁夢思

不忍別還相隨相隨迢迢訪仙城三十六曲水
迴縈一溪初入千花明萬壑度盡松風聲銀鞍
金絡到平地漢東太守來相迎紫陽之真人邀
我吹玉笙飡霞樓上動仙樂嘈然宛似鸞鳳鳴
袖長管催欲輕舉漢中太守醉起舞手持錦袍
覆我身我醉橫眠枕其股當筵意氣凌九霄星
離雨散不終朝分飛楚關山水遙余既還山尋
故巢君亦歸家度渭橋君家嚴君勇貌虎作尹

并州過戎虜五月相呼度太行
摧輪不道羊腸苦行來北京
歲月深感君貴義輕黃金瓊
杯綺食青玉案使我醉飽無
歸心時時出向城西曲晉祠
流水如碧玉浮舟弄水簫鼓
鳴微波龍鱗莎草綠興來携
妓恣經過其若楊花似雪何
紅妝欲醉宜斜日百尺清潭
寫翠娥翠娥嬋娟初月輝美
人更唱舞羅衣清風吹歌入
空去歌曲自繞行雲飛此時
行樂難再遇西游因獻長楊

賦北闕青雲不可期
東山白首還歸去
渭橋南頭一遇君
鄼臺之北又離羣
問予別恨今多少
落花春暮爭紛紛
言亦不可盡情亦不可極
呼兒長跪緘此辭
寄君千里遙相憶

示金陵子

金陵城東誰家子
竊聽琴聲碧窗裏
落花一片天上來
隨人直渡西江水
楚歌吳語嬌不成
似能未能最有情
謝公正要東山妓
携手林泉處

處行

塞下曲

五月天山雪無花祇有寒笛中聞折柳春色未
曾看曉戰隨金鼓宵眠抱玉鞍願將腰下劍直
為斬樓蘭
駿馬似風飈鳴鞭出渭橋彎弓辭漢月挿羽破
天驕陣解星芒盡營空海霧銷功成畫麟閣獨
有霍嫖姚

塞虜乘秋下天兵出漢家將軍分虎竹戰士卧
龍沙邊月隨弓影胡霜拂劍花玉關殊未入少
婦莫長嗟

宮中行樂詞

小小生金屋盈盈在紫微山花挿寶髻石竹繡
羅衣每出深宮裏常隨步贊歸只愁歌舞散化
作彩雲飛

柳色黃金嫩梨花白雪香玉樓巢翡翠珠殿鎖

鴛鴦選妓隨雕輦
徵歌出洞房
宮中誰第一
飛燕在昭陽

盧橘為秦樹
蒲桃出漢宮
烟花宜落日
絲管醉春風
笛奏龍鳴水
簫吟鳳下空
君王多樂事
還與萬方同

寄淮南友人

紅顏悲舊國
青歲歇芳洲
不待金門詔
空持寶劍游
海雲迷驛道
江月隱鄉樓
復作淮南客
因

逢桂樹留

贈錢徵君少陽

白玉一杯酒
綠楊三月時
春風餘幾日
兩鬢各成絲
秉燭唯須飲
投竿也未遲
如逢渭水獵
猶可帝王師

秋思

關氏黃葉落
妾望白登臺
海上碧雲斷
單于秋色來
胡兵沙塞合
漢使玉關回
征客無歸日
空

悲蕙草摧

江夏別宋之悌

楚水清若空，遙將碧海通。
人分千里外，興在一杯中。
谷鳥吟晴日，江猿嘯晚風。
平生不下淚，於此泣無窮。

尋雍尊師隱居

羣峭碧摩天，逍遙不計年。
撥雲尋古道，倚樹聽流泉。
花暖青牛卧，松高白鶴眠。
語來江色暮，獨

自下寒烟

聽蜀僧濬彈琴

蜀僧抱綠綺，西下峨眉峯。
為我一揮手，如聽萬壑松。
客心洗流水，餘響入霜鐘。
不覺碧山暮，秋雲暗幾重。

訪戴天山道士不遇

犬吠水聲中，桃花帶雨濃。
樹深時見鹿，溪午不聞鐘。
野竹分青靄，飛泉挂碧峯。
無人知所去，愁

倚雨三松

過崔八丈水亭

高閣橫秀氣清幽併在君簷飛宛溪水窗落敬
亭雲猿嘯風中斷漁歌月裏聞閑隨白鷗去沙
上自為羣

謝公亭

謝公離別處風景每生愁客散青天月山空碧
水流池花春映日窗竹夜鳴秋今古一相接長

歌懷舊游

太原早秋

歲落衆芳歇時當大火流霜威出塞早雲色渡
河秋夢繞邊城月心飛故國樓思歸若汾水無
日不悠悠

題東溪公幽居

杜陵賢人清且廉東溪卜築歲將淹宅近青山
同謝朓門垂碧柳似陶潛好鳥迎春歌後院飛

花送酒舞前簷客到但知留一醉盤中祇有水
精鹽

送儲邕之武昌

黃鶴西樓月長江萬里情春風三十度空憶武
昌城送爾難為別銜杯惜未傾湖連張樂地山
逐汎舟行諾謂楚人重詩傳謝朓清滄浪吾有
曲寄入棹歌聲

襄陽曲

且醉習家池莫看墮淚碑山公欲上馬笑殺襄
陽兒

相逢行

相逢紅塵內高揖黃金鞭萬戶垂楊裏君家阿
那邊

越女詞

長干吳兒女眉目艷星月屐上足如霜不著鷓
頭襪

吳兒多白暫好為蕩舟劇賣眼擲春心折花調
行客

耶溪採蓮女見客棹歌迴笑入荷花去佯羞不
肯來

東陽素足女會稽素舸郎相看月未墮白地斷
肝腸

鏡湖水如月耶溪女如雪新妝蕩新波光景兩
奇絕

巴女詞

巴水急如箭巴船去若飛十月三千里郎行幾
歲歸

送陸判官往琵琶峽

水國秋風夜殊非遠別時長安如夢裏何日是
歸期

重憶

欲向江東去定將誰舉杯稽山無賀老却棹酒

船回

紫藤樹

紫藤挂雲木花蔓宜陽春
密葉隱歌鳥香風留美人

流夜郎題葵葉

慚君能衛足歎我遠移根
白日如今照還鄉守故園

長門怨

天回北斗挂西樓金屋無人螢火流
月光欲到長門殿別作深宮一段愁
桂殿長愁不記春黃金四屋起秋塵
夜懸明鏡青天上獨照長門宮裏人

峨嵋山月歌

峨嵋山月半輪秋影入平羌
江水流夜發清溪向三峽
思君不見下渝州

客中作

蘭陵美酒鬱金香
玉碗盛來琥珀光
但使主人能醉客
不知何處是他鄉

春夜洛城聞笛

誰家玉笛暗飛聲
散入春風滿洛城
此夜曲中聞折柳
何人不起故園情

與史郎中飲聽黃鶴樓上吹笛

一為遷客去長沙
西望長安不見家
黃鶴樓中吹玉笛
江城五月落梅花

巴陵贈賈舍人

賈生西望憶京華
湘浦南遷莫怨嗟
聖主恩深漢文帝
憐君不遣到長沙

陌上贈美人

駿馬騎行踏落花
垂鞭直拂五雲車
美人一笑褰珠箔
遙指紅樓是妾家

望天門山

天門中斷楚江開
碧水東流直北迴
兩岸青山

相對出孤帆一片日邊來

魯東門汎舟

日落沙明天倒開波搖石動水縈迴輕舟汎月
尋溪轉疑是山陰雪後來
水作青龍盤石堤桃花夾岾魯門西若教月下
乘舟去何啻風流到剡溪

贈汪倫

李白乘舟將欲行忽聞岸上踏歌聲桃花潭水

深千尺不及汪倫送我情

南流夜郎寄內

夜郎天外怨離居明月樓中音信疏北雁春歸
看欲盡南來不得豫章書

天籟續集目錄之四

唐

杜甫


前出塞

新安吏

垂老別

無家別

遊龍門奉先寺



同諸公登慈恩寺

送高三十五書記十五韻

九成宮

玉華宮

義鶻行

發秦州

赤谷

寒峽

法鏡寺

石龕

積草嶺

發同谷縣

白沙渡

飛仙閣

石櫃閣

桔柏渡

成都府

送孔巢父謝病歸遊江東兼呈李白

飲中八仙歌

哀江頭

桃竹杖引贈章留後

丹青引贈曹將軍霸

短歌行贈王郎司直

登兗州城樓

夜宴左氏莊

陪鄭廣文遊何將軍山林

陪諸貴公子丈八溝携妓納涼晚際遇雨

春望

喜達行在所

月夜憶舍弟

天末懷李白

不見

題張氏隱居

江村

將赴成都草堂途中有作先寄嚴鄭公
夜

秋興八首

小至

暮歸

寄李十二白二十韻

絕句二首

贈花卿

江南逢李龜年

丁仙芝

餘杭醉歌贈吳山人

張謂

代北州老翁畬

同王徵君湘中有懷

張旭

山中留客

劉方平

秋夜汎舟

張志和

漁父

劉長卿

逢郴州使因寄嚴協律

經漂母墓

餞別王十一南遊

江州重別薛六柳八二員外

獻淮甯軍節度李相公

彈琴

送上人

送李判官之潤州行營

重送裴郎中貶吉州

錢起

酬王維春夜竹亭贈別

歸雁

韋應物

擬古

初發揚子寄元校書

淮上即事寄廣陵親故

長安遇馮著

同德寺雨後寄元侍御李博士
夕次盱眙縣
東郊

自鞏洛舟行入黃河即事寄府縣僚友
寄李儋元錫

聞雁

李嘉祐

送王牧吉州謁使君叔

皇甫冉

春思

竇叔向

夏夜宿表兄宅話舊

李端

巫山高

宿淮浦憶司空文明

聽箏

郎士元

送錢大

李泌

長歌行

于鵠

江南曲

盧綸

送李端

夜中得循州趙司馬侍郎書因寄回使

王建

十五夜望月

竇牟

奉誠園聞笛

李益

鹽州過胡兒飲馬泉

鷓鴣詞

從軍北征

聽曉角

耿漳

秋日

司空曙

雲陽館與韓紳宿別

峽口送友人

柳宗元

晨詣超師院讀禪經

韓愈

秋懷

祖席

次潼關先寄張十二閣老

張籍

節婦吟

薊北旅思

劉禹錫

楊柳枝詞

和令狐相公牡丹

元稹

離思

白居易

故衫

西湖晚歸回望孤山寺贈諸客

欲與元八卜鄰先有是贈

王涯

閨人贈遠

戎昱

移家別湖上亭

李賀

高軒過并序

將進酒

美人梳頭歌

盧弼

塞上四時詞

李商隱

晚晴

常娥

杜牧

江南春

醉後題僧院

秋夕

許渾

秋日赴闕題潼關驛樓

謝亭送別

溫庭筠

送人東遊

利州南渡

趙嘏

江樓書感

李羣玉

黃陵廟

馬戴

落日悵望

李咸用

訪友人不遇

崔魯

華清宮

陸龜蒙

懷宛陵舊遊

冷朝陽

席上送別

杜荀鶴

新雁

鄭谷

席上贈歌者

劉綺莊

揚州送人

韋莊

憶昔

古離別

沈彬

塞下曲

高蟾

下第後上永崇高侍郎

崔塗

湘中謠

張泌

寄人

裴羽仙

寄夫征衣

鮑君徽

惜春花

陳玉蘭

寄外征衣

葛亞兒

懷良人

薛濤

送友人

武昌妓

續韋蟾句

太上隱者

答人

皎然

尋陸鴻漸不遇

處默

聖果寺

天籟續集

唐

杜甫

前出塞

戚戚去故里悠悠赴交河
公家有程期亡命嬰
禍羅君已富土境開邊一
何多棄絕父母恩吞
聲行負戈

出門日已遠不受徒旅欺
骨肉恩豈斷男兒死

無時走馬脫轡頭手中挑青絲捷下萬仞岡俯
身試搴旗

磨刀嗚咽水赤刃傷手欲輕腸斷聲心緒亂
已久丈夫誓許國憤惋復何有功名圖麒麟戰
骨當速朽

送徒既有長遠戍亦有身生死向前去不勞吏
怒嗔路逢相識人附書與六親哀哉兩決絕不
復同苦辛

迢迢萬里餘領我赴三軍軍中異苦樂主將宣
盡聞隔河見胡騎倏忽數百羣我始為奴僕幾
時樹功勳

挽弓當挽強用箭當用長射人先射馬擒賊先
擒王殺人亦有限立國自有疆苟能制侵陵豈
在多殺傷

驅馬天雨雪軍行入高山逕危抱寒石指落曾
冰閒已去漢月遠何時築城還浮雲暮南征可

望不可攀

單于寇我壘百里風塵昏
雄劍四五動彼軍為我奔
虜其名王歸繫頸授轅門
潛身備行列一勝何足論

從軍十年餘能無分寸功
衆人貴苟得欲語羞雷同
中原有鬪爭况在狄與戎
丈夫四方志安可辭固窮

新安吏

客行新安道